

**SEVENTH LEGISLATIVE ASSEMBLY OF MIZORAM  
( FOURTH SESSION )**

**LIST OF BUSINESS**

FOR EIGHTH SITTING ON THURSDAY, THE 20<sup>th</sup> NOVEMBER, 2014  
(Time 10:30 AM to 1:00 PM and 2:00 PM to 4:00 PM)

**QUESTIONS**

1. **Questions** entered in separate list to be asked and oral answers given.

**LAYING OF PAPERS**

2. **Pu R. LALZIRLIANA**, Minister to lay on the Table of the House The Mizoram Liquor (Prohibition and Control) Rules, 2014.
3. **Pu H. ROHLUNA**, Minister to lay on the Table of the House Twenty First Annual Report (01.04.2010-31.03.2011) of Mizoram Food & Allied Industries Corporation Ltd.

**FINANCIAL BUSINESS**

***DISCUSSION AND VOTING ON DEMANDS***

4. **Pu R. LALZIRLIANA**, Minister to submit to the Vote of the House various Demands under his charge.
5. **Pu H. ROHLUNA**, Minister to submit to the Vote of the House various Demands under his charge.

NGURTHANZUALA  
Secretary

....

---

\*\* Please see Bulletin Part-II Sl. No. 63 dated 19<sup>th</sup> November, 2014 for Demands to be moved by Ministers.

**SPEAKER** : Elrel leh inngaihhlut avanga engmah ti lovin, mi tinin inngaitlawm takin mahni aiin mi dang tha zawkah ruat theuh rawh se. (Philippi 2:3)

Zawhna kan la ang a, zawhna No.111-na zawt turin Member zahawm tak Er.Lalrinawma ilo sawm ang u.

**Er. LALRINAWMA** : Pu Speaker, ka lawm e. Printing & Stationery department changtu Minister zahawm tak hnena ka zawhna Starred Question No.111-na chu -

- a) Printing & Stationery Department hian kum 2013-2014 chhung khan sorkar department engzatnge dawrtu a hmuh?
- b) Engzat manin nge an dawr ? tih ka zawt e.

**SPEAKER** : A chhang turin a changtu minister zahawm tak Pu C.Ngunlianchunga sawm ila.

**Pu C.NGUNLIANCHUNGA, MINISTER** : Pu Speaker, Er.Lalrinawma, MLA Tuikum bialtu zawhna chhanna -(a)-na chu department 62 in an dawr. Engzatnge pawisa hi tih hi ₹ 96,16,694.00 a ni e.

\*Speech not corrected.

**SPEAKER** : Zawhbelhna a awm em? Aw, Pu Rinawma a neitu.

**Er. LALRINAWMA** : Pu Speaker, ka lawm e. Ka zawhbelh duh chu kan department zingah hian dawr lo kan awm em? Tin, a dawr tawh te pawh hi tun aia an dawr that lehna dan tura hmalak tumna a awm em? tih kha ka zawhbelh e.

**SPEAKER** : Le, Minister sawm ila.

**Pu C. NGUNLIANCHUNGA, MINISTER** : Pu Speaker, department dawrlo an tam a. Tin, kan stationery neihte hi tun dinhmunah hian nuai 360 chuang man stock suspend kan nei a. Tah chuan hman tlak tawh loh hi nuai 90 man vel kan nei bawk a, a hman tlak ho hi kan Chief Minister approval lain department hrang hrangah tlawmngaia lei turin tunah hian hmalak mek a ni a. Tin, department min la dawrlo te hnenah pawh dawr tura hriattir a ni a, ngenna siam a ni a. Tin,

chumi rual chuan tuna kan Department-a kan stock suspend ho hi tihral vek a, a thara kal tumna ruahmanna kan siam a. Chutah chuan, a deliver-na atan department pawhin pick-up (Mahindra) kan lei tawh a. Luangmual Department atangin department te hnenah an indent ang ang kha pek kan tum a ni. Tin, a material pawh tha zawk leh hmantlak ngei indent a lak kan tum, chutiang chuan hma lak mek a ni e.

\*Speech not corrected.

**SPEAKER** : Zawhbelhna Pu T.Sangkunga.

**Pu T. SANGKUNGA** : Pu Speaker, ka lawm e. Printing & Stationery department awm hi a tha khawp mai a. Eirukna a veng em em a ni. Department-in private an dawr chuan a stationery aiah khan a pawisa hi lak a awl a. Reilo te he department a ka awm chhungin chu chu ka hmu Chiang khawpin ka hria a. A bik takin Xerox paper te hian thleng a awl em em mai a, Xerox paper realm 10 aiah hei hi kan la ang e tih kha a awl em em mai a. Chuvangin, Chief Minister approval meuhin 'department tinin dawr tur' tih order an chhuah meuh pawhin an dawr that duh lohna bulpui ber chu hei hi a ni a. Chief Minister approval meuhin notification hi wawi 2 wawi 3 chhuah a ni a, tuna kan ngaihthlak khan dawr lo an la tam mai tih a ni a. A order awm ringawt a, zawm loh hi a zahthlak a, kha kha engtingnge hma lak a nih? A zawmlo kha kan minister zahawm tak khan an tam mai a ti a, Mizoram department hi 30 pawh kan tling lova, a zawhna zir vang nge department 62-in an dawr a, dawr lo an la tam mai tih a ni a, 30 pawh tling si lova, DDO wise deuh a nih kan ring nghe nghe a. Dawr lo lui kha an la tam em tih leh kan minister ho khan tun hma khan outlet siam a nih loh chuan Luangmuala zu kal hi motor te privatized zawh a ni tawh si a, kan ti a, tunah pheih chuan motor hi a tam leh tawh khawp mai a, a relevant lutuk lova, Luangmual a zu lei khu a hautak em mai. Helaiah outlet siam ila, tichuan hnai takah an la zung zung thei ang tih a ni a. Motor a nih kha chuan driver a ngai leh a, repair leh oil man kan ti a, lei pheih chu a ni tawh tho mai a. Khati a nih kha chuan an pe thei dawn tih a ni a, khatia pek kha alternative a suggestion awm reng a ni a. Khati a nih kha chuan a pawisa in realm 10 aia lak vel kha a awm thei lova. Pawisa dah hmasak vek, challan a tih a nih avangin. Tun ang financial constraint nasa lutuk ah chuan tihluhna tak zet zet a kan impose hi ngaiin ka hria a. A chhia te an ti a, kan zu endik a, an paper-te kha a chhe lo reng reng, a tha lutuk. Heta private an dawr thin te ta tho kha a ni a. Chuvangin, helai hi ka ngaih pawimawh em emna chu Pu Speaker, kan pawisa dinhmun heti khawpa a tight hnu a stationery a kan hmang tam em em reng mai hi chu a ni thei lovin ka hria. Ka zawhna chu outlet siam a ni tawh em tih leh khatiang Chief Minister approval meuh a cabinet ah te pawh sawi a ni a. Khatiang tih tawh si zawm lo te kha engting nge an tih tih kha kan minister zahawm tak hi ka zawt e.

**SPEAKER** : Aw, Pu Pianmawia zawt phawt rawh se aw.

**Pu R.L. PIANMAWIA** : Pu Speaker, ka zawhbelhna chu Mizoram calendar siam thin hi phaiiah thawn lovin, tun kumthar ami tur hi Mizoram Printing & Stationery-ah hian siamtir vek a ni em ? tih ka zawt e.

**SPEAKER** : Aw, Pu Hmingdailova zawt nghal mai sela, a chhang thei ang chu maw ?

**Pu HMINGDAILOVA KHIANGTE** : Chhan a awl khawp ang Pu Speaker. Ka zawh duh chu Pu Speaker, kan service ve kha chuan Printing & Stationery atanga no objection kan lak loh chuan dawrkai ami kha kan indent mai mai thei lo va, vawiinah hian chutiang lo chuan a duh duh in dawrkai ami/firm ami hi an indent hi a ang viau va. No objection lovin duh duhna hmun ami department hian an indent thei em tih ka zawt a ni.

**SPEAKER** : Awle, minister zahawm tak chhang turin sawm ila.

**Pu C.NGUNLIANCHUNGA, MINISTER** : Pu Speaker, zawhbelhna chhanna chu, Pu T.Sangkunga zawhna kha a dik khawp mai a, department kha helaiah hian a chhiar chhuah mai theih a, kan chhiar chhuak dawn em ni Pu Speaker, a rei lutuk ang em ? Hei, department thenkhatte pheih hi chuan ₹ 8470/- tih vel te, a hminga dawr lo aia dawr tih ang deuh kha a ni ve a. Helaiah hian vawiinah he House zahawm tak pawhin min hriatpui atana ka duh chu, Mizoram sorkar sum dinhmunah kan harsa a ni tih kan financial statement te leh kan Finance minister ngei pawhin a sawi mawlh mawlh a, member zawng zawngin kan sawi vek a. Chutih lai karah chuan Printing & Stationery department ringawt pawh hian cheng nuai 360 pawh kha khulaiiah khuan Luangmual-ah kan dah mu ringawt mai a ni. Chuvang chuan, hei hi a fello a ni tiin a hmun ngeiah kalin kan enfiah a. Tin, Lunglei-ah te, Saiha-ah te pawh hmun kan nei a. Chung ami te chu a tam thei ang ber, a hman tlak thei ang ber hi tihral dan ngaihtuah a ni a. Tin, helaiah hian building kan nei a, kan building hi a chhe tawh hle a. Kuminah hian SPA atangte pawhin min sak that sak turin kan Chief Minister zahawm tak PWD changtu hnenah te pawh kan thlen tawh a. Helai hmun kan neih hi kan sa tha thei a, kan hmang tangkai thei anih chuan outlet te pawh siam tumna kan nei a. Amaherawhchu, tuna kan nih ang ngawr ngawr saw chuan han tihngaihna a awm lova. Chuvang chuan, department-in indent han pekna tur atan khan motor kha ngaihtuah a ni tih kha ka chhanna ni sela.

Tin, Mizoram calendar kumin ami hi keimahni Printing & Stationery Department-in kan chhut a ni a, helaiah pawh hian harsatna lek lek a awm a. Mizorama chhut ai chuan phai lama han chhut tir hram duhnate pawh department lam atangin a awm a ni. Amaherawhchu information changtu Minister hnenah te pawh keimahniin kan chhut ve theih thu leh kan chhutna tur pawisa kha, Mizoram sorkara lut leh tur a nih avangin, vai rama pek zel mai hi chu a tha lo a ni, kan ti a, min chhut tir ta a. Tunah hian Luangmual hmunah te khuan Printing Press lian pawh kan nei a, kumthar January lamah te chuan Commission theih kan inbeisei a, chungah chuan zirilaibu engemaw zat pawh hi chhu thei turin kan inbeisei baw a.

Kan Minister hmasate leh kan hotu hmasate hma lo lak nain vibelchhe 8 laiin Printing & Stationery Department ah hian project kallai kan nei a ni. Tin, MoC tellovin a tih theih mai a ni tih kha, keini lam atang chuan min dawr vek turin kan ti a, amaherawhchu controltu kan nih lohna chen a awm a, chulaiah chuan harsatna a tam em em a. Vawiina ka sawi duh em em pakhat chu, helaiah hian sum leh pai mumal zawk leh tha zawka a kal theihna tur atan pawh Printing & Stationery Department hi min hmang tangkai thei sela chuan, sorkar ang pawhin kha pawisa kha a huhovin, a khawmin, a tam thamin kan zuk lam anga, chuta tang chuan dawrkaia man to tak taka lei lovin, man tlawm zawk pawha lei theih tur pawha kalpui a tha kawp maia.

Tin, kan hotu, kan Minister te leh vawiina kan head of Department te pawhin min hriatsak se ka duh chu. A remchang ringawt hi zawng lo ila, keimahni leh keimahni kan intuamhlawm theihna tur leh kan intihnun theihna tur hi kawng kan zawn tlan a pawimawh khawp mai. Chief Minister approval order kha awm mahse, he lamah Department lamin engemaw chhuanlam an lo siam thinna avanga Printing & Stationery Department hi dawr lo tam tak an awm a ni. A theih hram chuan kan theih ang chin chin leh, pawisa hi kan ngah lo a, kum khatah cheng nuai 100 chauh khami Printing & Stationery Supply-na tur atan khan kan nei a, khami pawn lamah te khan Department liante chuan keimahni kaltlang kher lo pawha dawra lei theihna a awm em em a ni. Chutih rual chuan, helaia kan neih ang ang pawh kha lei lovin, tichhuak leh tawh loin, khulaiah khuan dah tan vek a ni ta ringawt mai a ni tih kha Pu Speaker, ka chhanna a ni e, ka lawm e.

\*Speech not corrected.

**SPEAKER** : Chief Minister.

**Pu LAL THANHAWLA, CHIEF MINISTER** : Khulaia stock hman tlak loh, nuai 300 chuang awm kha, kum tam tak atanga lo kal chho tawh kha a ni a. Tin, Department hrang

hrangte hian an dawr that duhlohna chhan chu an materials hi a tha tawh thin lo a ni. Chuvangin tunah chuan materials tha an lei ang a, file cover a nih pawhin, paper a nih pawh in an duh ang chi, pisa tina kan hman ang chi kha an lei tawh tur a ni kan ti a.

Tin, member zahawm tak Pu Sangkunga han sawi kha, khulai atanga zuk lak khu tam tak tan chuan a harsa han tih kha tunah chuan a duh te, rawn indent te, Department a pekna tur motor kan lei tawh a tunah chuan, chu chuan kan ti tawh ang a. Tin, a Department ngei pawhin, khatia sum tihral mai mai tur atan ni lo, lo eirukna atan ni lo khan kan tih tir dawn a ni. Tin, chumi hnuah chuan department te khan an lei ngei ngei tur a ni a, a lei lo chu an chungchang ngaihtuah dan chu kan thiam vein ka ring a, chutiang chuan dik tak leh tha taka kal kan tum a ni.

Tin, calendar kha, nikum calendar te kha in en ang a, Department-in kan print thei kan ti a, amaherawhchu an thei leh lo deuh emaw ni an out source tih te pawh ka hrechiang a, kuminah pawh an mahni ka ko a, 'in out source leh dawn chuan in tan a pawi khawp ang, kan print thei in ti a, tichuan kan print tir dawn che u a ni. In out source leh a nih chuan in tan a pawi ang,' ti te pawhin kan inthlah nghe nghe a. Tin, han en ulangin a quality hi chu a inferior a ni tih chu mit nei tan chuan a hriat theih bawh.

**SPEAKER** : Pu Zoram Sangliana, zawh tur i nei em?

**Pu P.C ZORAM SANGLIANA** : House Leader sawi hnuah han zawh leh chu a chi tawh lo ang e, ka zawt tawh lo mai ang e.

**SPEAKER** : Zawhna number 112-na, zawt turin Member zahawm tak Pu Nihar Kanti Chakma sawm ila.

**Pu NIHAR KANTI CHAKMA** : Pu Speaker, ka zawhna Starred Question 112-na Education Minister zahawm tak chhan atan :-

- a) Malsuri UPS (SSA) hnuaiyah zirtirtu pangngai (EV Teacher leh Hindi Teacher tel lovin) engzatnge awm?
- b) Zirtirtu hming min hrih thei em?
- c) Class tina naupang awm zat min hrih thei em?

**SPEAKER** : Awle, Education Minister Pu H.Rohluna chhang turin ilo sawm ang.

**Pu H. ROHLUNA, MINISTER** : Pu Speaker, member zahawm tak Pu Nihar Kanti Chakma zawhna chhanna chu –

- a) Malsuri-ah hian UPS Upgraded School a awm lova, SSA School a awm a, zirtirtu pakhat ( CI – VIII zirtirtu) a awm a ni.
- b) Zirtirtu hi Shanti Lal Chakma a ni a, December ni 22,2009 ah appoint a ni.
- c) Class tina naupang awm zat chu hetiang hi a ni. Class-V-23, Class-VI-23, CI-VII ah 36, tichuan an vaiin-82 an ni.

Tichuan Pu Speaker, helaia a zawh bak tlem han hrihfhiah hlek ka duh a, SSA School-in School awmlahna khuaah hian Alternative and Innovative Centre hi a din thin a, Malsuri ah pawh hian 2006 a din a ni a, UPS a hlangkai tur chuan central approval a ngai a, PAB in an approve a ngai a, chumi approval chu a awm loh avangin tun thleng hian UPS ah hlankai theih a ni rih lo a, tunah hian Hindi zirtirtu a awm bawh a ni, he school-ah hian.

**SPEAKER** : Zawhbelhna a awm em ? Dr.K Beichhua.

**Dr. K. BEICHHUA** : Pu Speaker, Minister zahawm tak hnena ka zawhbelhna chu SSA zirtirtute leh Hindi teachers-te hi thla engzat nge hlawh kan pek tak loh? Tunah hian hlawh kan pe em? Kan pek loh chuan thla engzat nge hlawh kan pek tak loh tih kha ka zawt e.

**SPEAKER** : Minister zahawm tak sawm ila.

**Pu H. ROHLUNA, MINISTER** : Pu Speaker, Hindi zirtirtu bik, CSS hnuaiia 1305 chu tunah hian, tun thla hian an hlawh hi an sem tawh hialin ka ring a, a lo thlenga tihfel vek tawh a ni a. Chu chu Hindi zirtirtu bikah chuan ni se. Tin, SSA hi July thla thleng hi pek a ni a; tin hetah Finance Minsiter pawhin a sawi thin a, tun hmaa SSA a direct a lo kal thin, a pawisa pawh hman mai thin kha, Finance Department through a ngaih tak avangin tunah hian 29 crores zet chu khu lam atanga an rawn release a awm a, chumi chu Finance Department lam nen tihfel hun hunah, a bak July thla piah lam, August, September, October hi chu pek theih kan inbeisei a ni.

**Dr. K BEICHHUA** : Pu Speaker, July a rawn thleng tawh a, engchen nge an hren ang tih kha ka zawhna a ni e.

**SPEAKER** : Minister-in chhang sela.

**Pu H.ROHLUNA, MINISTER** : Pu Speaker, kan sawi angin a lo kal dan hi SSA-ah direct in a lo kal tawh loh thin avangin a process chhung hi a rei deuh thin a ni.

**SPEAKER** : Zawhna number 113-naah kal ila, a zawt turin Pu Lalthanliana sawm ang.

**Pu LALTHANLIANA** : Pu Speaker, ka lawm e. Kan Minister zahawm tak chhan atan heng zawhnate hi ka zawt e:-

- a) Kum 2008-2013 chhungin Soil & Water Conservation Department hian NLUP atan sum engzatnge a hman ?
- b) Hmunphiah atan sum engzatnge a hman ?

**SPEAKER** : Pu Lalrinmawia Ralte chhang turin sawm ila.

**Pu LALRINMAWIA RALTE, MINISTER** : Pu Speaker, ka lawm e. MLA zahawm tak Pu Lalthanliana zawhna starred question 113-na chhanna chu hetiang hi a ni :-

- a) Kum 2008-2013 chhunga Soil & Water Conservation Department-in NLUP atana sum hman zawng zawng chu 8137.91 lakhs a ni.
- b) Hmunphiah atana sum hman zat chu 5990.80 lakhs a ni.

**Pu LALRUATKIMA** : Pu Speaker, ka lawm e. Ka Starred Question 114-na, General Administration Department changtu Minister zahawm tak chhan atan :-

- a) Mizoram House thlen man engtik khan nge siam thar a nih ?
- b) Thlen man chi hrang hrang engzat te nge ?

**Pu LAL THANHAWLA, CHIEF MINISTER** : Pu Speaker, MLA zahawm tak Pu Lalruatkima zawhna chhanna chu –



- a) Ni 17.4.2014 khan a pumpui siam thar a ni a, chumi hnuah chuan a then lai thlak thar leh a ni.
- b) Mizoram House thlen man hi room category ang in chi 5-ah then a ni phawt a, chungte chu – (1) VIP Suite (2) AC Room (3) Ordinary (4) AC Dormitory leh
- (5) Ordinary Dormitory te an ni. Thlen man hi zin mite kal chhan a zirin chi 4-ah hetiang hian then a ni bawk. (1) Officials on duty (2) Officials not on duty (3) Private referred medical patients leh (4) Private Others. Mizoram House 7-ah te hian thlen man hi a hrang theuha siam a ni bawk.

**SPEAKER** : Pu Ruatkima zawhbelhna.

**Pu LALRUATKIMA** : Pu Speaker, ka lawm e. Kan ngaithla a, thlen man inanglo theuh kha enge a chhan tih ka zawt a.

Tin, national policy-ah hian upa leh handicapped-te tan reservation priority kha a awm thin a, anni hi pek theih a ni em tih ka zawt a. Tin, dormitory -ah hian zirlai leh damlo harsa ve tak tak te an thleng thin a, hmun thenkhatah chuan zankhat riah man kha ₹ 350 te a ni a, a bik takin Delhi te pheih chu kan sawi belh lawk ang a. Trade fare-ah te an kal thin a, Mizoram sorkar aiawh nisi khan, khang ho bik te tan khan dormitory bik kha ennawn theih a ni em ? tih ka'n zawhbelh a ni e.

**Pu LAL THANHAWLA, CHIEF MINISTER** : Pu Speaker, vai karah thlen in awm hrim hrim hi a thlamuan thlak a. Tin, category hrang kha a awm lo thei lova, Mumbai ami pheih khu chu a tira kan neihna chhan chu damlo tan liau liau a ni, Official-a kal te chu official an ni a, sorkarin a enkawl a, TA/DA te an nei a, damlo harsa ve tak tak te, ka tawng an huatthu suhah an kal thin a, an tan a harsa a, chuvangin an kalna hnai ber tur Cancer Institute bulah kan zawng a, room te a daihzai thei tur ang berin kan siam a. Tin, motor kan lei sak a, Mizoram House atanga Cancer Institute an kal dawn khuan kea kal nan a hla deuh bawk si a, Taxi an kal duh bawk si lo va, chuvangin damlo tan liau liau kan dah a. Inti officer lian deuh te hian chutiang khatiing tiin an rawn sawi thin a, motor a chhia, chutiang khatiing an ti a. Officer emaw, Minister tana dah a ni lo va, khu House khu inti milian deuh tana thlenna a ni lo va, damlo tan a tih a ni a, chuvangin a rate te pawh a inang lo va.

Tin, kan House te a room te pawh a inang lo nual a ni. Mizoram House hrang hrang 7, New Delhi, Kolkata, Bangalore, Shillong, Guwahati, Silchar-ah te hian room rent inang vek an hmang thin a. Bangalore ah hian kan hun hmasa lam khan hmun tha deuh tuna Mahipal Hospital ni ta khuan min pe a, foundation stand te pawh kan lei a, contractor te pawh kan ruat a, mahsela kan awm loh hlan khan alo bo leh ta a, a chhan chu ka hre lo va. Tichuan kan sorkar hlima kan zuk kalin Mizo an thahnem a, House an mamawh zia an lo sawi, a an Chief Minister Major pa hnenah ka han kal nghal a, tha deuhin min lo chhawn a, a hmun pawh a zawng nghal a, min pek fel hma deuhin a tla ta a. A hnuah mi dang an lo lal leh a, chu pawh chu ka hmu leh a, tihfel hmain a tla leh a. Tunah khuan Congress an lo kal ta a, enge an an dawn ka hre lo va; mahse nasa takin kan nawr reng a, tunah chuan hmun tha deuh chu min pe tawh a, amaherawhchu a position kan la la chiah lo niin ka hria. Chumi a nih avangin Mizoin kan mamawh si a, In kan hire a, chutah chuan a hmingin House kan nei ve a ni. Tun April thla khan a rent te pawh siam that a ni a, siam that a nihna chhan chu room rent inang vek lo a remchang lova hriatna a awm a, metropolitan cities te leh Silchar te inanga thlen man dah hi a fuh lo va, building leh facilities te pawh a inang lo va. Delhi-a House te chu 3 star hotel quality ang ve a ni a, chuvangin House room thar nei se, khawpui len dan leh facilities that dan azirin a toin a tlawm ve a ni.

Hetiang room rent fixed a nih lai hian concession tam tak siam a ni a, pensioner tan te, student tan te, accredited Journalist tan te leh pawimawh dang tan tlawm zawka thlen theih tura ruahmanna siam a ni. House-ah hian ni 15 aia tam a thlen chuan ni 15 hnu lam hi chu room rent an chawi double tur a ni bawk a, heng House hrang hranga thlen man hre duh te chu GAD-in order a chhuah tawh kha pek nilo. Tin former legislator, Flam member te tan rate hran hlak official on duty te nena inzat siam sak a ni bawk. Kolkata leh Guwahati atana atira rate siam hi sang deuh ni a hriat avangin tlema tihhniam leh deuh a ni. Ni 15 hnu lama double room rent chawi tur tih hi cancer patient, Medical Board-in a refer leh a hruaitute tan thlah dul sak ni in ni 30 thlen man pangngaia thlen phal sak a ni a, ni 30 hnu lam pawh hi extend phal sak an ni.

Tin, Mizoram House-te hi ni hnih/thum bak thlenna tura ruahman a ni lo va. Duh chen chen, a tul thleng thleng thlenna tur a ni lo va. Tin, Mizo zawng zawng hian thlen kan tum bawk a, chuvangin indaih a harsa hle a ni. Kan Liaison Officer te, kan Resident Commissioner te an mangang thei hle a. Thenkhat chu tuna kan sawi ang khan ni 15 aia

tam cham tum talh te, inthlahrung miah lo, la phunnawi zawk te, an tam mai a ni. Chuvangin, hei hi inhriatthiamna thuk tak neih a tul nghe nghe a.

Guwahati-ah khan patient te tan a harsa em mai tiin Bus kan dah thin a. Chu chu a lo tar deuh hnu khan Kolkata-ah kan sawn thla a, tuna Salt Lake-a kan neih tak kha Ballygunge lama mi kha chu zirlaite leh trailer leh patient te tan ni bik deuh sela kan ti a. Kan hun hmasa lam daihah khan official-te chu thlen loh tur kan ti a, mahse facilities nei tha tak tak te pawh kha an thleng lui tho va. Chuvangin, an thlen lohna turin Refrigerator te, A/C te kan remove tir vek a. Chutiang chuan exclusive deuhin zirlaite leh trailers ho chu an thlen theih phah ta a ni.

Tin, damlote an zangkhai nan kan ti a Guwahati-ah te, Kolkata-ah te nurse te kan dah a. Mahse, Mizo ringtute kan mak khawp a, khang kha an chhiahhlawh, anmahniin an duh duha an hruai tur emaw an ti tlat zel a, an khawngaihthlak thei khawp a ni. Kan hotute rilruah chuan House chhungah damlo mangang thutte an awm thei a, House Doctor te nei mah ila hmun hla deuhah te an awm thin avangin chen chilh se kan ti a. Mahse an duh duha hman a, an lo hman loh deuh pawha vui vai nan khan an hman zel a. Kan mentality avang hian hei hi kan dah chhunzawm zel dawn nge dawn lo ngaihtuah a ngai. Chuvangin, kan sawi tak ang khan, a hmun azir te pawhin a room rent hi a intam hleih a ngai a, a facilities te leh a that leh that loh dan te, chu chu a tlangpuiin Sorkar-in room rent a determine dan a ni.

**SPEAKER** : Ngawi rawh a neitu hi zawhbelhna.

**Pu LALRUATKIMA** : Pu Speaker, Accredited Journalist-ten harsatna an tawh thu tun hnaiah kan hre zauh zauh a. Official anga an zin khan priority pek tur an nih dan te kan hria a. Chutah chuan an harsatna hi a thlen nawn tawh lohna turin a changtu Minister zahawm tak khan hma min lak sak thei ang em tih leh Guwahati-a Mizoram House-in motor an nei lo khu damlo mangangte tan khuan kan ngaihthlak tak ang khan pek leh theih an ni ang em tih kha ka zawhbelh leh duh a ni a.

**SPEAKER** : Pu Lalrobiaka sawm nghal ila.

**Pu LALROBIAKA** : Pu Speaker ka lawm e. Tuna kan House Leader-in a sawi ang khan sorkar hi nu leh pa tak tak a ni lo thei lova. Chuvangchuan, Mumbai te pawh kha harsa takin kan han buatsaih a; tin Bangalore te pawh kha kan han chan der te kha a ni a. Chutih lai chuan official leh engemaw han kal hi zing em em lo mahse Mumbai khu a pawimawh ve khawp mai a. Kum 2010 khan Committee angin kan zuk kal tawh a, a hmunte pawh kan zuk en a, Navi Mumbai, House thar sakna tur. Mumbaia House thar sak U.S Roofs-te nena agreement sign tawh kha tunah hian eng dinhmunah nge a awm tak tih ka zawt e.

**SPEAKER** : Chief Minister chhang turin sawm ila.

**Pu LAL THANHAWLA, CHIEF MINISTER** : Pu Speaker, zawhna neitu Member zahawm tak rawn zawhna kha sum neih ang tein kan han duhsak thin a. Tin, duhsak nuam lo deuh te hi an awm a, tam tak chu duhsak an nuam lo khawp mai. A enkawltu kan L.O. te leh kan R.C. te tan pawh lawmawm lo deuh deuh a awm thin a. Mahse, damlo na na na chu duhsak chhunzawm dan kan hotuten an ngaihtuah a, duhsak pawh an duh a ni. A theih ang chin chinah chuan kan duhsak chhunzawm zel ang.

Tin, intihlal viau te, intih milen viau te hian vuina tur a tam duh khawp mai Pu Speaker. Kei hi P.C. hun laiin Chief Minister a lo thlen avangin ka rooma ka puanthuahte hi ka len hlanin an lo paih chhuak vek a, tichuan thlenna ka neilo tawh a, ka vui chuang lova. MNF an lo sorkar a, Chief Minister-in ka thlen duhna ber Teen Murti House-a thlen a han phal lo phawt a, tichuan Chanakyapuri-ah L.O. ka lo dah te an nih avangin VIP Room No. 2 min pe ve a, tahchuan kan nupa kan awm a. Finance Minister a lo thlen dawn avangin chhuak turin min rawn ti a, Speaker a thleng ve a. Mahselangin, Finance Commission Member-te ni ve bawk a, tiang ringawt tur hi a ni thei bik dawn em ni ka ti a. Mahse, Finance Minister a lo thleng tep tawh, i chhuah a ngai min rawn ti a, zan dar 9:30 ah kan chhuak ta a ni. Ka la vui chuanglo. Chuvangin, intih milen viau te, intihtheih viau te hian vuina tur hi a tam duh khawp a. Kan chung a thleng apiang hi chhel takin tuar mai ila vuina tur hi a vang duh khawp mai Pu Speaker.

Tin, Damdawi Inah hian Physical disable te, upate hi chu a tul ang anga enkawl chhoh zel an ni a. Anmahni pual damdawi in te pawh siam tum mek zel a ni.

Tin, Mumbai kha an sa a, an sa mek zel turah ka ngai Pu Speaker.

**SPEAKER** : Zawnha No. 115-naah kan kal thei e. A neitu Member zahawm tak Pu Lalruatkima, ani hi an wawinah a zawt teuh mai dawn a ni.

**Pu LALRUATKIMA** : Pu Speaker, ka lawm e. Ka Starred Question No. 115-na, General Administration Department changtu Minister zahawm tak chhan atan :-

- a) Sialkal tlangdung Development Board/Council hi engtikah nge din a nih ?
- b) Tute nge Board/Council a hruaitute ?
- c) A din tirh atangin vawi engzat nge an thutkhawm tawh ?
- d) An hmalakna engte nge ?
- e) A din tirh atangin sum engzat nge ruahman sak an nih ? A year wise-in engzat nge ?

**SPEAKER** : Chhang turin a changtu Minister zahawm tak Pu Lal Thanhawla sawm ila.

**Pu LAL THANHAWLA, CHIEF MINISTER** : Pu Speaker, Sialkal tlangdung Development Board hi Ni 24.2.2012-ah kan din a. Chairman chu khimi Biala MLA apiang kha an ni tur a ni a. Tin, Vice- Chairman chu khami area chhung khaw hrang hranga V/C te by rotation-in, a inchhawkin Vice Chairman an ni tur a ni a. Tin, Secretary te erawh chu SDO (Civil), Ngopa a ni ang a. Tin, Joint Secretary an awm ang a, chu chu BDO, Ngopa a ni ang. Member-te chu khami biala V/C Member zawng zawng kha in respect of party affiliation an ni ang. Tin, kum tin vawi khat an thu a, tunah hian kum hnih, vawihnih an thu tawh a ni.

Sialkal tlangdunga Development Works chi hrang hrang Step, Zun in, Lei, Retaining Wall siamin an thawk thin a. A din tirh atangin sum hetiang hian pek an ni. Kum 2012-2013 ah nuai 50, 2013-2014-ah nuai 50 a ni a. Helai bialah hi chuan bialtu MLA hian MLA Fund nuai 30 bakah nuai 50 a neih belh a ni ber e.

**SPEAKER** : Pu Lalruatkima'n han zawhbelh se.

**Pu LALRUATKIMA** : Pu Speaker, hemi ah hian Acts leh Rules kha siam sak an la nilovin ka hria a, khatah khan siam sak theih an ni ang em? tih leh sum ruahman sak hi population base nge eng criteria nge an hman tih kha ka'n zawt belh a ni e.

**SPEAKER** : Le, chhang turin Chief Minister sawm ila.

**Pu LAL THANHAWLA, CHIEF MINISTER** : Pu Speaker, eng criteria mah kan hmang lo a kan neih ang chinah kan ti ve tawp mai a ni sum nuai 50 hi. Kan neih tam deuh leh kan hausak hunah chuan pun pawh ala pung ve mahna. Pu Speaker, engnge ni zawhna dang kha. Tin, Act emaw, Rules emaw chuti taka zuk tih sorkar bur rih loh hi kan duh Pu Speaker.

**SPEAKER** : Le, zawhbelhna a awm ta lo. Starred question No. 116-na zawt turin Pu K. Sangthuama ilo sawm ang.

**Pu K. SANGTHUAMA** : Pu Speaker, ka lawm e. Ka starred question no. 116-na School Education Minister zahawm tak chhan atan :- Adhoc Aided High School leh RMSA inthuahna School-te hi an harsatna Sorkar-in a hriatpui em? tih hi ka zawhna a ni e.

**SPEAKER** : Awle, a Department neitu Minister zahawm tak Pu H. Rohluna ilo sawm ang.

**Pu H. ROHLUNA, MINISTER** : Pu Speaker, Aizawl West-I bialtu zahawm tak Pu K. Sangthuama zawhna chhanna chu, Adhoc Aided High School leh RMSA inthuahna School-te harsatna hi sorkarin a hriatpui a, chinfel dan tur ngaihtuahin hmalak mek a ni.

**SPEAKER** : Zawhbelhna a awm lova, a lawmawm e. Zawhna no. 117-naah kan kal thei a, a zawhna neitu Dr. K. Beichhua, Member zahawm tak ilo sawm ang.

**Dr. K. BEICHHUA** : Pu Speaker, ka lawm e. GAD Minister zahawm tak hnena ka zawhna chu Tuipang Sub-Divisional-a hlan kai tawh, tun thlenga Civil SDO dah loh hi enge a chhan? tih ka zawt e.

**SPEAKER** : Awle, a chhang turin Chief Minister zahawm tak ilo sawm ang.

**Pu LAL THANHAWLA, CHIEF MINISTER** : Pu Speaker, Sub-Division tam bera SDO (Civil) kan dah theih lohna chhan hi officer indaih loh vang a ni a. Chuvangin, tuna Tuipang BDO-in Civil SDO a kawp ang hian hmun dang dangah pawh kawp tir an ni.

**SPEAKER** : Zawhbelhna Pu K. Beichhua.

**Dr. K. BEICHHUA** : Pu Speaker, Sub – Divisional hmun kan hmu nual a, Khawzawl tih te, Saitual, Vairengte, Kawnpui, Sakawrdai, N.Vanlaiphai, Hnahtial, West Phaileng, Kawrthah, Ngopa te leh hmun dang dangah te pawh keimahni mit ngei te pawn kan hmu ngei a. Hmanniah pawh Champhaiah ka va kal a Saitual leh Khawzawlah te pawh SDO an lo nei ve ve a, an lawmpui awm ka ti a, tin rual awh a na a ni. Chuvang chuan nimin lama kan sawi tawh ang khan Speaker bial a lo ni ve deuh bawh Tuipang tunhma lam atanga an lo neilo kha doctor pakhatmah an awm bawh silo lai kha ka vei riau mai a. Khatih lai khan engati nge SDO kan dah hote hi Sub-Divisional pawimawh deuh bik ami an nih ? kan dah lohna hi a pawimawh lo bik deuh em ni? a pawimawh deuh te kha enge kan dahna chhan? Leh a pawimawh lo zawka kan ngaih kan dah loh te kha engati nge a pawimawh loa kan ngaihna chhan kha ka zawt e.

**SPEAKER** : A chhang turin Chief Minister zahawm tak sawm ila.

**Pu LAL THANHAWLA, CHIEF MINISTER** : Pu Speaker, kawp remchang leh remchang lo hi a awm ve a, an place of posting atanga han kawp mai remchang indaih lo em em karah khan, thenkhat chu han kawp mai remchang lo te an awm a. Entirman, Serchhip District-ah khian North Vanlaiphai hi Serchhip atangin an kawp thin a, tunah pawh hian an la ni mai thei, a remchang lo khawp a, chuvangin a hnai ami han kawp mai theih chi kha kawp tir an ni tlangpui a ni. Chu chu a kalphung a ni a.

Member-ten an hriat ve hrim hrim atan kan indaih loh dan chu hetiang hi a ni. SDO Civil hi MCS Officer Senior Grade te tan a ni a, an duty post chu chutiang mi te tan a ni. Senior Grade te hian duty post 65 an neih laiin Senior Grade Officer te hi tunah hian 52 chauh kan nei a. Tuipang ang tho hian Sangau SDO Civil pawh tunah hian

Sangau BDO in a kawp a, a hmun awm an nih avangin a remchang bik a, hmun dang atanga karkik taka va tih a tul lo a ni. Tin, Junior Grade atanga rawn kaisang tur qualifying service nei an awm loh avangin MCS Senior Grade-ah hian indaih lohna a nasa bik a, chuvangin heng SDO Civil post te hi regular a fill up theih an ni lova.

Tin, SDO Civil post-ah hian hna a hautak lutuk lo bawk a, chuvangin Officer dang remchang-te hi kawp tir an ni tlangpui a ni. Chutiang chuan sorkar-in a hna ripna deuh leh harsa bikah a theih ang chin chinah an dah a, han kawp remchang bik riau khawkhat a BDO Headquarter lo ni ve tho te an awm a, chungte chu officer indaih lohna avangin kawp tir thin an ni.

**SPEAKER** : Tuipang chu zawhbelhna tam tak awm se ka'n tih tehlu nen, a awm lo hlauh mai a, engpawh ni se, starred question No. 118-naah kan kal ang a. A zawhna neitu Member zahawm tak Pu Lalruatkima ilo sawm ang.

**Pu LALRUATKIMA** : Pu Speaker, ka lawm e. Ka Starred Question No. 118-na School Education Minister zahawm tak chhan atan :

- a) Zirtirtu hi aikal lak phal an ni em?
- b) Zirtirtu aikal la engzatnge awm mek?
- c) Engvangin nge aikal an lak?

**SPEAKER** : A chhang turin Minister zahawm tak Pu H. Rohluna ilo sawm ang.

**Pu H. ROHLUNA, MINISTER** : Pu Speaker, member zahawm tak Pu Lalruatkima, Aizawl West-II bialtu zawhna chhanna chu-

- a) Dan ang chuan zirtirtute hi aikal lak phal an ni chiah lo tih a ni a.
- b) Zirtirtu aikal la mi 545 vel an awm mek ni a hriat a ni.
- c) RTE Act leh NCTE Norms (GOI) angin kum 2015 atang chuan zirtirtu trained lovin class lak tawh loh tur a nih avangin train lo zawng zawngte ban an nih ai chuan thapui chhuahin a tam thei ang ber train tir mek an ni a. An thawhna School ten an tawrh loh nan substitute teacher an training chung an an la mai a ni. Ka lawm e.



**SPEAKER** : Zawhbelhna Pu Lalruatkima.

**Pu LALRUATKIMA** : Pu Speaker, ka lawm e. Kan Minister zahawm takin minrawn chhang a, High School zirtirtu contract a rawih mek mi engemaw zat B.Ed training turin tunah hian an ti a. An hlawh hi singkhat leh sangnga bawr vel a ni a, chuta tang chuan aikal la turin nupui fanau chawm te an nih avangin an training chhungin an hlawh beitham tak atangin aikal la turin verbal in an hrilh a, aikal lakna tur rate kha an hotuten a thenah sangthum te, sangnga te inang lo thluah khan an fix sak a, school-ah khan an va attach chuang si lo a, office lamah khan an lo pawt leh si a, an indaih lohna kha a phuhruk chuang reng reng lo mai a, engnge a awm zia tih ka zawt a.

Tin, chumi bakah chuan Pu Speaker, SSA contract a rawih, hlawh sangsarih chho bawr vel la kha tunah hian DIET ah khian training turin an ti bawk a kan ngaihthlak tak ang khan. An han training hlan khan aikal la turin an ti leh bawk si a, hlawh tlem tawh nakalai khan an khawngaih thlak em em a, engtin nge ruahmanna thar a siam theih em? A bik takin SSA leh High School teacher contract a rawih te aikal lakna kha kan siamthat sak theih ang em tih ka zawhbelhna a ni e.

**SPEAKER** : Minister zahawm tak zawhbelhna chhang turin ilo sawm ang.

**Pu H. ROHLUNA, MINISTER** : Pu Speaker, member zahawm tak a zawhna neitu zawhbelhna kha nia, harsatna hi Department chhungah pawh kan tawng khawp a. Amaherawhchu, RTE Act leh NCTE Norms anga training vek tur a nih avangin training lo chu 2015 atang khan class lak phal tawh loh tur tih a ni a. He thu hi 2005 atang daiha lo awm tawh a ni a, mahse rin aiin lo tihfel mai a har a niang kuminah hei 2015 a thlen dawn tep avangin loh theih lohvin training turin kan intir a ni a. Tin, training lo kha chu class an lak theih loh miao chuan ban emaw kha an ngai dawn a. An tawrh ai chuan school-in a tawrh kan hlau bawk si a, chuvangin inremsiam dan a awm thei mai lawm ni tih a Department pawhin kan zuk hriatpui em em pawh ni chuang lovin a School Managing Committee, SMC te nen te, VEC te nen te sawi tlangin chutiang chuan ruahmanna an lo siam a, chu chu an kalpui dan a ni a.

Tin, B.Ed train tur High School contract zirtirtu tih te pawh an training loh kha chuan an chawlh emaw a ngai dawn a. Alternative arrangement han siam turin sorkarin aiawh han laksak turin sum kan nei bawk si lova, an training a an thawh zel kha kan duhsak bawk si a. Chutiang chuan he ruahmanna hi siam mai a ni a. Tin, SSA contract DIET a training te pawh, SSA

contract han tih hi ₹ 7000 hlawh hi chu ka hre chiah lova, zirtirtu pangngai deuh hi chu sing chuang hlawh deuh vek an ni a. Anni pawh an thawh zel theihna atan induhsak tawwna a thleng a ni deuh berin ka hria Pu Speaker.

**SPEAKER** : Aw, Pu Lalruatkima.

**Pu LALRUATKIMA** : Zirtirtute kha term hmasa session-ah khan contract-a High School zirtirtute kha regularized tum an ni a, hma lak mek a ni e tiin kan Education Minister kalta khan House-ah a sawi a, chu chu enge kan thlen chin tih ka zawt a. A list kha ka nei a, kan sawihona proceedings te pawh, mahse ka dahna ka hmu mai lova, min lo hrethiam ula Pu Speaker. High school contract teacher te Regularisation Scheme hnuai ang khan engtikah nge regularise an nih dawn tih leh zawhna dang ka'n neih belh leh chu zirtirtu transfer chungchangah hian bialtu MLA rawn tur an ti a, a phurrit thlak khawp mai a, a hahthlak dawn viau mai ka ti a. Amaherawhchu, siai taka tih turin min rawn chuang lem hlei lova. Keini opposition ho hi chu min rawn leh chuang lo a ni. Rawn tur tih kha opposition MLA te hi MLA ah min ngai ve ta lo mai nge kan Minister hian. Ka bialah pawh khan zirtirtu an transfer teuh a, min rawn lova, ka thawhpui member zahawm tak takte rawn an ni ngai chuang bawk si lova. Chanchinbuah hmai phihfai nan mai nge kha thil kha kan tih ka zawt tel a ni e.

**SPEAKER** : Minister zahawm tak chhang turin sawm ang.

**Pu H. ROHLUNA, MINISTER** : Pu Speaker, member zahawm tak zawhbelh lehna kha High School contract teacher ho regularisation kha chu a Department lam atang chuan kum 5 an service tawh chuan tum reng a ni a. Sum harsatna avang leh chhan hrang hrang avangin duh angin a kal chak theih loh mai a ni.

Tin, Zirtirtute transfer and posting chungchanga MLA rawn han tih hi ni e, Pu Speaker, MLA te hriatpuina kan duh kherna chhan chu a bik takin thingtlang lamah a ni a, khawpuiah hi chuan a tlangpuithuin zirtirtu Primary level atanga Higher Secondary School thlengin kan indaih tlangpui a. A then phei chu teacher-pupil ratio han en phei chuan an chuang mah mah zawk a ni. Thingtlang lam hi kan rilru takah chuan kan tinzawn deuh a ni. Thingtlang lama awmte hi kan hrise lo ta thut nge ka hre lova, tawngkam mawi lo ni lo se, Aizawlah chhuanlam chi hrang hrang avang te, damlohna avang te, chhungkaw harsatna avangtein mahni school-ah hian zirtirtu an indaih leh daih loh lam pawh ngaihtuah lem lovin Aizawla awm hi a tlangpuithuin kan kherh deuh vek a. Chuvangin, helaiah Department lam atangin duh angin record te mumal taka lo vawn te

pawh a lo harsa a, bialtu MLA te chuan mahni Biala school hi chu a tlangpui thuin kan hrechiang deuh vek a. Chu chu a nih avangin bialtu MLA te hriatpuina hi awm sela.

Tin, zirtirtu transfer and posting mai bakah zirna kawnga harsatna kan neih te hi bialtu MLA te hian min hriatpui sela nasa takin zirna kawngah pawh hma kan sawn phah ang a. A sorkar level va thleng chiah lo pawhin bialtu MLA te nen problem tam tak solve theih awm turah kan ngai a. Bialtu MLA ten zirna kawngah hian a hma zawng aia rilru min pekpu theihna turin he thil hi kan han ti a ni. A tangkai khawp pawhin kan hria a, a zawngchhangthlak hle pawhin kan hria a ni, Pu Speaker.

**SPEAKER** : Awle, 119-naah kan kal thei a, a zawt turin Member zahawm tak Pu K. Sangthuama i lo sawm ang.

**Pu K. SANGTHUAMA** : Pu Speaker, School Education Minister zahawm tak chhan atan –

- (a) Sorkar High School-ah Science zirtirtu awm lohna a awm em?
- (b) Awm ta se high school hming min hrilh thei em? tih hi ka zawhna a ni e.

**SPEAKER** : Minister zahawm tak chhang turin sawm ang.

**Pu H. ROHLUNA, MINISTER** : Pu Speaker, Aizawl West-I bialtu member zahawm tak Pu K. Sangthuama zawhna :-

- (a) Sorkar High School-ah Science zirtirtu awm lohna a awm em tih chhanna chu-High School Recruitment Rules hman mekah hian subject-wise zirtirtu chungchang a hrangin thliar a ni lova. Chuvangin, Science zirtirtu a hranin lak a awm hriat a ni lo tih a ni.
- (b) Awm ta se High School hming min hrilh thei em tih chu Science zirtirtu a hrana lak an nih loh avangin sawi mai theih a ni lo tih a ni.

**SPEAKER** : Zawhbelhna, Pu K. Sangthuama.

**Pu K. SANGTHUAMA** : Pu Speaker, Sairang High School-ah khuanin Science zirtirtu kumtir lam khan Higher secondary-ah hna a hmu a, a kalsan a, tun thleng hian Science zirtirtu mumal a awm lova. Chu chu khawngaihkan School Education Minister zahawm tak hian tunkum

chhunga a dah vut vut thei lo a nih pawhin kum thar lamah te min dahsak thei ang em tih kha ka zawhna a ni e.

**SPEAKER** : Chhang thei em?

**Pu H. ROHLUNA, MINISTER** : Pu Speaker, Science zirtirtu hi kan indaih lo khawp a, Science mai ni lovin Mathematics zirtirtu tur pawh hi kan indaih lo em em a. A chhan chu Recruitment Rules-ah hian general teacher anga lak vek an ni a, subject bik thliar a awm lova. Chuvangin, a kalphung pawh siam that kan duh a, Department-in hma kan la mek a, Recruitment Rules-ah hian Science leh Mathematics hi a bika lak theih a nih loh pawhin subject dang han la tur pawhin subject wise hian Recruitment Rules hi siam tha ta ila. Tunah hian RMSA angah chuan chutiang chuan lak a ni a, Higher Secondary-ah te pawh chutiang chuan lak a ni a. Tunah hian hetiang zawnga kalpui theih dan kawng kan zawng a ni. A nih loh chuan Science zirtirtu bik tur emaw mathematics zirtirtu bik tur emaw a hrana lak a awm loh avang hian tunah hian high school tam takin harsatna an tawk tih kan hria a. Member zahawm takin min han zawhna pawh kan indaih dan azirin chutiang zirtir thei tuna zirtirtu thawk mekah lo enzui kan tum dawn nia.

**SPEAKER** : Pu Lalrinawma hian ala zawt hman em ang chu maw.

**Er. LALRINAWMA** : Pu Speaker ka lawm e, Power and Electricity Department changtu Minister zahawm tak hnena ka Starred Question No. 120-na chu -

- a) RGGVY Scheme hnuaiah hian BPL chhungkua engzatnge Free Electrification pek tum anih?
- b) Engzatnge pek an nih tawh?
- c) Connection pakhatatah engzatnge sen ral a nih tih ka zawt e.

**SPEAKER** : Chhang turin Chief Minister zahawm tak sawm ila, minute tlem ala awm e.

**Pu LAL THANHAWLA, CHIEF MINISTER** : Member zahawm tak Pu Lalrinawma zawhna chhanna chu -

- a) RGGVY Scheme hnuaiah hian chhungkua 26,210 (singhnih sangruk zahnih sawm) BPL Free Service Connection pek tum an ni.
- b) Chhungkaw 16,264 (Singkhat sangruk zahnih sawmruk pali) pek an ni tawh.

c) Connection pakhtah hian ₹ 2,200 (Sanghnih zahnih) zel sen ral a ni.

**SPEAKER** : Awle, zawhna hun a lo tawp ta a, kan Deputy Speaker zahawm tak Pu Lalrinawma hi Official thil pawimawh tak a awm avangin House chawlh a dil a, kan phal a ni tih House ka hriattir a. Tin Pu H.Zothangliana vawiin atan chawlh a dil bawk a, ani pawh kan phal a ni tih House ka hriattir e.

Tunah chuan Laying of papers kan la ang a, Pu R.Lalzirliana, Minister zahawm tak “The Mizoram Liquor (Prohibition and Control) Rules, 2014” lay turin i sawm ang.

**Pu R. LALZIRLIANA, MINISTER** : Pu Speaker, ka lawm e, he House zahawm takah hian “The Mizoram Liquor (Prohibition and Control) Rules, 2014” ka lay e.

**SPEAKER** : A copy kha sem ni se. Tunah hian Pu H.Rohluna, Minister zahawm takin ‘Twenty First Annual Report (01.04.2010-31.03.2011) of Mizoram Food & Allied Industries Corporation Ltd.’ hi House dawhkana lay turin i sawm ang.

**Pu H. ROHLUNA, MINISTER** : Pu Speaker, i remtihna leh he House phalnain “Twenty First Annual Report (01.04.2010-31.03.2011) of Mizoram Food & Allied Industries Corporation Ltd”. chu ka rawn lay e.

**SPEAKER** : A copy kha member zahawm takte hnenah sem ni se. Tunah chuan Financial Business-ah kan kal leh tawh ang a, Discussion and voting on demands-ah kan kal ang a. Vawiin chu Minister pahnih chanvo kan sawiho dawn a. Kan Home Minister zahawm tak Pu R. Lalzirliana leh Pu H.Rohluna te demand hi kan la kawp leh mai ang a, a pahnih hian. Amaherawhchu, a pass erawh kha chu a hrangin kan pass leh ang a, tunah hian kan Home Minister zahawm tak Pu R.Lalzirliana a Demand hrang hrangte House-ah rawn move sela.

**Pu R. LALZIRLIANA, MINISTER** : Mr Speaker Sir, on the recommendation of the Governor of Mizoram and with your permission Sir, I move the Demand No, 7,16,31 and 38 for rupees 115028.53 lakhs only for meeting expenses during 2014-15 in respect of the following Departments :-

Demand No. 7 Excise and Narcotics Department	- ₹ 2539.36 lakh
Demand No. 16 Home Department	- ₹ 56389.29 lakh

Demand No. 31 Agriculture	- ₹ 19029.65 lakh
Demand No. 38 Rural Development Department	- ₹ <u>37070.23</u> lakh
<b>TOTAL</b>	<b>- ₹ 115028.53 lakh only</b>

Thank you.

**SPEAKER** : Tunah hian Pu H.Rohluna a Demand No. 20,40 leh 44 te House ah rawn move turin i lo sawm ang.

**Pu H. ROHLUNA, MINISTER** : Mr Speaker Sir, on the recommendation of the Governor of Mizoram and with your permission Sir, I move the Demand No. 20,40 and 44 for ₹ 94940.82 lakhs for meeting expenses during 2014-15 in respect of the following departments :

Demand No. 20 School Education	- ₹ 83866.40
Demand No. 40 Industries	- ₹ 10113.70
Demand No. 44 Trade & Commerce	- ₹ <u>960.72</u>
<b>TOTAL</b>	<b>- ₹ 94940.82</b>

Thank you Sir

**SPEAKER** : Sawiho kan tan leh mai ang a, a pahnih hian kan la kawp leh mai ang a. Member-te minute 10 inpe leh mai ang aw. Tunge sawi hmasa ang.

**Pu K. SANGTHUAMA** : Vawiin chu thil rawtna ang deuhin hei, i veilama thu leh i dinglama thu hi kan intam hleih khawp mai a, kan thusawi danah hian hetia a hnunung inchuhlo hian khawngaihin keini veilama mite sawi zawh kher nghaklo hian mahni chhia leh tha hriatna khan ngaihtuahna nei ta ila tih kha ka'n rawt duh deuh hlek a. Keini tlemte paruk lek hian kan han sawi zawh a chumi hnu a sawi han chuh chauh mai kha mahni chhia leh tha hriatna kha min han hman sak deuh ula tih kha ka sawi duh a.

Pakhat lehah chuan Dan chu a ni chiah chuang lova mahse tunhma atanga House-in kan lo practice dan tlangpuiah House Leader hian a sawi hnunung bera, chumi hma chuan Opposition Leader-te emaw, Opposition Group Leader-te emaw a tlangpuiin tunhma atanga sawidan kha a ni tlangpui a. Khatiang ang deuh khan khawngaihin kan House hi kal chho thei ila chuan tih kha rawtna Pu Speaker, ka'n siam a ni e.

**SPEAKER** : Awle, Pu T.T. Zothansanga.

**Pu T.T. ZOTHANSANGA** : Pu Speaker, ka lawm e. Kan Minister zahawm tak Pu R. Lalzirliana Demand atang hian ka rawn sawi hmasa duh a. Demand No. 31-na Agriculture chungchangah hian min lo hriatsak sela ka duh chu, kan term hmasa khan tractor leh power tiller kha kan sem teuh mai a, Champhai lamah khian kan hlawkpui riau mai a, hei hi tam zawka rawn tih leh theih ni se. A chhan chu, ramin hma a sawn a, ranvulh a rem tawh si lova, kan ran tam takin tlatna hmun an nei lo va, an lo nei a nih pawhin miin an lo man a, court-ah te an inkhing a, chumi avang chuan Champhaia kan leilet tam tak enkawl nan khian ran kan nei lo va, power tiller leh tractor hi kan mamawh takzet a ni tih kha min chhinchhiah sak sela.

Nikum lawk khan Vapar te, Hnahlan bialah te, Ngur-ah te khian ran 100 chuang an pul a ni, kan Agriculture Minister pawh hi ka hrilh a, a theih ang angin min tanpui a, kan lawm khawp a. Kan dam anga Pathian zarah, hetia kan sorkar chhoh tluan hi chuan tractor leh power tiller sem ang zawng hian hma han la se thain ka hria a. Champhai lam khi kan vanneihna riau chu vaiho kutah kan dah ve lo a ni. Keimahni Mizoten kan enkawl a, a tharchhuah zawng zawng vairam lama kir ve miah lovin khilamah khian kan capture mai thin a, chuvang chuan min lo hriatpui se ka duh khawp mai a. Tractor leh power tiller-ah khan kan duh khawp lohna a nasa hle a ni tih ka sawi duh a ni.

Tin, Pu Speaker, Home Department-ah khan ka sawi duh chu, Champhai-ah khian police hi kan indaihlo thin khawp mai a, ramri hnaih lam te a ni a. Kan indaihlohna te hre thin mah ila ngaih pawimawh lehzual dan kawng hi chu awm thei se kan duh a. Chutih rualin a building te khi a hlui tawh hlawm deuh hlek a, khingte khi tihdan a awm chuan kan lawm khawp ang. Chutih ruala ka sawi duh chu, Parliamentary Secretary-in hotuten min han dah ve a, Minister quarter saw kan luah a, duty-te chu kan nei hran lem lova, amaherawhchu chhungkuua awm loh leh han kalbo duak changte hi kan nei ve si a, Pu K.S. Thanga quarter leh Pu Mahima quarter leh ka luah quarter Shivaji Tillah ah khian CC Tv te hi chu dah theih hram dan a awm lawm ni. Home atangin duty kan indah theih loh pawhin CC Tv hi chu dah theih hram se a lawmawm dawn hle mai ka'n ti a.

Rural Development-ah khan IAY hi kumin atangin a dawngtu tur number kha Central lam atangin a tlahniam nasa mai a. Khami a nih chuan IAY hi khaw khata in khat lek lek in kan dawn thin pawh kha a theih dawn tawh loh tihna a ni a. Chuvang chuan kum danga kan lo tih thin ang remchang a awm thei hlauh a nih chuan rangva sem lam kha min uar

sak thei hram se kan duh a ni. Kan bialah te chuan Serthlum te leh eng eng emaw an han hralh a, pheh hnih khat leina an neih chuan an bazar pahin an chhipchhuan haw zel a, khatianga inchung tuak nasa kha kan ni a. Tiau hrut te kan lo ni bawk nen, rangva lamah khan kan duhthawh deuh hlek a ni.

Tin, Pu Speaker, Excise chungchangah khan winery leh grape awmna hmun kan ni a, kan mite khi an taima em em a ni Hnahlan-ah in kal a nih chuan chhunah chuan thalai hmuh tur an awm mang lo vang, an feh zo duak zel a ni. Grape-ah kan in concentrate nasa a, tunah hian MLPC hmang turin ruahmanna kan han nei chho ta a, hemi kan hman chhohah hian grape hi a hnawng ang tih kan hlau khawp mai. Zawlaidi leh Zo-Wine-ah te hian alcohol content-te min tihsan sak ve mai dawn lawm ni ? Min tihsan sak loh chuan keini grape lama inngat tlat te khian harsatna kan tawk dawn a, khimi min humhim sak tur khian a alcohol content te pawh hi hemi rules a awm rual hianin min rawn ngaihtuah sak bik kha thain kan hria a. Kan tihsan loh chuan loneitu thawkrimte kha kan dawng hle dawn a ni tih kha ka'n sawi duh a. Horticulture-in ropui taka hma an lak tawh grape-ah khian nasa taka kan mite an phur leh theih nan, an hralhchhuah leh theihna tur kawng min zawnsakna ni pahfawmin a alcohol content te kha min rawn revise sak sela tiin kan sawi duh a.

Tin, Trade & Commerce chungchangah khan ka sawi leh duh chu Champhai Market pui ber bulah khian mi pakhatin tunah in a sa a, bazaar tana hnawksak khawpin leivung a hnawh khawm teuh mai a, kan Marketing Officer pawhin remove turin a ti a, a ti duh miah lo mai a, kha kha kan Minister khan min lo hriat sak sela, khi khi mipui tan a hnawng ngawih ngawih a, khimi remove tur khian hma min lak sak se ka duh a ni.

Tin, Trade & Commerce-ah hian BSNL hian tunah Prime Minister Flagship Programme angin BSNL, Champhai Zokhawthar Microwave link an siam dawn a, chutah chuan a hmun hma vel an mamawh khawp mai a. Khaw chhak lam MLA ka nih vang te pawh a ni ang a, lehkha min rawn pe a, chutah chuan Trade & Commerce-in kan hmun leh hma chhungah khian 40 mt a han phun ve theih mai kha a ni a, kha kha kan minister hian min lo chhinchhiah sak sela. Prime Minister Programme inbiakpawhna tha tak neihna tur a nih avang hian khilai hmun remchang laiah khian hmun min pe thei se kan duh a, min lo chhinchhiah sak sela. Melbuk-ah te leh hmun dang dangah te chuan anmahniin an lo sual chhuak tawh a, khilai hmun a harsat em avang khian hei hi min lo hriat sak se, microwave tower dahna tur remchangah min lo ngaihtuah se kan ti a.



Tin, Bazar Hut kha nimina a sawinaah khan Hnahlan leh Zote-ah te, Saikumphai-ah te awm tur anga a han sawi kha tlemin min hrilhfiah sak thei se ka duh bawk a. Engtika hmalak tur nge tih leh engang chin chiah nge hma lak tur tih kan hre duh bawk a ni.

Tin, Zokhawthar Land Custom Station hawn hi a tlai zel mai a, nikum hmasa atang khan hawn theih a ni, central nen kan inbe rem thei rih lo va, delay a ngai a ni tih hi a ni reng mai a. Heti a nih rau rau chuan khilalah khian ka hawn hmain Melbuk ram te pawh khi a develop leh theih lawm ni tih kha ka'n zawt duh a. A chhan chu khilalah khian Trade & Commerce Centre atan in tam tak an sa tawh a, a in te khi a thing thep thuap a, luah mang loh khian a awm si a, khimi han tuaihnum vel khi a tha ka ti a. Chubakah National Highway atan Zokhawthar kawng khi kum hnih vel chung laih a ni dawn bawk si a, khami laih leh develop kha a inkairual thei mai awm mang e tih kha kan sawi bawk a ni.

Tin, Demand No. 20-na. Hei, zirtirtu kan indaihlo khawp mai a, chutih lai karah chuan advertisement te kan han chhuah thin a. A dik tak chuan advertisement kan han chhuah a, fair taka kan tih hian thingtlang mite tan chuan a fair lo a ni. Aizawl ami te, Shillong ami te, Delhi ami te leh Vaikhawtlang ami te, Farkawn ami te exam thuhmun vek kan tih hian thingtlang hian kan chang ve thei lo reng reng. Chuvangin, kan Education Minister hmasain mark 10 vel min dah that sak ang chite kha a tha ka ti khawp mai a, khati chung chang khan dik takin khawpuia lehkha zirte hi chu kan pha ngailo a ni. Hetiang hian kan ti chho zel dawn a nih chuan engtin emaw ngaihtuah thain ka hria. Hetiang a nih lem loh pawhin special trainer ₹ 3000/4000 hlawh ang chi kha kei chuan uar thain ka hria a. Khatiang a nih khan khawpui a miten an rawn dil ve peih lo va, a khuaa mite a thiam ve tho khan an thawk an thawk mai a, chu chu keini tan chuan a hlu zawk a ni.

Thingtlang atanga khawpuia transfer an dil ve tawh lo va, an khuaah thahnemngai takin, a neitu thinlung puin hna an thawk thin a. Chuvang chuan special trainer kan tih ang chi kha an hlawh a lo tam lo bawk nen, SSA zirtirtu pakhat kan lakin ₹ 25,000-te an hlawh lain anni chuan ₹ 4000 in an khaw buzawlah lungawi takin an thawk a ni. Tichuan, zirtirtu pangngaiin ₹ 25000/28000-te an lo hlawh a, khatiang kha 5/6 velin an thawk thei daih tihna a nih chu, chu chuan nasa takin min solve ang tih ka ring a. Train kher pawh nilo mahse khatiang ang zirtirtuten an zirtir kha an khaw mipui mil hi chu a ni ve hrim hrim a ni tih kha ka'n sawi duh a ni.

Vawiin hian sawi tur tam tak a awm a, Pu Speaker, ka sawi leh duh chu SSA leh RMSA ang chite pawh a ni tho a, nimina Finance Minister-in thu a sawi laia ka sawi kha kan Project Director te leh midang dang motor entitlement te pawh a ni maithei. Anmahnin motor an lei a, kum khatah ₹ 2,50,000 in an chhawr tawp a, a then chuan thlakhatah ₹ 30,000 ten an chhawr a chuti anih chuan ₹ 3,60,000 a lo ni a, anmahni motor ni bawk si, hire ni bawk si, khatiang chi kha sum renchemna kawngah kan Finance Minister pawh khan min lo chhinchhiah sak tawh thoin ka hria a, Education Department kha ngun deuha a lo enzui turin ka'n sawi duh a. A tlangpui thuin a demand No. leh a pawisa te kha ka rawn sawi lova, amaherawhchu ka pawm a ni. Ka lawm e.

**SPEAKER** : Pu K. Sangthuama.

**Pu K. SANGTHUAMA** : Pu Speaker, ka lawm e. Vawiinah hian Minister pahnih chanpual kan sawi dawn a ni a, a hmasain Demand No. 7-na Excise & Narcotics Department kha tawitein han sawi ta ila. Kan budget-ah hian cheng nuai 2539.36 a ni a, hetah hian salary leh wages-ah hian cheng nuai 2336.19 a ni a, a la bang zawng chu cheng nuai 203.17 a ni ta a, chumi bakah medical treatment te, other charges han tihah khan cheng nuai 144 a awm a, chumi bakah chuan nuai 59 chiah hi a la bang a ni a. Hetia han en hi chuan kan budget-ah hian a tam viau nain hlawh hi a tam lo thei lovin ka hria a. A bak hna han thawh lehna tur tak tak hi a awm lova. Excise Department hi an pawimawh hle mai a tunhnuah chuan ngaihtuahna hman lehzual thain ka hria a, nuai 59 hi eng eng emaw han paih hian a chuang a ni ta mai a. Excise Department hi an tangkaina te kan hria a, an pawimawhna te kan hria a helaiah hian hun kal zel tur atana tan lak deuh budget leh pekah te pawh ngaihtuahna thar hman lehzual atan a tha awm mange aw tih kha kan Minister te leh Finance lamah te pawh tih hi ka'n sawi duh a ni.

Demand No. 16-na Home-ah hian kan Budget hi a tam viau a, nuai 56389.29 a ni a, hetah hian salary leh wages ah hian nuai 49397.44 a ni a, medical re-imburement-ah hian nuai 1148.7 a awm a, hei hi a thahnem khawp mai a. A mihring chu an tam a, mahse, Education lam kha kan la sawi ang a, Education-ah hian an tam zawk daih a Medical Re-imburement-ah hian a tlem daih zawk si a, hengte pawh hi ngaihtuah chian a tha khawpin ka hria.

Nimina kan sawi O.E te pawh nuai 222.85 a ni ta daih mai a, tin O.C te hi nuai 537.27 a ni a, heng hi a tam khawp mai a. Tin, Motor Vehicle leinan hian nuai 601.66 a ni a, hei hi Bolero a thar hi lei ta ila 85 chuang zet mai lei theih a ni a. Hengte hi hmannah pawh an indaih loh thu chu sawi a ni a, kan hria a, a dik chiah a. Police lam Home lampang hian Motor an indaih lo a. Amaherawhchu kumkhat chhung atan chuan Motor leina atana dah hi a tam hret em aw tih ngaihdan min siamtir thei a. Kumkhata Motor 85 zet man helaia awm te hi hetiang te te hian kan pawisa indaih lohna leh a Department bika kan harsatna lo kal te hi insem zai danah Chiang ila, ngaihtuahna hmang ta ila. Hmanni a kan discuss hmasa a ka sawi ang chiah khan uluk taka Minister-te leh Finance-te nena sawiho tlana tih a nih hi chuan kan harsatna tam tak hi a kiang thei dawn niin rinna ka nei a. Chuvangin tunah Home lampanga Motor leina te, Medical reimbursement te kha a tam deuh em? Other Charges tihte kha a tam deuh em tih te pawh la ennawn chhoh zel tha khawpin ka hria.

Tin, Agriculture hi nuai 19029.65 a ni a, Agriculture hi a pawimawh a, amaherawhchu, hei hlawhbakah hian grant-in-aid 10048.15 a awm a, hei grant-in-aid hi a tam khawp a, Grants for creation of capital Assets-ah hian nuai 4750 a awm a, Other Charges-ah hian nuai 273.98 a awm a, hemi grant-in-aid hrim hrim hi a tul a, dah tur pawh a ni a, mahse hei a tam khawp mai a, hetia kan dah ta rau rau anih chuan ka'n sawi duh chu Agriculture-ah hian hma kan sawn a, Buh leh Bala kan intodelh leh theihna tur chuan ka ngaih ve dan chuan, ram zawl hi kan ngah mai a, tha si, hmar lamah te, khawthlang lamah te sawtah chhim lamah te, kan leilet neih ang ang hi Bulldozer leh JCB hmang hian theihtawp chhuahin kan Agriculture lam hian tan rawn la selangin, helai grant-in-aid kan han tih te.

Tin, non-salary atana general Grant-in-Aid tihah te hian nuai 3286.48 lai a awm bawk a, hetah 4750 a lo awm bawk a, a chhak ami nen chuan a tam viau mai a. Hei hi Agriculture hmasawna lam leh Buh leh Bala hma kan sawn theihna tur hian kan Minister zahawmtak khan lo chhinchhiah sela, ei leh bara kan intodelhna turin helamah hian hma nasa takin a lak theihin ka hria a, kha kha vawinah min lo chhinchhiah sak sela ka duh a.

Tin, Demand No. 38-na Rural Development Department kha Grant-in-Aid takah khan General Non-Salary tihah khan nuai 30286 a awm a, hei Major work-ah hian

nuai 3977 a awm bawk a, hemi General a Grant-in-Aid hi a tam khawp mai a. Hei hi kan hman dik chuan ram hmasawna tam tak helaiah hian awm thei turah ka ngai a. Chuvangin kan Rural Development Minister zahawmtak kha helaia kan pawisa tam tak awm kha a hman dik dan leh thingtlang lam tana a hman dan tha zawka ngaihtuah turin tunah hian ka'n chah duh bawk a ni. Awle kha kha Home lamah leh Agriculture leh Rural Development leh Excise-ah nen ni ta mai sela.

Education hi han sawi leh ta ila, Demand No. 20-na kha, anni hi chu hei Salary-ah hian tam tak a awm lo thei lova, a dang hi chu tam tak awm hleithei a ni lova, tin, Development lampang thawk te an ni lova. Nichina ka hma a miin a sawi ang deuhhlekan hna lak chungchang hrim hrim hi a theih ang tawk tawkah duhsak ni ta selangin, tichuan an awmna hmunah awm ngheh hi a harsa lo bawk a, chu chu kan Minister zahawmtak hi ka'n chah ve duh bawk a. Chuvangin, hna lakah hian khawpui mi chu a thiam thei thei te pawh kan lo ni a, tin han exam ah te pawh hian a sang sang te pawh kan ni ang, mahse dan hi tha takin siam ni sela tih ngaihtuahna rawn hmang sela, tha khawpin ka hria a, ka'n ngen duh bawk a.

Tin, Demand No. 40 leh 44 -na hi chu han sawi em em tur pawh a awm vak lova, Trade & Commerce phei hi chu an hlawh zawng a ni deuh mai a, hlawh bakah chuan sawitham a awm lova, hnathawhna tur hi a awm chiah lova ni.

Pu Speaker, Trade & Commerce hi a pawimawh em em avang hian tun hnuah chuan heti lo deuh hian Trade & Commerce te pawh hi Budget-ah hian dah ta ila, a tha mai awm mange aw ka ti a. Chu chu hun kal zel tur atan Pu Speaker, Trade & Commerce hi a pawimawh ang hian kan Budget-ah hian hei aia tam hi dah thei sela, a lawmawm hlein ka ring. Chu chu ka sawi theitawh ni se, ka lawm e.

**SPEAKER** : Aw, Pu Pianmawia.

**Pu R.L. PIANMAWIA** : A hmasain department pahnihah hian duhthawhna lam ka'n sawi duh lawk a. Demand No. 7 leh 16 Budget buah khan O.E. leh Other Charges tih kha a tam angreng khawp mai. Amaherawhchu, Secret Service-ah hian a tlem leh hle mai si a. Hemi hi dik taka kan sawi duh chuan Secret Service te kan tihthat chuan kan him a ni, mipui pawh kan ralmuang a ni. Chuvang chuan hetiang a kan duhthawh ang tho hian Secret Service-ah

hian duhthawh theih dan hi hun lo kal leh zel turah chuan hotute pawn ngaihtuahna min hman sak se tha hlein ka hria a. Excise leh Home-ah hian Secret Service a chetnaah hian an indaih lo nasa a, an duh angin hma an la hleitheh lova. Tin, mipui thlabar tithlamuang tur te pawhin duh anga an chet theih loh avang hian harsatna a thleng thin a. Chuvang chuan helam hi ngaihpawimawh ber te zingah tel sela, O.E. leh Other Charges-ah kan dah tam theih ang tho hian dah tam ve tum ila a that ka ring a.

Tin, Demand No. 16 Home-ah hian kan Minister chungah hian lawmthu sawi ka duh a. Darlawn Police Quarter, New Vervek, Sakawrdai leh N. Tinghmun-ah te min han tih sak a ka lawm hle a. A hmabak chu tunah chuan Zohmun a ni tawh mai a, hmabak a nei tlem tawh hle a, theih pawh a theihngihlh loh ka ring a. Tin, motor kawl sa Darlawn leh Sakawrdai bakah New Vervek-ah min dah sak avangin lawmthu ka sawi a. Tin, sawi hmaih loh chi leh sawi hmaih phal loh thil pawimawh deuh mai chu inthlan dawn khan venhimna lamah kan thlabar hle a; amaherawhchu, a hun takah venhimna lama tul zawng zawng famkim takin min han tihsak avangin kan lawm takmeuh a, bial ang pawhin lawmthu ka'n sawi mawlh mawlh a ni.

Tin Demand No. 31- Agriculture ah hian lawmthu kan sawi duh leh na chu SDAO Quarter leh office Darlawn-ah min han sak thar sak a kan lawm hle a. Tin, NLUP Link Road-ah te pawh Ratu, Darlawn, Sakawrdai, Sawleng leh New Vervek-ah te hma min lak sak tawh a, hmabak erawh chu a la tam viau a.

Tin, Darlawn-ah godown min sak sak tawh bawk a. Tin, lawmthu kan sawi rualin Hmunphiah Godown hi Vaitinah khian min sak sak theih chuan kan lawm hle bawk dawn a ni tih ka'n sawi duh bawk a.

Tin, Demand No. 38 Rural Development-ah hian Hmunphiah Godown Pehlawn, East Phaileng, Kepran leh Sawleng ah te min dak sak avangin kan lawm hle a ni tih ka'n sawi duh a. Tin, Zohmun, Sakawrdai, Sailutar leh East Phaileng-ah te Community Hall min sak sak a, kan lawm hle a. Tin, Lungsum leh Ratu leh N.Tinghmun hi la sak zawh loh deuh hlek an ni a, hei hi min zawh sak bawk se kan duh hle a.

Tin, term hmasa a Housing for Project staff a Darlawn BDO Office sakna tur nuai 15 khatih hunlaia zirtirtu hlawh a pek zawh vek te kha tun thlengin sak thatna tur pawisa a

la lang leh lo tlat mai hi a ngaihtuah thei thei chuan ngaihtuah a va tha em tih ka'n sawi lang duh a.

Tin, Demand No. 20-na Education-ah hian lawmthu ka'n sawi duh a. RMSA High School hi kan mamawhna hriain North Serzawl, Sunhluchhip, Sailutar, Damdiai leh N.Tingmun-ah te min dah sak a, min dah sak mai bakah tunah hian building min sak sak a, kan lawm takmeuh a, RMSA High School hi Maucharah kan la mamawh a ni tih kan Minister khan min la hriat sak se ka duh a. Tin, High School-ah pawh kan School neih zawng zawng East Phaileng High School te, Sawleng High School, Kepran High School, Darlawn High School, Ratu High School Sakawrdai leh Zohmunah-te min sak that sak vek tawh a, kan lawm hle a. Tin, exam centre Ratu High School leh Zohmun High School ah min dah sak avangin lawmthu ka sawi duh a. Tin, Higher Secondary School permission Ratu High School-ah min pe a, Sailutar-ah Primary School-ah ah min pe bawk a. Tin, kan High School zawng zawngah computer min dah sak bawk avangin lawmthu ka sawi e.

Tin, kumin April thlaa thliin Primary school a len darh vek sak thatna tur kha pawisa awm lo chungin theihpatawpin min zawn khawm sak a, min zawnkhawm sak atangin N.Tingmun Primary School kan sa mek a kan lawm hle a ni.

Tin, zirtirtu transfer chungchangah bialtu MLA te thuneiha min pe hi, min zahderna hi ka lawm hle a. Amaherawhchu, keini ang bialte chu zah loh bialte kan ni deuh thin emawni, a tira kim thup te pawh kha tunah chuan a phai duak tawh a. Chuvang chuan hetiang a tih atang hian kan thawlna kha a ngaiin a awm thei ta a, hnawhkhah tur tamtak a awm rualin. Tin, zirtirtu lak leh dawn chuan Sub-Division wise-in school tin mamawhna atang khan lak ni sela. Darlawn Division hnuai a ngai zawng zawng te kha Darlawn bial chung tan chauh khan dil theihna awm tawh sela, tichuan bial chung mi kan tling ve teuh ang a, kan thawk ang a, transfer an dil an dil dawn lo a ni tih ka'n sawi duh a.

Tin, Demand No. 40-ah hian Industry a nih rualin Geology a tel a, lawmthu ka'n sawi duh a. Industry-ah hian puanthui khawl a mamawh zualte pek tur min han pe thei a, sum harsat tehlul nen. Tin, Geology atangin Sakawrdai, N.Vervek leh Vaitin-a lei tlahniam te staff indaihlo chung chungin minrawn en sak a. Tah hian ka'n sawi belh duh chu, Geology-ah hian staff an indaih lo em em mai a, leimin enfiah tur pawh mi an awm a. Pakhat chauh han pawhpen turah pawh keini ang bial tan chuan a har hle a, mahse, min duhsakna avangin minrawn tirh sak a, kan

lawm tak meuh meuh a ni. Chuvangin staff chungchang hi ngaihtuah belh ran ni sela a pawimawh ngawtin ka ring a.

Tin, Demand No. 44-Trade & Commerce-ah hian lawmthu han sawina vak tur kan nei lo nain kan neihna turin Zohmun leh East Phaileng-ah hian kan mamawh ve a ni tih erawhchu vawiinah hian ka thlen duh a. Tichuan Demand kan han sawiho takah kan hotute chungah hian lawmthu ka sawi rualin ka duhthawhna thu leh kan mamawh belh te kha min lo hriat sak tur leh Session lehah chuan lawmthu kan sawina baka sawi leh thei turin min ngaihtuah sak turin kan hotute ka ngen a ni, ka lawm e.

**SPEAKER** : Aw, Pu Robiaka a phar hmasa e.

**Pu LALROBIAKA** : Pu Speaker, ka lawm e. Vawiinah Demand kan han sawi chho a, a lawmawm hlein ka hria a. Tin, kumina kan budget hi general discussion-ah khan ka sawi ta lova, pawl ka ti khawp a. Chutihruah chuan kan Finance Minister in Budget a chhuah hi a puitling ka ti a, a Mizo a, a Nationalist rilru a ni tih kha ka'n sawi hmasa duh a. Hetiang Budget tha leh Mizo tawng ngei leh Annual Financial Statement te pheih chu hetiang hi khawvel awm chhungin Mizote zingah a la awm lova, a fakawm hlein ka hria a, khatiang kha ka'n sawi hmasa duh a ni.

Tichuan, Demand No. 16-na, Home Department pawisa hman turte kan hria a, khalam kha chu ka sawi lo mai ang a. Chutihruah chuan kan bial lam te han sawi ve ila. Keini bial hi kan sawi fo angin insurgency leh helna avanga harsatna tawh zinna bial a ni a, min ngaihtuah viau a, amaherawhchu, hei ai hian min thum that a ngai a ni tih hi chu kan sawi nawn leh duh a. Kidnap te leh thil chi hrang hrang, state dang atanga training turte kalka leh main route a ni a. Tin, kan sawi thin angin hetiang kalka leh hetiang chenna reng rengah chuan pomp puak lo, puak thei mai a ni reng a ni tih kha kan Minister ngei pawh hi a hrechiangtu a ni a, chuvang chuan nasa zawka min thum that ka'n duh a.

A bik takin Phuldungsei khuaa I.R. kan dah ve khu an khawngaih thlak khawp mai a, nikum hmasa hmasa leh lam khan thlipuiin an Barrack chung a la a, a lian tham si a, engtin emawa han tih mai theih a ni lova, chungte chu report a awm tawh a, chu chu min han thum tha leh turin ka sawi nawn leh a ni.

Tin, buaithlak deuh chu, West Phaileng Outpost khuan Reiek, Ailawng, Kanghmun tlangdung zawng zawng hi min rawn bial a, chutih laiin Motor-te a that loh piah lamah Petrol/Diesel te an lo nei lo nen, incident a awm pawhin a hun takah an thleng hlei thei thin lo va. Kanghmun tlang dungah hian Outpost pakhat tal hi awm ve thei se tih hi kan Minister zahawm tak hnenah hian ngenna vawi 2/3 ka thlen tawh a. Ani pawhin min hre rengin ka hria a. Term hmasaa kan tih theih loh kha term lehah hi chuan kan tih theih tawh ngei ka beisei a ni tih kha ka'n sawi duh a ni.

Tichuan Demand No. 31-na Agriculture hi, Agriculture ho chungah hian lawmthu sawi ngawih ngawih tur kan ni a. Keini bial hi kan sawi tak ang khan power tiller te, tractor te term hmasa khan min han pe a, kan chhawr tangkai hle mai a. Kan thar chhuah pawh a pung nasa a ni. Chumai a ni lo va, kan Agriculture Link road te, NLUP leh RKVY convergence atangin min han laih sak a, ka biala kan lo neitute an hlim em em a, an hlim mai bakah kuminah hian sum tam tak, kum danga an lak phak loh kha an la mek a an hlim a ni. Hengah te hian power tiller-te nasa zawka tun termah hian kan sem leh theih ka beisei a. Tin, link road-te pawh hi lui ruam, tlawng han pawh theihna tur te, Tut han pawh theihna tur ang chi te kan tih zel theih chuan nasa deuhin kan improve chho zel dawn a ni tih kha ka'n sawi duh a ni.

Tin, Pu Speaker, sawi dan thiam a har dawnin ka hria a, Rural Development hi a chhawr ber tute kan niin ka hria a. BADP te sorkar chakna vang te, min duhsakna avangtein kan han dawng chho a. Western belt Development Fund kan tih te leh IWMP te thlengin. Ka'n sawi leh duh chu nichina kan thian, kan member pui ten an sawi tawh ang khan rangva han sem leh theih te hi ni sela, heng ho hian nasa deuhin IAY kan han tih te, hian mi zawng zawng kan inchhnglut thei si lo va, chungah chuan rap in te, di in te tam tak kan la neih si avangin fur te hi ka huphurh em em thin a ni a. Chuvang chuan rangva sem ti leh thei ila a lawmawm ngawtin ka ring a.

Tin, chumai piah lamah chuan Hall chi hrang hrang, Community Hall tih ang chi kan Rural Development hnuai atangin min tihphuisui sak a. Tin, chumai piah lamah chuan thil chi hrang hrang, training ang chi thlengin hma min han lakpui a. Self Help Group kan tih ang chi te, thingtlang lama kan nu hote thlengin Rural Development hi kan chhawr em em a ni tih te pawh kha ka'n sawi duh a ni.

Demand No.20-na School Education-ah han kal chho leh mai ila. Keini hi kan sawi angin economically-in kan hnufual em em a. Chung avang chuan sorkar-in duhsakna tam tak min



pek tawh piah lamah RMSA te min han pek belh zel a, kan lawm a. Chutihruah erawh chuan bial ve riang ruang vawiin thlengin Higher Secondary kan la nei lo a ni. Kan naute HSLC han pass chhuak te kan rethei si a, chungte chuan zirna nei lovin drop-out tam tak tunah hian an awm a ni. Amaherawhchu, mimal tlawmngaihna avangin Phailengah tunah hian private Higher secondary an han siam ve a. Chungte lah chu han thuam that an chakawm, kum eng emaw zah 100% an pass tawh nghe nghe a ni. Chuvang chuan hei hi kan Minister zahawm tak hian min ngaih pawimawhsak sela. Higher Secondary School min din sak ngei se ka ti a, kan ngen ngawih ngawih a ni.

Tin, Industry hi min duhsakna te a lawmawm ka ti a, industry hnuai hmasawna tam tak kan nei a. Amaherawhchu, kan beiseina che u chu a bik takin kan bial chuan hnuai lamah Chakma unau tam tak kan nei a, an kut a them thiam hle mai a. Amaherawhchu training eng emaw nei ve se chuan hmasawna tam tak an nei dawn a ni tih hmuchhuaktute zing ami ni vein ka inhria a. Weaving Centre emaw, Weaving Training Programme emaw te hi Industry Department hian min han siamsak thei ta ula, nasa takin hma kan sawn dawn a ni a. Chuvang chuan in mi duhsak tawh naah te bial angin lawmthu ka sawi rualin, khati zawng khan Chakma kher ni lo pawhin Training Centre, khawi khawiah emaw, SDO thut hmunah emaw, a nih loh pawhin khawilaiah emaw min han dah sak thei ta ula a tha ngawt ang tih ka'n sawi bawk a ni.

Tin, Demand No.46-na Trade & Commerce-ah hian sawi tur tam tak a awmin ka hre lo va. Hmasawna tam tak in neih avangin kan lawmpui duh che u a. Tin, Border Trade atana hmalak naah te hian keini lam te hi a tel ve theih em tih te pawh kha kan sawi fo tawh a. A bik takin khung border area Silsuri, Marpara khuaah te khuan tunhma atang pawhin sumdawnna hi tan a lo ni tawh a. Vawiin thleng hian Aieng kan tih te, Sawhthing kan tih ang chi te leh Anchiri kan tih chi te hi khulai atang khuan Bangladesh-ah kan thawn chhuak ve thin a. Kha vang khan helai hi a pawimawh hle a, min lo ngaih pawimawhsak tur te; tin Mini-Market sak neuh neuh te bial tam takah hian kan hmu thin a. Keini bialah hian Trade & Commerce lam hian kut hnu hi han uanpui tur hi an nei lo viau niin a lang a. Hengah te pawh hian minrawn hre turin kan duh che u a. A tlangpui thuin kan sum hman turte thil chi hrang hrang han en hian a lungawi thlak a, duhthusam ni zat lo mahsela, heng zawng zawngah hian kan hotute remhriatna leh he sorkar remhriatna avang hian Mizoram tan hian nasa takin hengte hian hna a thawk ang tih ka beisei a ni e, ka lawm e.

**SPEAKER** : Pu Lalthanliana.

**Pu LALTHANLIANA** : Pu Speaker, hun min pek avangin ka lawm e. Kan budget kha tlem tlem ka lo en vena atangin han sawi ve, ka mit la deuh hlekte han tarlan ka duh a. Tawi tein ka'n sawi ve ang e.

Demand No.7 & 16 na te hi chu sawi vak ngaiin ka hre lo va. Amaherawhchu, chutah chuan kan chhinchhiah deuh chu Office Expenses leh Other Charges tihah hian kum hmasa lampangte nena kan khaikhin hian kan sum indaihlohna te nen ngaihtuah chung bawkin a rawn dah tha hlein ka hria a. A tlahniam hret hret a, a tlak hniamna kha sang vak lo mahse an insum niin ka hria a, a lawmawm ka ti a. Nimin lamah hetiang chungchang hi kan zawhnate pawh sawichhuahna awm tawh tho mahse, Office Expenses leh Other Charges te hi office District hrang hrangah te, hmun hrang hrangah te kan sem darh a. Chuvang chuan a tlem hlei thei lo a ni tih kan han hriat rual rual khan helaiyah hian hmasawna ni turah ka ngai a, kan sum indaihlohna te ngaihtuahin an titem hret ni turah kan ngai a, a lawmawm ka ti a.

Pu Speaker, ka'n sawiduh lian deuh ber chu Agriculture, Demand No. 31-na hi a ni a. 2013-2014 a Office Expenses kha Non-Plan leh Plan-ah khan nuai 66 a ni a, 2014-2015-ah hian nuai 38 chauh a lo ni ta a. Hei pawh hi nuai 28 zetin a tlahniam a. Kan dinhmunte enin hmasawn naah ka ngai tho a, a lawmawm ka ti a. Amaherawhchu, Other Charges-ah hian 2013-2014-ah hian Plan leh CSS te telin nuai 159, 55,000 a ni a, 2014-2015-ah erawh chuan an zuang ta deuh dawrh mai a nuai 273,98,000 a lo kai chho a. Ka ngaihtuahna atang chuan hei hi tlahniam ve hret tura ka ngaih laiin a pung ta tlat mai a, nuai 78,83,000 in a pung ta a ni. Ka hriatna a sual lem loh chuan Office Expenses leh Other Charges-te hi tul bik thilah te chuan a inham pawlhin, a inzen pawlh theih tho turah kan ngai ringawt a, a zawng a za chuan theih lem loh mahse. Chuti anih chuan a leh lama tlema phai deuha lang kha lehlamah a pawng leh vak anih khan, chutiang pawh chu ni se kum kal ta leh tun kuma Office Expenses leh Other Charges kan han belhkhawm a kan han paih khan nuai 50,43,000 laiin ala tam ta tho tho mai a. Hei hi a tihtlem chi em ka hrethiam chiah lo va. Tihtlem chi ni se chuan hei aia tangkai zawkah hian a hman theih a ngem le tih kha ka ngaihtuahnaah a awm deuh a, chu chu ka'n sawi duh a.

Tin, a dawt lehah chuan Grant-in-Aid, general salary tih hi a ni a. Actual a 2012 leh 2013 a kan hman kha nuai 11327000 Plan-ah a ni a, 2013-14-ah khan nuai 176 a ni a. Amaherawhchu, tun kumah hian nuai 39355000 in a rawn pung ta dawrh mai a. Kum hmasa kum 2 tea kan hman belhkhawm aiin nuai 10428000 in a tam a ni. Kan Hon'ble Finance Minister thusawi

No.26-ah khan NLUP 2011 atanga tan a ni a. Chhungkaw 150,000 target a ni a, chutah chuan kum 5 chhung atana duan a ni nanging kum 3 chhungin zawhfel vek, tuam kim vek a ni a.

Chuti anih chuanin 2013-2014 ah hei hi tuam zawh tawh an ni. Chhungkaw 150000 enkawl nan NLUP chungchangah 289 lakhs 2012-2013, 2013-2014 ah te chauh hman a ni a, 289.27 lakhs kha helai budget bu demand for grants bu atanga ka hmuh phakah chuanin chhungkaw sang, kha kha a zo tawha, tunkumah hian 15,000 chauh kha kha an han tihbelh leh a, khatiang zat lek enkawl nan khanin a tharin 393.55 lakhs a rawn awm ta mai hi ka hriat thiam loh vang nge ni a va tam ve ka ti deuh a, he chhungkaw 15,000 te hi chu 1.5 lakhs atan chuan a tlem hle maia, 10% emaw chauh a ni a, phekpahlen mai turah kan ngaia, mihring, a dealtu turte pawh an lo tlem tawh anga, a sum involve pawh alo tlem tawh turah ka ngaih laiin kum 2 hmalam pang ai khan a tam ta daih mai hi ka hre thiam lo a nih chuan min ngaidam turin kan han ngen a. Chu chu min hrilhfiah erawh chu ka phuta, ka ngen a ni.

Tin, Pu Speaker, Rural Development hi ka sawi ve duh lawka. Demand no 38 hi, hei hi a mak ka ti khawp mai a, Office expenses bawk hi ka'n sawi leh duh a. 2012-13 ah khan 20.38 lakhs a ni a, 2013-14 ah 223.27 lakhs a ni a, tunah hianin 122.1 lakhs chauh a ni a, a percentage a chhut chuan 45.31 % in a tlahniam a ni. Hmasawna tha ni turah kan ngaia, a tha khawpin ka hre mai a. Tin, other charges kha 2012-2013 ah 20.38 lakhs a ni a, 2013-2014 ah 45 lakhs a ni a, 2014-2015 ah 2.5 lakhs chauh a ni ta maia, a tlakhniamna percent hi 98.4 % a ni a, hei hi tihsual a nih loh chuan a van hniam tha em em, in sumna tha ni turah ka ngai a, a lawmawm turah ka'n ngaia, ka'n sawi duh a.

Tin, Grand-in-Aid general non-salary hi hei hi thil tha lam ni turah ka ngai a, 2013-2014 ah khan 5907.54 lakhs kha dah a ni a, tunah hian 30286.48 lakhs dah a ni ta daih a, a percentage-ah pheh chuan 412.67 % in hei hi a hman tangkai dan tur Grand-in-Aid a ni a, a hman tangkaitu tur an lo pung ta ang a, hei hi a van tha dawn em aw, ka ti a. Ka hriatthiam danah chuanin a tha lam niah ka ngai a, lawmthu sawi hi a tulin kan hria a, ka'n sawi a ni.

Tin, Pu Speaker, School Education hi ka sawi ve duh a. Grand-in-Aid general salary chungchangah hianin demand No.20 hi ka'n sawi duh chu 2012-13 ah khanin heng non-plan leh plan-ah te khan 7774.44 lakh dah a ni a, 2013-2014 ah khan revised estimate ah, hetah hian CSS te, NLCPR te, EA te tel lovin 8777 lakhs a ni a, 102.56 lakh in a pung a ni, hei hi chu a awm viauin ka hre thova. Amaherawhchu, 2014-2015 ah hian non-plan leh plan belhkhawm zel hi a ni a, a

tlahniam ta daih mai a, 4337.64 lakhs a ni ta daih maia, 4439.36 lakhs in a tlahniam ta daih maia, a percentage zawng phei chuan 50.58 % a ni a.

Hei hi kha hrethiamlo khawp maia kan hnathawktu strength te hi kan titem ta nge, hetiang strength ang ang anih chuan kum hmasa a 8777 lakhs kan hman laia heti lek kan dah ta hi kan thawktute kan titem ta nge? hlawh hi kan pe tha theilo nge? kan pe ngai lo nge ? budget hi a daih lo sain kan siam hrim hrim nge helai bawr hi ka hrethiam lova, chuvang chuanin ka'n tarlang ve a ni e, Pu Speaker, ka lawm e.

**Pu R. VANLALVENA** : Pu Speaker, hun min pek avangin, ka lawm e. Vawiinah hun tha tak mai kan nei a, ka sawi ve duh lai chu a budget bu tak tak hi chu sawi lutuk ka tum lova, a chhan chu kan duhthusam a ni lo tih kan hre tlang vek a. Kan Minister zahawm tak takte leh kan officer-te pawh hi an khawngaihthlak dawn khawpin ka hria. Kan sum neih danin a zir lo va, a chhan pawh central-ah Planning Commission thiat a ni a, chumi avang chuan kum danga kan budget ang zawng zawng kan pha ta lo a ni tih kha a chiang reng mai a. Tin, sorkar support lo deuh tan phei chuanin sorkarin pawisa a nei lo han tih mai pawh kha thil awl tak tur a ni a. A chhan thui zawk sawi loh emaw ngaihtuah loh emaw phei chuan sawi liam mai kha thil awl tak tur a niin ka hria a. Amaherawhchu, a tak takah chuan central lam atangin Planning Commission te thiat an ni a, chu chuan kan plan tur te duhthusamin a rawn siam fel lo ti mai ila, CSS kha plan lamah a rawn thun luh tak avangin kan duhthusam kan hmu thei lo a ni tih kan hriain kan ngaihthla tawh a, khalai kha nakin zelah pawh kan sawi nawn fo tulin ka hria.

Chuvangin, kan Minister zahawm tak tak te, kan officer-te an khawngaihthlak dawn khawpin ka hria a, kan duh khawp sum hman tur kan nei dawn lo va, chu chuan kan budget pumpui hi sawi lutuk loh pawhin a cover viauin ka hria a, chulai chu thuhma angin kan sawi duh a. Vawiina kan demand sawi tur kan Minister zahawm tak, Pu R.Lalzirliana chan atang hian tawi te tein han tan ka duh a. Kan Excise department hi an fakawm khawpin ka hria a, hmanni lawkah helai House zahawm takah Act Pass a ni a, hun reilote chhungin Rules tha tak mai an rawn peih thei a, vawiinah chuan hmuh theihin a awm der mai a, an fakawm ka ti a, an chungah lawmthu ka sawi duh a, kan Minister zahawm tak thahnemngaihna a lang khawpin ka hria. Session hmasaa kan sawiho lai kha Mizoram mipuiin an ngaihven hle a nih kha, tuna Rules-te pawh hian mipui ngaihven a hlawh hle a ni tih kan hria a. Mizoram mipuiin kan beng kan chhi tlang, kan ngaihndan leh mitthla a kan hmuh danah khawlai a zu dawr awm teuh turin kan suangtuah a, amaherawhchu control-na tha tak

hnuaiyah zu dawr te siam tur a ni. Miin zu chhia an in vak vak mai te control a nih theihna tur atan dan tha tak mai an rawn siam a, an chungah hian lawmthu a hmasain kan sawi duh a ni.

Tin, Agriculture leh Rural Development Department te hi Mizote min tihmingthatu tak pawh niin ka hria a. An hmalakna hrang hrang a bik takin thingtlang lamah kan hmu a, lo neia ei zawngtu, nitin kut hnathawka ei zawngtute leh thingtlang lama inbengbel, chhungkaw tam takin hamthat nan an hmang a. Ka ti thin a, Mizoram hi India state hrang hrang ah hian thingtlang leh khawpui inthlauhna tlem berna a ni awm mang e aw, ka ti thin a. Duhthusam chu a ni miahlo nain. Aizawl leh thingtlang hmun hrang hrangte hi kan intluk (equal) tlang khawp mai a. India ram state dangte ngaihtuah chuan chung chu kan Agriculture department-te, kan minister te, kan Rural development minister zahawm tak tak ten hma an lakna vangte niin ka hria a, hu chu a lawmawm ka ti a.

A dawt lehah chuan, Home department-ah khan lawmthu tlem han sawi leh ka duh a. Mipute hian Home department-in a tih thin te kan hria a, democracy ramah chuan ram a him tur a ni tih a ni a. Ram venhim hna, mipuite venhim hna hi Home department in min thawh sak thin a ni. Kan hun kal tawh te kan thlir kir chuan Pu Speaker, 2007 April thla bawr vela helai House- no-confidence motion kan ngaihthlak te han thlir kir kha chuan vawiin nen khami hun kha han khaikhinin vawiinah hian mipuite kan zalen hlein ka hria a, a lawmawm ka ti a. Mizoram hi kan hriat angin international boundary te, state dangte nena inhne ramri nei kan nih avangin ramri hrulah chuan engemaw kan duhthusam loh chu thleng ve thin mahse a tlangpuiah chuan khatiang kum hun thlir kir khan Mizote hi kan him a, kan thla a muang a, kan sorkarah hian kan lawm hlein ka hria. A bik takin kan Home minister thahne ngaihna te, theihtawp a chhuahna te Pathianin mal a sawm niin ka hria a, a lawmawm hle in ka hria a ni.

A dawt lehah chuan, Education department hi luh chilh bik deuh hlek zual ka duh a. Kan minister leh kan Parliamentary Secretary zahawm tak ta te inpekna leh an ngaihtuahna hmanna hi a hluin an fakawm khawpin ka hria. Kan hre tlang vek a, Mizoram ah sorkar school in hma a sawn hlei thei lo tih kan hria a. Private school-lamah kan tu kanfa te kan dah ruih ruih reng a, harsa zawk leh a ba thleng pawhin private school ah kan dah a, kan sorkar school hi a tlahniam zel a ni tih chu Chiang taka kan hriat niin ka hria a. Chu chu kan Education minister zahawm tak takte pawh hian an vei viau niin a hriat a ni. Tunah hian sorkar school 14 chu 7 kharin 14 kha 7-ah an chhunfin tawh a. Chutiang te chu school naupang neih loh vang te pawh niin a lang a ni. Chutiang chuan hma an la a, 2004-2013 inkarah hian sorkar school hi kan tlachhe chak khawp mai a. A bik takin

Primary School ah hian school naupang hi 46,719 in an tlahniam a. Chutiang chuan a tawi zawngin hun a tlem si a, kan tlahniam chak em em mai a. Private school erawh chu a pung chak khawp mai a, school naupang hi 59,559 bawr velin private Primary School-ah hian an pung a. Tin, Middle School-ah hian 18,754 velin an pung a. Tin, High School-ah hian 6,246 bawr velin school naupang hi an pung a ni. Chutiang khawp chuan 2004 atanga vawiin thleng chhut hian school naupang hi sorkar school ah an tlahniam zel a. A tlangpuiin private school-ah an sang zel a chu chu kan dinhmun a ni. Chumi veng tur chuan kan minister zahawm tak takte hian tunah hian Pre-Primary school 150 vel hi sorkar school ah ziah luh, telh tumin hma an la mek a, a lawmawm khawp in ka hria.

Aizawl District bikah hian Primary School naupang hi an tlahniam chak em em mai a. Middle School pawh an tlahniam chak a, private erawh chu an pung zel a ni. Heng venna tura kan minister zahawm tak tak ten hma an la hi a lawmawm khawpin ka hria.

Chutih rual chuan rawtna ka siam duh pakhat chu kan minister zahawm takten min lo chhinchhiah sak se, census leh electoral roll khawih tura zirtirtute kan hmang thin hi a pawiin ka hria a, hei hi tih loh hram ni thei se ka duh a. Zirtirtute hi an buai a, an school an chhuah san nasa lutuk a. Hei hian kan sorkar school te pawh hi a titlachhia in ka hria a. Chuvangin, census ah leh Electoral Roll-ah hian kan zirtirtute hi hmang tawh lo hram ila kan thatpui kan ring deuh hlek a.

Tin, nichin khan an sawi tawh a, Recruitment Rules kan lo neilo hi a pawi khawp a. Subject wise-in Primary atangin High School, Middle school-ah teacher kan la lo hi tunah hian a nghawng kan tuar mek niin ka hria a ni. High School, HSLC result kum 5 chhung letters mark hmu te kha ka en thuak thuak a, English-ah 2436-in kum 5 chhung khan letters mark an hmu a. Science-ah 2866-in an hmu a, Mathematics-ah khan 1803-in an hmu a ni. Khamiin a tihchian em em chu Mathematics teacher hi kan nei tha lo tih a chiang hle a ni. Chuvangin Mathematics-ah hian tan kan lak theihna turin nichina rules buatsaih mek kan minister zahawm takina a sawi kha a pawimawh takzetin ka hria a, kha kha tihhlawhtlin hlan a nghahhlelhawm khawp mai. Chuti lo chuan kan school naupang Primary atanga High School thleng hian pawl 12 thlengin Mathematics-ah hian kan tlahniam zel niin a lang a, a nghahhlelhw awm khawpin ka hria, chu chu kan sawi duh a.

Tin, pakhat lehah chuan tun dinhmunah chuan Science subject pawimawh zia kan hria a. Thil training tur engemaw awm se, pawl 12 science pass anih a ngaih deuh zel avangin Science subject hi a tam thei ang hawn theih a ni em tih hi ka ngaihtuahna a ni a. Kan minister

zahawm tak ten theihtawp han chhuah se, Science subject kan inlak tam tir theih hram hram hi a tulin ka hria a, zirlaite hna zawna tur atan hei hi thil pawimawh tak a ni. Chuvangin, kan minister zahawm takten pawl 12 thleng zirna school awmah hi chuan zirtirtu 2/3 vel han belh hlek hian Science subject hi a lak theih mai zel a, a theih hram chuan min ngaihtuah sak se ka lawm ngawt ang. Pu Speaker, ka lawm e.

**SPEAKER** : Le, Pu John Siamkunga leh Pu Ngurdingliana ten an phar rual a, mahse, Hnahthial-in Tuipang a hnaih zawk avangin Pu John Siamkunga ka ko hmasa e.

**Pu JOHN SIAMKUNGA** : Pu Speaker, ka lawm e. Bial hmangaihtu in nih hi chu a lang thin a, ka lawm takmeuh a ni. I Bial hnaih lampang ka nih avanga min duhsaknaah ka lawm. Pu Speaker, general discussion-ah khan thui tak kan sawi tawh a, vawinah chuan khalam lo deuh zawnga sawi ka duh a, kan minister zahawm tak takte demand tlem tlem han sawi ve ka duh a.

A hmasa berin demand No.7, Excise & Narcotics chungchang hi; tun lawk khan kan minister zahawm takin a rules kha House-ah hian a rawn lay a, khami a nih chuan hman theih a ni tawh a ni tih a chiang tawh a ni. Tichuan, hmana discussion kan neih lai khan khuarel thil hi chu tihbo theih a ni lova. Khuarel thil hi chu a control dan zawn hi a fuh zawk. Chuvangin, tuilian pawh a rawn lian thla bulh bulh thin a, lo dan hneh theih a ni lova, chuvangin a luanna tur kawng kan siam a, kan control hian a fuh zawk thin tih te kan sawi tawh a. Chuvangin, kan minister zahawm tak hian he “The Mizoram Liquor Prohibition & Control Rules, 2014” a rawn lay-ah pawh hian a dan hi a chipchiar tha hlein ka hria a. Hei hian a khuahkhirhna dan tha tak a siam a, zu in lova awm theilo mi sang tel, sing tel an awm thin si a, khang hovin zu tha an in theihna turte; tin, awmze neia kan kalpui theihna turte leh buai nuai lova ram a kal zel theih zawkna turin tuten emaw a ruka an trip luh vak vak leh tute emawin an kawl fer fur chung si leh chhiah awl tam tak awm chung si a hetiang kan tih ai hi chuan awmze awmin lalut ila, awmze awmin zuar ila, awmze awmin ramin kalpui ila, ramin hnhemnan nan lo chhawr ve se tih thil a nih avang in a tha ka ti a. Kan Minister zahawm takin helai thilah hian hma nasa taka rawn lain, hetiang a rawn chhawpchuak hi a lawmawm tih kha ka'n sawi duh a.

Tin, Demand No.16, Home Department hi kan sorkar hnu, Congress sorkar hnu hian nasa takin a dang lama, a danglamna hrang hrangte ka sawi seng lo ang a. A bika langsar em em mai chu, kan Minister-in a chan hnu hian Fire Department hi nasa takin a danglam a ni. A hma kha chuan hmun pakhatat inbunin kangmei a chhuah pawhin kang thelh motor pawhin tlan ngaihna

pawh hre lovin, a kan zawh hnuah te alo thleng tlangpui thin a. Tunah erawh chuan hmun hrang hrangah Sub - Station te dahin, Ngaizel pheiah te, tuna kan awmna kan Assembly bul lawkah te, khutah College Veng lamah te che mai thei turin hmun hrang hrangah an dah fer fur a, hei hian kan Home Minister-in Department a enkawl naah a hneh a ni tih a chiang a, thil tha tak a ni. Helaiyah mi mangang leh chhiatna tawkte pawhin awlsam takin an ko zung zung thei a ni tih a chiang a, an hmasawna tam tak leh an hmalakna tam takte ka sawi seng lo a.

Ka'n sawi leh duh chu Thingsai Police Station ah khian a hma in Check Gate a awm ngai lo a, Aizawl-ah hian bike a bo hnem em em a, bike a bo khan khawiah nge kan tih chuan Burma ram a lo thleng hman thin a ni. Khilai kawng khi a tha a, awlsam tein Burma ram a thlen theih a. Ka bial chhungah khian tournament an buatsaih chuan, Burma lam atanga Mizo khaw tam tak khi an lo thawk chhuak a, tournament an nei thin a ni, team engemaw zah te an lo chhuak thin a, a chhak lampang pawh khian tournament an buatsaih dawn chuan team tam tak an tel chho ve thin a. 'No Man's land', tu ram mah nilo, unau inlaichin te ram 25 km bialah khian kan che vel a, chumi a nih avang chuan Police Station awm si, Check Gate awm ta silovah khan buaina tam tak awm niin ka hria a. Kan Home Minister zawhawm tak hi kan dil a, ani chuan min lo phalsak a, Check Gate min lo siamsak ta a ni. Chu Check gate min siamsak hnuah chuan Aizawla bike bote pawh tlanhhoh rukna an nei thei tawh lo a, bike bo te pawh khawilai daiah te emaw kan hmu kan hmu ta mai a ni. Khami a nih avang khan, ka biala hma min laksak naah khan, khami mai niloin Zoram hmun zau zawk hian kan chhawr hle a ni tih ka'n sawilang duh a.

Tin, Hnahthial Police Station te min upgrade sak nasa tawh a, Police Station building lianpui min sak sak bakah quarter te min sak sak tawh a, tunah hian SDPO quarter tur leh office turte min sak sak leh dawn mek bawk a, chutiang chuan duhsak takin Police Station hrang hrangte pawh a ti tho a, ka bial bik kha ka'n mention mai a ni a. Hetiang hian nasa taka hma min lak sak nate leh Zoram hmun hrang hranga 13<sup>th</sup> Finance Commission hnuai Police Station upgrade tam tak awm hi a ropui ka ti a, ka'n sawilang a ni.

Tin, Demand No.31-na Agriculture chungchang hi, Agriculture leh a dang deuh an Allied ho hi kan GSDP, kan state sum thawh chhuahpui berah hian contribution an nei sang em em a ni. Chuvangin kan Budget pharh ah hian Agriculture leh an Allied Department ho hian an thawh hlawk a, chuvangin fak tlak hle niin ka hria a. Tin, buh thar tam kum te puangin nasa takin tan an la a, kum engemaw ti chhungin kan buh thar pawh hian tam lam a pan chho hret hret a, chumi a nih avang chuan Agriculture hmasawn chhoh naah hian lawmthu ka sawi bawk a ni.



Tin, Demand No. 38-na, Rural Development Department hi thingtlang lamah chuan kan rinrawl ber an ni a, khaw tin, bial tin hian kan chhawr tangkai em em a. A bikin keini bial phei khi chu BADP a tel kan ni a, a bikin kan bial chhungah khian BADP hmang hian hma kan la nasa a, hmasawna tluantling neih theih ngei tumin nasa takin hma kan la a, Tiau balu khi a quality a tha em em mai a, Jetinga balu te nen hian khawng the ang, tiin kan entawn thin a ni. Chumi a nih avang chuan khimi balu lak chhuah tum khian hmun engemaw zatah kan verh thla a, a thenah te phei chuan kan thleng lek lek tawh a, a thenah te phei chuan 3 km a thlen lohnate kan la nei a, Lungdap kawngah te, Ngawizawl kawng te, Cherhlun to Tiau road te kan ti a, chungah te chuan kan lai baw a. Tin, chubakah Bualpui 'H' atanga Tuipui lam thleng turin, tin, Muallianpui atangin Tuipui lam panin kan lai baw a, khatiang khan balu lakchhuahna tur, nakin hnu zelah pawh eizawna ngelnghet an neihna turin, mi tam tak eizawna hi BADP hnuai atangin siam tumin kan bei mek a, a thenah phei chuan kan thleng lek lek tawh a ni tih kha ka'n sawi duh a.

Tin, High School building te, Higher Secondary building te leh School building hrang hrangte kan sa nasa a. Tin, chubakah Health Department hnuai pawh kan sa nasa a ni, khang ho kha ka'n sawilang duh a ni. Tin, heng building phei hi chu vawi khat sanction-ah hian a sak zawhna hi awm thei ta sela, installment a tih hi chuan a building hi engemaw zat hi a lo chhe hman tawh thin a, chung chu kan Minister zahawmtak hi ka request duh a, tin hmasawna nasa tak min thawhsakna BADP ah hian lawmthu ka'n sawi baw a ni. School Education chungchang hi, quality education hi kan neih lohna a rei tawh a. Tun hmam hun engemaw kal tawhah khan zirtirtu qualify lo kan la tam lutuk a, saptawng thiam lo, ziak leh chhiar thiam tawk tawk khan kan fate an enkawl a ni. Khatiang khan hun rei tak kan lo kalpui avangin Mizoram hi lekthiam tam si, saptawng pawh thiam lo, quality nei lemlo kan tam phah em em a ni. Chumi a nih avang chuan sawrkar hian mut mawh hnar mawhah nei ila, quality thei dan ber turin engtin nge ni ang tiin nasa takin hma a la a.

Vawiinah chuan kei ka lo rilruk, ka lo vei em em thin, India ramah pawh NCERT an hman tangkai dan te kan hria. Vawiinah chuan SCERT hman tangkai dan he sawrkar hian a hre tan niin ka hria a, zirilaibu siamtu ni reng reng lo ten zirtirtu training an pe hi a dik lo, zirilaibu siamtute ngei khan zirtirtute hi training pe rawh se. A letlinga kan lo kal thin kha paw ka ti a. Vawiinah erawh chuan her dikna lo awmin, SCERT te ngeiin kan zirilaibute a rawn siam dawn a, NCERT nen inla lawnin changkang takin a awm ka ring.

Amaherawhchu, zirtirtu chungchangah erawh hi chuan VRS in he scheme hnuaiah hian tam tak an chhuak a, mi thiam zawkte lain, kan mi, kan fa, kan tu te, lehkha thiam tura kan dahna hmunah hian zirtirtu qualified an awm loh chuan, lehkha chhiar thiam tawk tawk, saptawng pawh thiam lem lo hlir kan chher chhuak dawn a, chumi a nih avang chuan Zoram mipuite kan mangang a, a theih hram chuan kan fate English Medium, private school ah kan dah thin.

Chuvangin he lamah hian sorkar hian a siam that hna a thawk chho mek niin a hriat a, a lawmawm tak meuhin ka hria a. Kan sorkar hmasa pawh a reform dan turte ngaihtuahin, Education Reform Commission-te dinin tunah duh ang tawkin hma an la la thei lo a, hma an la chho zel turah ngai ila. Combined Civil Service exam te hian a ler lamah lo dawhin quality education awm chho zel tur kha, hei hian a ler lamah a lo dawh lawk a, hemi avang hian B.A, graduate chin te chuan MCS Officer, MPS Officer, MFAS nih tumin nasa takin an bei thin a, chu chuan quality a hring chhuak thin a, he sorkar-in education lama hma a lak hi a ropui ka ti a.

**SPEAKER** : I hun i hmang zo.

**Pu JOHN SIAMKUNGA** : Pu Speaker, Demand 40-na, Industries hi han sawi ka duh a. Industry & Minerals ho hian kan GSDP-ah hian contribution an nei sang thin a, an fakawm hlein ka hria. Wawiinah hian Food Processing Industries te leh Fabrication Industries te a tam a, sawi fe tham a awm a ni. Heng tiny industries hote hi Industry hian enkawlin theihtawp a chhuah ve thin a, CTS te leh an dinchhuah vena turin theihtawpin hma a lak sak thin te hi a ropui ka ti. Mahse Mizote hian kan thil hriat tur pawimawh em em chu, kan thil thar chhuah ve te hi Mizo te hian i hlut thiam ang u, kan hlut thiam loh chuan Industry lo dingchhuak te hi an thi zel dawn. Keimahni a ram mite hi a ni Zoram siamtu tur tih rilru pu a, heng fabrication industry a ni emaw, processing industry a ni emaw, industry hrang hranga kan thil thar chhuah te, Aloe Vera industry a ni emaw, kan sahbawn siam kha a lo tha lo deuh a nih pawhin hmang hram hram ang u, kan thil thar chhuahte kan inhlut tawn hian ram a thang dawn a ni tih kha Industry hnuaiah hian sawi tur a tam a, ka sawi seng lo nise. A pawimawh berah chuan production kan la nei chhunzawm chho zel dawn, a ram mite hian. Pu Speaker, a zo teng teng kan tih chuan industry hi a thi zel dawn.

A tawp berah chuan Trade & Commerce. Zokhawthar-ah nasa takin hma an la a, khawthlangah pawh an la a, kan Trade item hi 60 chuang zet a ni a, hemiah hian Mizote hian thawnchhuah tur kan nei lo erawh hi chu a na ka ti. Zoram thanna tur hian khilai insumdawntawna kan hman theihna turin sorkarin nasa takin hma a la a, NLUP

hmanga kan phur chhuak chhova, thawn chhuah ve tur kan nei ve a nih si loh chuan item 60 chuangah hian chhak lam atanga lo chhuk tur vek a ni. Khatah khan a ram mite enge kan that vena tur ? Mi tlem te sumdawng mite an thang a nga, a ram mipui erawh chu kan thang dawn lo a ni. Chumi a nih avang chuan NLUP hmanga kan inbuatsaih si loh chuan Industry hrang hrang lo ding chhuak tur nen, chung ho hmanga thawnchhuah ve tur hi kan ngaihtuah ve a ngai a ni. Chutiang zawnga rilru kan put loh chuan kan hlawhchham chho ang tih ka hlau a ni.

Thingsai bul, hmanni ka sawiah khan market shed ala ding a, khi khi Trade & Commerce Department-ten min hriat sak a, min bawhzui sak turin ka'n sawi nawn leh a ni. A pawimawh hmasa ber-ah chuan Border trade kan tih hunah ramchhung atanga thil thar chhuah kan neih si loh chuan kan ram hian hlawkna tih tham kan tel tak tak dawn chuang lova, sumdawng tlem azawng an hlawk ang. Chumi atan chuan NLUP hi hma hruaituah hmangin theihtawp chhuaha kan beih a ngai a ni tih ka'n sawi duh a ni.

**Dr. NGURDINGLIANA** : Pu Speaker ka lawm e. Min koh hmasak kha kan beisei deuh a nia. A hmasa berah chuan kan Budget hi ka'n bih chiang ve a, nikum lamah khan tharlam deuhin he House zahawm takah kan lo lut ve a, finance lam hi ka thiam loh zawng tak a ni a, tun kum chu ka'n zir chiang ve ang e ka ti a ka'n zir chiang ve a. Budget tide tak karah kan Finance Minister leh Department-ten fel fai taka sector allotment bakah office expenditure turte an han siam thei hi ka fak takzet a ni.

Tin, Excise & Narcotic Department-te hun chep tak karah rules fel tak mai in rawn duang chhuak te, a Department anga staff lak belh tur leh nakum lawka MLPC Act kan lak luh turah te in inbuatsaih naah lawmawm ka ti takzet a. Minister chak takin a hruai che u a, he rules te pawh hi kan hman hunah in ngaihtuahawm dawn lo hlein ka hria a, thlamuan thlak ka ti.

Home Department-ah hian ka'n luh duh chu, kan Minister leh a kaihhnawih zawng zawng chungah lawmthu ka sawi duh a. Nikum kan inthlanah khan ka bial chu in hria a, hel bial kan ti mai a, inthlan boruak tha lo thleng em em lovin invauna chu tam hle mahse felfai taka kan inthlan theihna te, Police Department felfai taka in rawn ruahmannaah te lawmthu ka sawi duh a. Demand ka'n en a, material leina tur kha tlem deuhvah ka ngai deuhva. Amaherawhchu, cheng nuai 5 chuang in rawn ruahman a, a lawmawm ka ti a.

Kan police-te hi kan sawi thin a, India rama police tha ber kan tih lai hian kan ralthuam lamah engtinge hma kan lak tih ka lo chhui ve thin a, tunah chuan thlamuan thlak takin sum pawh kan han buatsaihsak thei hi lawmawm ka ti a. Police Department-ah post technician hi a tam lutuk thin a, mahse kan minister chak takin tunah chuan an tithawl zung zung a, hengah pawh hian lawmawm ka ti a ni.

Tin, Agriculture leh NLUP hi a in link a, kan bialah hian kuminah Balhla, Sapthei, Sawhthing kan ching hnem em em a, chu chu NLUP rah zelah ka ngai a. Khanpui tlang dungah phei chuan Mizoram chhungah hian kan thar hnem ber awm e, mipakhat a hming ka sawi thei mai lova, ani phei chuan cheng nuai 160 chuang Sawhthing atang hian a thar a ni. Kan policy kal chho zela kuthnathawk tuten an hmuh a ni a, hei hi kumtharah pawh Balhla te, Sapthei te kan ching dawn a.

Kan Bial kan vanneihna chu kuthnathawktu bial a nihnaah kan sorkar hotuten NLUP Scheme piah lamah RKVY hmangin chhungkaw 569 hnenah tanpuina ₹ 120000 pek a ni hi a lawmawm ka ti a, kan mipuite pawhin kan hotute kalin tlang lawmthu rawn sawi rawh min ti thin a, Agriculture leh NLUP hmalaknaah hian lawmawm ka ti a, thlamuan thlak ka ti a ni.

Tin, Rural Development Department bikah hian kan bial chu min luhchilh lutuk lova, DRDA kal tlang hi a ni deuh mai a. Amarawhchu, hei Mizoram works component-ah hian Budget-ah nuai 3500 chuang hei hi chu tun kumah a zar kan zo ve theih chuan a lawmawm ngawt ang.

School Education hi kan bialah work communication hi kan ngaipawimawh a, kan hotute hmalakna zarah kumin HSLC exam-ah pawh khan 100% passed school 8 kan nei a, topper-ah Phulen High School atangin 6-na kan nei bawk a, a lawmawm ka ti a. Kan tang nasa a ka zin nikhua te pawh hian inspection hi ka nei thut thut a, teacher-ten in course in zo tawh em tih leh thil dang en hian ka tlawh thut thin a, chumi rah kal zelah chuan hlawhtlinna kan hmu a ni.

Transfer dil hi kan Minister-in MLA kuta a dah hi a fuh lutuk a, zirtirtu engemaw chhuanlam siama transfer dil hi chu ka phal miah lova, chumi a pawimawh zia chu inspection hi a ni. Kan Minister-in min lo ngaihthlak sak sela, inspection a tam pauh

leh zirna In in hma a sawn, inthlahdahna te hi khawtinah hian a tam a nia, tunah primary level-ah training-in kan ko thla a, chumi piah lamah chuan SCERT hi hmang tangkai ila ka duh a. A chhan chu mithiam tak tak awmna a ni a. Field visit nei ngun se, refresher course, high school level-ah, middle-ah, primary-ah a tam pauh leh zirnain hma a sawn ang, field inspection hi a tlem tawh lutuk a. Directorate atangin DEO te kan nei a, Office-a kan thu hnur hi a fuh lem lo, chu ai chuan chhuak tam se mithiam tak tak kan nei a, tun aiin zirna hian hma a sawn ang tih hi ka ring tlat a ni.

Industry chungchangah chuan ka hmaa rawn sawi kan member zahawm tak Pu Siamkunga khan a rawn sawi tawh a, kha chu ka rawn belh lo anga. Trade & Commerce bikah hian zawhna leh chhanna hunah khan ka sawi tawh a.

Tunah hian Trade & Commerce hi minor department a ni a. Amaherawhchu, kan hotute policy look- east policy kan hotute kalpui mek tun atanga hun reilote kum 5-ah hi chuan major department a ni dawn, chu chu keima lo hmahlir ve dan a ni a. Tuna kan Minister-ten hma in lakna, kan Department Officer-ten hma in lakna hi a tha ka ti a, helaia khaw thar mai ni lo, Bangladesh mai ni lo, khawthlang lam ram te pawh milin he kan intodelhna kawngah hian department hian mawh in phur hle a ni. Chuvangin hmahlir ruahmanna fel fai tak in neih hi ka ring bawh a, tin ka ngen bawh che u a ni. Ka hun a chep bawh si a, sawi tur ka la ngah a Pu Speaker, mahse ka duh tawh mai ang e, ka lawm e.

\* Speech not corrected.

**SPEAKER** : Nih leh kan chawl rih ang a, chawhnu dar 2-ah kan kal khawm leh dawn nia.

## **2:00 P.M**

**SPEAKER** : Aw le, kan Minister zahawmtak-te pahnih Demand hrang hrangte sawiho kha kan tan leh ang a. Mi pariatin chawhma khan kan sawi tawh a, a pakua-na atan Pu Rinthanga i lo ko ang.

**Pu K. LALRINTHANGA** : Pu Speaker, ka lawm e. Demand No. 7-na atang khan han sawi tan ve ka duh a. Vawiinah MLPC Rules kan lo nei ta hi lawmawm ka ti a. Zu chungchang Mizoram-ah kan sawi tam hle tawh a. Thil chiang reng mai chu zu hi a in duhtu an awm chhung chuan a zuartu hi an awm dawn a ni tih hi a ni. Chuvang chuan, Dan anga kan Minister zahawm

takin ruahmanna a rawn siam hi a tha ka ti a. A khuahkhirhna te a rawn siam hi lawmawm ka ti a. He Dan/Rules kaltlang hian mumalin zuruite kan khuahkhirh thei tawh ang a. Zu in duhte tan zu tha in tur a awm tawh ang a. Kan thalaiten zu chhia nasa taka an in thin hi a lo reh thei tawh turah ka ngai a. Chuvang chuan lawmawm ka ti em em a ni.

Demand No. 16-na, Home Department-ah khan thil tlemte sawi ka duh a. Vairengte-ah khuan O.C kan nei thin a, O.C dah khu fimkhur a ngai hle-in ka hria. A tlangpui thu-in vai, Mizo tawng thiam an rawn awm thin a, khung hote leh mipuite inkungkaihna khu a that a ngai viau a, boundary area kan nih avangin. Chuvang chuan, a theih phawt chuan O.C hi Mizo vaitawng thiam tak hi awm thin se a tha-in ka hria a.

Engemaw harsatna awm deuh hlekin Cachar boundary-a mipuite leh Cachar Police te nena kan indawr changin kan mipuite hian kan O.C ten hnam dang nihna avangin phai lam hi an tan deuh hlek zawk ni te hian an hre thin a. Chuvang chuan, O.C hi vai ni lovin, Mizo vaitawng thiam tak awm thei thin sela tha-in ka hria. Kan Minister zahawmtak hnenah ka sawi tawh thin nain han tarlan ve leh reng reng thain ka hria a, ka'n tilang ve leh a ni.

Tin, chutih rual chuan kan minister hian Police Station sak turin min han ruahman sak a. Amaherawhchu, nikum lama sum dah tawh kha tun thleng hian sak a la ni lo a. A hmun turah a buai deuh niin a lang a. Kan Police Officer-ten a hmun nasa zawkin zawng sela buaipui deuh tak tak sela a thain ka hria a.

Tin, Saiphai-ah pawh khuan Check gate tur ruahman a ni a, Building-te sakna turin tender koh a ni a. Kumin kumtir khan work order-te pawh pek vek tawh a ni a. A hmun a la fel hleithei lo va, chu pawh chu kan Minister zahawm takin min han bawhzui sak leh ta sela a lawmawm dawn em mai a ka han tarlang ve leh a ni.

Agriculture chungchangah hian ka sawi duh chu Mizoram Constituency hrang hrang ngaihtuahin Serlui bial-ah khuan leilet a tam berin ka ring a. Buh pawh kan thar hnem berin ka ring a. Chutiang a nih avang chuan Bilkhawthlir tlak lam, Kolasib Constituency te nena an intawm tur buh herna khawl tha deuh, lian tham deuh hi bun ni ta sela, kan mipuiten an tangkaipui hlein ka ring a, chu chu ka han tarlang a. Chutih rual chuan chhuah lampangah pawh Saiphai te, Chemphai te, khulai phaizawl zaupui maia kan buh thar te khu a her nan buh herna khawl tha tak din ni ta

sela, buh thar te pawh hi kan mipuiten thahnem an ngaih phah deuhin ka ring a chu chu ka han tarlang a ni.

Rural Development-ah hian NREGS leh IWDP kan tih chi vel lo hi chuan thingtlang hmar lam hi min cover vak lo ni te pawh hian a lang a. Kan mipuite cover-na tur atan hian sum hi dah belh dan kawng (Social Education kan tih ang te hi a awm ta si lova) awm thei sela a va tha e aw ka ti a. Social Education awm lai khan Hall sak bul kan tan ve hlawm a. Nimahsela, sak zawh lohin a rel ringawt-te a awm nual a. Chungte chu sak zawh a nih theih nan Social Education lamah hian pawisa tlem azawng chu han dah leh ni ta sela kan mipuite an va lawm dawn em tih ka han sawi duh a ni.

Demand No. 20-na, School Education chungchang-ah khan ka rawn tarlan duh chu, “kan Minister-in MLA te hriatpui lohin zirtirtu-te transfer a ni lo vang” a tih rual hian, MLA te rawn lova transfer hi a awm leh thin a. Kan Minister hnenah pawh kan thlen thin a. Chiangkuang deuh ziakin official-te hnenah hian thlen ta sela, hrih hre ta sela a thain ka ring a. Keini bialah te pawh kan officer hote hian kan naupangte an hmangaih vak lo a ni mai awm mang e aw tih ngaihtuahna awm thei tur khawpin thil a kal a. Entirna pakhat han sawi ta mai mai ila-Thingthel ah chuan zirtirtu pakhat chuan ka hnenah transfer vawi tam tak a rawn dil a, mi hrang hrang a rawn pun tawh a ni. Mahse, thawhpui dang pakhat chauh a nei a, ani transfer a nih chuan midang pakhat chauh khan a zirtir tawh dawn a, ka phal ngai lo a ni. “Naupangte i hmangaih lo em ni” ? ka ti a. Mahse, chutih rual chuan kumin kum tirah khan kha transfer beisei thina kha transfer a ni ta a, a thawhpui pakhat training-in tirh a ni baw k a, zirtirtu an awm ta lova, chutiang chuan rilru a tina hle a. Amaherawhchu, kan hotute hnenah kan han sawi nawn leh a, min laklet sak leh a. Chutiang deuh chuan Vairengte lamah-te pawh a awm a, North Chawnpui lamah-te pawh. Chutiang chuan zirtirtu awm mumal lovin, naupang engemaw zat awm ve baw k siin an awm thin a. A hrehawm hle a, rilru a na a. Na deuh hleka Minister-te hnena han sawite kha lehlamah chuan a inthlahrunawm ve baw k si a, ngaihtuahna thui deuh zawk kan siam hi a tha-in ka hria a.

Tin, School Education-ah hian SSA te hmangin school thenkhat chu zirtirtu han thuam belh-te pawh a awm rual hian kan khamkhawp lo em em a. SSA din belh lo hian, school awmsa-ah hian zirtirtu tam zawk SSA fund hmang hian dah belh zawk ni ta sela kan tangkaipui zawk mai awm mang e aw ka ti a. Tin, UPS School dinna thenkhatte chu keini Bial-ah chuan vai ho leilet enkawl na hmunah-te a ni a. Buarchep a Primary School an dinah chuan, a tirah vai naupang pakhat chauh sikul a kal a ni. Tunah chuan 9 an awm a, a bul lawk ah Mizo sikul

kha a awm ve a, zirtirtu pakhat chauh a awm a. UPS teacher erawh kha chu an awm ve leh nual si a, khatiang kha a awm dan a nih avangin kan Minister hnenah pawh ka thlen a, min siamrem sak a. A policy ang zawng hian ngaihtuah ta zawk ila. Fund awmsa hmanh hian sikul awm sa te tanpuina turin ruahmanna siam ta ila kan tangkaipui zawk deuhvin ka ring a. Chutiang te chu ka han sawi a ni a, sawi tur a awm nual a. Amaherawhchu, Pu Speaker, pakhat chiah ka han sawi leh lawk teh ang.

Trade & Commerce chungchangah hian tun term ral ta chung zawng khan Trade & Commerce-ah project min siam sak turin ka dil a, Director-te pawh an inthlak a, mahse tun thleng hian min la siam sak lo va. Horticulture Department atangin Road site Market min siam sak teh u ka ti a. A kawng awm dan chu, “Trade & Commerce atangin project siam tir ula a fund chu keinin kan lo dil ang,” tiin Horticulture Director-ten kawng min kawhmuh a. Term hmasa kum nga chung zawng khan ka dil a tun thleng hian min la siam sak lo a ni. Saiphai-ah khuan Vairengte-a market kan neih thin ang khuan market kan nei ve a, hmun hrang hrang atangin bungrua an la thin a ni. Tun thlengin market building kan la nei ve lo va. Hemi tihpuitlin theihna tur atan hian kan Minister hian ruahmanna min siam sak thei se ka lawm ngawt ang tih kha ka han tarlang duh a ni e. Pu Speaker, ka lawm e.

**SPEAKER** : Pu Hmingdailova Khiangte.

**Pu HMINGDAILOVA KHIANGTE** : Pu Speaker ka lawm e. Ka sawi lo dawn emawni chu aw ka ti deuh a, mahse, sawi loh atan chuan a uiawm deuhvin ka hria a, a zawng a zain cover thei lo mah ila, theih ang tawh tawkin cover ila a tha awm e.

Pu Speaker, a hmasa berin Demand 16-na hi thui tak sawi lovin ka sawi duh danah chuan he Zoram-a sorkar awm tawh zawng zawng leh awm mek, Congress term hmasa leh vawiin thlengin kan House Leader zahawm tak Pu Lal Thanhawla kaihhruai Congress sorkar-in Home Minister zahawm tak Pu R. Lalzirliana, remhria leh huaisen kan nei hi Zoram hi a vannei hlein ka hria tih ka sawi duh a ni. A hun chungin Law & Order kenkawnna lamah hei aia muanawm hi a awm chuang lovin ka hria a, a lawmawm hle a ni.

Tin, sawi kim theih a ni lo vang a, mahni bial lamah duhthawh thilah Kawnpui Police Station han sawi lawk ila. Kawnpui Police Station building thar term hmasa khan min pe a kan lawm khawp a, a hmuh pawh a nuam. Amaherawhchu, chumi hma term



chhung khan quarter te an lo sa hlawm a, mahse tunah chuan luah ngam mang loh, luah loh dawn chuan quarter awm si lo, mangang takin Police te an awm a. Khu khu min en sak sela a lawmawm hlein ka ring. Tin, kawngpui kama awm a ni a, compound fencing a awm lo va, a mawilo hle mai a, tin, fencing khu chu awm sela a lang mawi hlein ka ring a, ch chu ka'n sawi duh lawk a.

Tin, Demand 31-na Agriculture hi sawi a chakawm hle mai a. Agriculture product-ina a tihthat hi kan sawi seng lo vang a, NLUP lamah lut lawk ila. Mizoram-a U.T. kan niha sorkar siam a nih khan sorkar siamtu zawng zawngin economic policy an nei vek a ni. Entirnan, P.C. khan Garden Policy an nei a, MNF Pu Laldenga hun lai khan Jhum Control an nei a, Pu Zoramthanga hun lai MNF khan MIP an nei a, an vai hian an hlamzuih vek a ni tih hi thil dik sa a ni a. Chutih lai chuan vawiina kan House zahawm tak Pu Lal Thanhawla kaihhruai sorkar chuan miretheite, pachhia, rahbi tleu laklawh te dinhmun tha zawka an din theihna turin ngaihtuahna nasa tak a seng a. NLUP hi an rawn phuahchhuak a, chu NLUP hlawkna chu Zoram-in a seng mek a ni tih hretute kan ni. Chutih ruala Opposition party hruaituten mipui rilru tibuai thei an sawi fo hian ka rilru a kap deuh a, chu chu ka'n sawi duh lawk a. NLUP leh Budget leh sikul 337 upgradation-te hi han sawi leh ka duh a.

Kum 2008 campaign hun tep tawhah khan sikul 337 kha an upgrade thut mai a, a detail chu ka sawi lo vang a. Chu chuan 2008 leh 2009 budget-ah khan budget provision engmah a insiam lo va, kum tawp lama upgrade tawp a nih avang khan. Chuvangchuan, harsatna tam tak a siam a, detail-in kan sawi seng lo vang. Sikul 48 kha provincialised a ni a, a dang eng emaw zat kha Aided school ang a lo ni a, hlawh tam tak an lo hlawh tawh a, a bak zawng kha lumpsum cheng 150000 leh cheng 120000 kum khata pek theih chi an awm hlawm a. Chung zawng zawng pawisa chu 2008 leh 2009 khan siam tel an ni lova, khawi atangin nge kan pek ang ? Chutihlaia kan Minister zahawm tak Pu Sawta kha a mangang hle a ni. A vaiin note an insiam vek a, hei hi CLP-ah kan vawm let leh dawn nge, engtin nge ni ang ti reng reng khan kan hotute lu kha a hai rei hle a. Chutih laiin "NLUP atan Budget atangin department tam tak chan tur pawisa an pawt chhuak a, NLUP ah an chhung lut a. Chuvangchuan, sorkar hnathawk tam takin hlawh an la thei lova, a bik takin zirtirtute ho hi tiin" hotu thenkhat, opposition lam ami ten an sawi thin a. Mi rilru a tibuai a an awih lek lek hlawm a ni. Amaherawhchu, a ni lo tih a chianna chu NLUP kha vawi thum sum siam sak an ni tawh a. A hmasa berin vaibelchhe 324.8 a ni a, a dawtah vbc. 324, a dawtah 317 a ni a.

Vawiinah pawh hian 317 aia tam buatsaih mek a ni. NLUP pawisa atan khawi department atang mahin sum kan pawt lova, NLUP pawisa atang hian department tam takin sum an puk zawk a ni tih kan hriat a tha awm e. Chutilaiah chuan mipuite tichiai thei thu tak lo sawi sawi hi a chi tawh lo tih kha he House zahawm takah hian ka'n sawi duh deuh a ni Pu Speaker.

Tin, Demand No. 38 Rural Development Department hi thingtlang lamah chuan kan inghahna ber a ni a. Ni za chhung inhlawhfaknate, mi harsa tana tangkai tak rangva sem te, in kang te pawh kan han tanpui ta nghal a. Minister zahawm takin kan han ziah hi chuan kan ziah a hmuh ve leh a rawn sanction nghal a, phur takin kan phur chhuak nghal thin.

Tin, pawimawh deuh pakhat chu Kolasib District-a constituency pathum awmah khuan vawikhat lai khan namen lovin kan buai a, Job Card neitu tam takte paihsak hlawm an ni. Tun tum inthlan dawn phei kha chuan, 'ka pu, tun tum chu in tling tawh lo vang,' min ti mai a. Amaherawhchu, Kolasib District chauh a nih avangin kan Minister zahawm tak leh chak tak hian a enfel a, Mizoram-a Job Card an pek dan pangngai ni ngei turin an kal leh tak avangin a chungah kan lawm hle a ni tih kha tlai khaw hnuah ka'n sawi leh duh a ni.

Tin, thil pakhat, keini MLA naupang tak khan officer te pawh chaltlai tak emaw ngeiawm deuha han biak te kha a rem lem lova, a hmingin officer kan lo ni ve tawh bawk nen. Amaherawhchu, min be tha duh deuh leh min be tha duh lo deuh te kha chu kan hre ve tho a, mahse kan counter let lem lo. MLA-te chuan material component atanga departmental work an ti fo mai kha hnawk kan ti viau mai. Khatiang khawpa thawh tur kha chu tunah hian material component-ah hian pawisa phei chu a tam tawh lo a, departmental work min tih khum fo kha a nuam lo deuh riain ka hria a, vawikhat lai phei chu kan Minister zahawm tak pawh hi ka hrih nghe nghe a.

Tin, School Education ah hian sawi tur chu a tam khawp a. Term hmasa pawh khan Pu Speaker, he House zahawm takah hian kan sawi hnem khawp mai. A tlangpuiin kan thiante, kan hotuten an sawi tawh a, kan Minister zahawm tak Department changtute hian Matric result 'NIL' neitute hi engtin nge an enkawl ang aw! tih ka ngaihtuah a. Kum hma lamah phei chuan Mizoram pumpuiaah Government School engemaw zat telin High School result 30 hi an NIL fo a ni. Tunah hian tlemin a ziaawm deuh tawh

a, nikum hmasa khan 8 an NIL a, nikum khan 18 an rawn NIL leh a, henge hi min en ngun sak thei deuh angem aw tih ka'n thawh duh deuh a. Tin, ka bialah chuan ka tui zawng a ni deuh emaw ni ka tlawh zo vek a, Primary Sikul hi ka tlawh kim lo deuh a, a dang hi chu ka tlawh zo vek a. Zirtirtu leh school naupang ratio hi a buaipuiawm viauin ka hria a. A changtu Minister hi kei aia hre zawk leh buaipui zawk pheii chu an ni lutuk mai a.

Han sawi duh pakhat ka neih chu Hortoki dai i ti mai ang Tiauzau khua, khaw te reuh te, Tuikuk hliir awmna, in 10 te chu chhiar tur a awm ang chu, tah khuan Primary School a awm a, school naupang 9 an awm a, zirtirtu 2 an awm a. Kumin atang khan Middle School kan han hawng leh a, zirtirtu 3, school naupang 3 an awm a, Hortoki atanga Tlawng lui kan ami khu a ni a. Leikhain ka ziaik tawh a, Hortoki Primary School-I ah hian school naupang 105 englaipawhin an awm a, zirtirtu 3 an ni a. Hortoki Primary School-II ah hian hming ziaik chu 166 an ni a, a kal hi chu 140 aiin an tam ziah a, tah chuan zirtirtu 3 an awm bawk a. Chuvang chuan sawmi Tiauzau atang sawn zirtirtu engemaw zat hi on attachment-in emaw min tihsak ru ka ti a, ziaikin ka pe a, waviin thlengin engmah tih chu ala awm lem lova. Chu chu a tul pheii chuan a changtu Minister leh Parliamentary secretary zahawm tak te pawh ka la titipui zel tho ang a.

Tin, chu lo lehah chuan engvangin nge Matric result hi a chhiat em em kan tih chuan inspection cell hi an awm ta lo niin ka hria. Term hmasa pawh khan kan ti thin a Pu Speaker, keini MLA te hi inspection hnathawktu kan ni ber a, min ring law law ula, kan report te hi min lo en ngun sak in action la mai teh u, te kan ti hial a nih kha. Chu chu waviinah hian Minister changtu ka'n hrilh duh deuh bawk a, inspection cell emaw chu a awm tul hlein ka hria. Tin, zirtirtu lakah khan a theih hram chuan kan member pui zahawm tak tak ten an sawi tawh ang khan khua amite hian thawk thei hram se a tluk a awm lo. Min transfer leh rawh u tih reng reng leh waviinah pawh hian Tuirial atanga Aizawl-a attachment a kal ta, mahni post keng ta daih SSA post-ah hian kutzungtang hian a daih lo a ni tih hi kan la hre reng a ni. Chu chu duhthawh thilah ka'n sawi ve duh a ni e.

Tichuan, sawi tur a tam khawp a, pakhat ka'n sawi duh lawk chu. (Speaker : I hun kha i hmang zo tawh a nia.) Minute 1 lek Pu Speaker. Industry lamah khan sawi ka'n duh lawk chu, Zanlawn-ah khuan natural gas awm theihna zawn mek a ni a, tunah hian khur lai

leh turin an inbuatsaih mek a, kan Minister changtu hnenah lawmthu ka sawi duh a, min chhunzawm sak zel ka ring. Tichuan, kan Minister zahawm tak pahnihte chan Demand-te hi vawiinah hian hun tawite chhungin thiam ang tawk tawkin ka rawn support ve a ni e. Ka lawm e.

**SPEAKER** : Khaile, sawi tur dang kan awm tawh loh chuan a changtu Minister zahawm tak Pu Rinawma. Tlemin in inngaitlawm lutuk a, in tho tlai deuh a ni.

**Er. LALRINAWMA** : Pu Speaker, ka lawm e. Nia, hei vawiinah Demand for Grant hrang hrangte a'n awm a, a Demand number te tein han sawi ila. A hmasa berah chuan Demand no. 7, Excise & Narcotic Department hi. Hei MLPC Act te hman a lo tul tawh a, ka zawhnaah khan constable te lakbelh theih an ni angem tih kha ka zawt a, a harsat thuin min chhang a kan question-ah khan, han lakbelh theih nise a lawmawm hlein ka ring a. A chhan chu, zu chhia a lo tawp ang a, zu thain hi kan tam dawn lutuk in ka hria a, chu chuan kan tualchhung nunah thil thui tak a nghawng dawnin ka hria a, chu chuan Law & Order thlengin he Excise hna hi a tipung ngei ngei dawn a. Kan khawtlang nun a lo nawm zawk nan kan Minister zahawm tak pawhin tan han la se a lawmawm khawpin ka ringin ka duh tak meuh meuh a, a lakbelh lai a hi.

Tin, Demand No.16 naah hian kal leh ta mai ila hun a rei loh avangin, Home Department bikah hian. Kha 1500 lai mai kan Minister zahawm takin a lak loh thu a sawi a. Hei pawh hi han ngaihtuah vang vang chuan mihring kan lo pung zel a, force kan indaih lova, beat post han hawn belhna tur te a then te phei chu out-post te pawh a ni ang a, khatiang ang kha kan mamawh tawlh tawlin ka ring a, churang chuan hun lokal turah pawh a lakbelh theih dan te leh kan post ruak vawiina kan hnawkhah loh te pawh hi sum te harsatna han pel deuh hret selangin hma han lak a tha hlein ka'n ring bawka ni.

Tin, Demand no. 31-na Agriculture hi, hei hi a pawimawh khawp mai a. A chhan chu buhfai kan thar tam a pawimawh a. Vawiina kan Budget a kan sawi tam ber pawh kan Finance Minister zahawm takin buhfaia kum khat chhunga crore 152 vel kan subsidy chungchang kha a a ni a. A phur a rit hle a ni tih te pawh kan hria a. Churang chuan Agriculture lama inchhanchhuah dan hi kan zawn a ngai takmeuh meuhin ka hria a

ni. Chuvangin helama tan kan lak leh zual a, kan tang viau nain tan kan lak leh zual kha a tha viauin ka'n ring a ni.

Kan Bial lampang khi han sawi kai leh lawk ila, hei kan Minister zahawm takte pawh han tawiawm; khilayah lo neih lam tih hmasawnnan te pawh nasa takin hma han lak leh an lo neih tawh sa te han tawiawm te a ni a. Tin, khatiang zel khan khi Baktawng atanga Tuirial inkarah khian Link-road an mamawh em em mai a an khua khian. Khatiang khua renguangah tuirial Link-road an la nei ve lova. Hetah Phulpui lam atangin Hmuifang atangin an lokal thin a, a buaithlak thin khawp mai a. Hetah Hmawngkawnah, Chawilungah, Hmuifangah an rawn chhuak thla a khatiang khan khilayah khian Baktawng ram khing 'Khangzawl' tih te an ram tha awmkhawmna a ni a, hei hi hma han lak theih ni se a lawmawm khawpin ka ring a. Tin, tunah pawh Tlungvelah khian Bawkbawn Kut te hman an tum a, Aizawl bawkbawn zawng zawng hi chu an supply emaw tih tur khawpa kan bial khi chu hnathawk nasa an ni a. Tunah Tlungvelah khian hma an han la a, khangte kha report ka'n chak ve deuh baw a.

Tin, Demand no. 38-na Rural Department bik hi han sawi leh ka'n duh chu, thingtlang bialtute chu min nghawng nasa khawp mai a, Department pawimawh tak mai, an thawh zawng zawngte hi chu sawi sen a ni lo zawk khawp ang tih a ni a. Chulai ka'n sawi duh deuh bik a chu IAY chungchangah hian, hei IAY hi an hlu khawp mai a, in neilo ten in an lo neih theihna tur leh michhumchhia zawk ten in tha an lo neih ve theihna te a ni a. IAY guideline para 3.11 ah khan IAY beneficiaries te hian (DRI an ti mai a) Differential Rate of Interest Scheme hnuayah hianin cheng singhni thleng hi loan lak theih turin a inziak fel a, 2013-2014 chhung khan, tunah ka zawhna kha a chhuak ta lo va, Mizoram pumpuiah hian DRI Scheme hnuayah hian tumah loan pek an lo ni lo tih a inziak a. Khangte kha kan Minister zahawm tak hian min lo ennawn thei se.

In nei loten an lo neih a, in te an lo neih hnuah an inchhung furniture te leh thildang te pawh kha scheme hnuai atang khan cheng singhni te an lo lak khan 4% chauh a pung a awm a, inchhung bungruate an lo lei ve thei dawn a ni. He DRI Scheme vawiin thlenga implement lohva awm hi min lo chhinchhiahsak se ka ti tak meuh meuh a, A chhan chu mi harsa zawkte in sak alo nih tawh a, inchhung bungrua an lo tihchangtlun ve theihna tura remchang tak nia ka hriat avangin khawngaihni kha kha min lo chhinchhiahsak se ka duh a.

Tin, ka Bial chhung Khawbelah sawn hun rei tak atangin town hall kan rel ut mai a, a ban a awm a, a beam a awm a, a dang a awm thei si lova. Khilai khi a mangan thlak khawp mai a. Khawngaihin hmalak dan tur te min lo enfelsak theih chuan ka lawm takmeuh meuh ang tih kha ka sawi duh bawk a ni.

School Education chungchang, Demand No. 20 hi ka'n sawi kai leh lawk ang a. School Education-ah hian Mid-day Meal chungchang hi a hlu si a, lehlamah English medium zirtirtute an vuina deuh chu naupang Central-a zuk dil dawn lai hian min chhiar tel si a, a pek hunah min pe leh lo daih si tih hi an vuina thu leh hla ber pakhat a ni a. Chuvangchuan, naupangte hnena kan pe a nih chuan English medium, private te pawh hi a kangkai thei lawm ni, a tih ve theih lawm ni aw ka'n ti deuh a. Khawpui te chu khawsak te pawh a zia deuh a, anni zawng English medium a dah thei te pawh an ni te in lo ti a nih pawhin thingtlang lama kan private school-ah te tal hi chuan kang kai thei sela chuan thingtlang bialtute hi kan lawm khawpin ka'n ring a ni.

Tin, a dang lelah chuan zirtirtu naupang ratio kan tih mai, teacher – pupil ratio an tia maw ni, zirtirtu pakhatin naupang 30 tih lai vel bawr hi kan buai khawp mai a. A bik takin school pakhat a bikin primary ah zirtirtu pakhat te pahnih te kan lo nei a. Tah chuan a naupang ang zawngin kan lo nei tlem leh si a. Class room kha room engemaw zat te a lo ni ve a, pakhat khanin banglaiah te a dingin a, a han veng ta thin kha a ni a. Helai tehkhawng ringawt mai hi keini thingtlang lam tan chuan kan tawk lo a ni. A naupang zatah chuan kan zat lo a ni maithei a zirtirtu pakhatin a enkawl turah khan, a room lampang, class zatah khan class li te an lo awm a, entirnan, khang kha kan buai a ni tih lai kha min lo hriatsak ta ula. India ram tehkhawng ringawt hi chu keini thingtlang bialtu tan chuan a tawk zo lo a ni tih kha ka'n sawi duh a ni.

Tin, nichina ka hmaa Member zahawm tak takten an sawi Inspection tih lai kha ka ngaipawimawh khawp mai a. A chhan chu kan naupan laiin inspector lo kal dawn hi chuan kan inphiat fai nasa thei thin khawp a, sikul zawng zawng hi kan lo inbuatsaih a. Khatiang khawp khan kan lo er thin a zirtirtute leh naupangten; chuvang chuan Inspection lai kha han awm leh thei se tih kha a tha khawpin ka ring a.

Tin, Bialchhung lampang han sawi ka duh chu Darlawngah khian Primary school sak tur an nei a, cheng nuai 30 a rawn kal dawn e an ti a nikum lam atang khan phur deuhin an nghak a, an la nghak chhuak thei bawk si lova. Hengte hi min lo ennawnpui leh se a lawmawm hle ang tih kha ka'n ring a ni. Tin, kan bial chhung chu industry hmunpui a ni ber awm e ka ti a,

Mizoram kawngkhar frame zawng zawng pawh hi kan thawn chhuah vek ti ila chu a sual deuh maithei a, a rate hi chu kan siam a ni tih kha chu ka han sawi ngam ve hrim hrim a. Chuvangchuan, Industry-ah te pawh cluster centre te a bik takin Baktawng Tlangnuamah te min buatsaihsak a, belchhunna tur chungchang te pawh hma an rawn la a, a lawmawm takmeuh meuh a. Chutihruual chuan, hma min lo laksak lehzel turin chak zawkin min kalpui thei ula a lawmawm hle ang. A chhan chu ka bial chhung hi mi taima tak tak an ni a, nitin an rawn phur thla a, Burma lamah pawh thutthleng sei nen lam kan zuar chhuak chho tawh a. Khangah te pawh harsatna kan rawn thlen a nih pawhin min lo hriatthiamsak ula Demand No. 44 na a kangkai nghal a nih chu, Trade & Commerce bik khilai Land Custom velah khian kan mi leh saten thutthleng sei te an phur vu vu a nih pawhin min lo hriatthiamsak ula ka'n duh a ni.

Tin, Mining bikah Industries hnuaiyah hian kan ramah Mining chungchangah leilung hausakna zawngin company hrang hrangte an lo kal a. Heng an hnathawh chungchangah hianin kan thalaite tan hian reservation te a tih theih lawm ni. Thalai tam tak vawiinah hian Tuipui bialtu zahawm tak hovin kan thawn chhuak chum chum a, chutihlai chuan kan tualchhung hnai lamah hian enge awm thei tih hi bengkhawn ang u tih hi ka'n sawi duh a. A chhan chu rampawna hna kan zawn rualin ramchhunga mi pawh hi kan vai tur a ni. Chumi mai piah lamah kan vela hna awmte thawh thiam tum ila hna hmuh loh a awm lo tih lai te hi kan chian tlana kan thalaite pawh kan hrihl a ngaiin ka hria a. Kan chhehvela hna hnaivai zawng zawng hi thawh thiam tum ila. Heng Mining hnuaiya oil rawn zawngtute pawh a hna awm angah hi chuan tualchhung miten tun aia tam zawk kan thawh thiam ve angah hi chuan kan chan ve theihna turin hma la ila a duhawm hlein ka'n hre bawk a.

Helai Industries hnuaiya ISPAT te nena Lease of Agreement kan tie m maw ni, a ram inhawh tir chung chang kan ziah ah khan a tualchhung mite duhsak an ni ang tih te pawh kha kan ziaak tel nghe nghe a. Khangte pawh kha bawhzui a ni em Industries lam atang hian? Khulai thir sa tak tak zawn ringawt khu kan mi leh sate thawh tur a ni bik lova, a clerk hna emaw, a engineer hna emaw, a manager hna emaw kha kan thawk ve thei tho a ni tih lai kha ka'n sawi duh a. Khulaia thir sa pui pui zawn loh deuh pawh khu hna a tam a ni. Chungte chu Industries Minister zahawm tak hian min lo bawhzuisak se tih kha ka'n sawi duh a ni e. Ka lawm e.

**SPEAKER** : Pu T. Sangkunga.

**Pu T. SANGKUNGA** : Pu Speaker, ka lawm e. A hmasa berin Demand 20-na School Education hi ka'n sawi duh a. Sum leh pai te kan neih loh avangin, fund constraint avangin zirtirtu post hi 3000 deuh thaw a ruak a. Chutichung pawhin kan Education Minister zahawm tak hi fakawm ka ti a. Keini thingtlang kilkhawr bialtute min ngaipawimawh a, kan bial atanga transfer chhuah turah khan kan recommend-na a rawn phut hi zirtirtu kan neih phah a. Ka bial atang khian kan recommend-na tel lovin sawn ta se chuan a zahve khi an chhuah tawh ka ring a. Atir phat atang khan khilam ami an appoint thenkhat pawhin Aizawla awm an duh tho mai a, children education an ti a min rawn dil ngawng ngawng mai a. Min vote-tu pheii chu an rawn tlangnel nasa a. Amaherawhchu, kan hotupain guideline tha tak a siam avang hian an chhuak hleitheii lova. Hei hi kan Education Minister zahawm takin thingtlang mite tana a thil tha tih a tling ang a. Zirtirtu indaih loh chuanin naupang an mawl, chuan bial hi a mawl nghut mai a ni. Tuikuk lehkha chhiar thiam lo chu hmanah kan Minister zahawm tak Pu Chama khan, 'ka bialah i kal ang u,' a ti a, ramngaw humhalh kha YMA ang tein kan zuk sawi ve thin a. Tuikuk nu pakhat hi kawngah a lo awm a, "Pi, kum engzah nge i nih" a ti a, "E, keiman hre lo, ka nu'n hria ang" a ti a. "I nu chu khawng e a awm" a ti a, "a thi daih tawh," a ti a. A kum zah kha zawh chhuah ngaihna a awm lo reng reng, lehkha thiam loh pawizia kha a langin ka hria a.

Chuvangin, keini Bial kilkhawr te te, ramri hrul ami te pawh zirtirtu kan indaih loh ang ang ten min ngaihtuhsakna tur leh a chhuak turte danna guideline tha tak a siam hi lawmawm ka ti a. Tin, aiawh lak hi tha ka ti em em mai a, unofficial-a aiawh lak hi. An han damlo tlat mai a thla thum te, aiawh an lak loh chuan sikul hi an khar dawn zel mai a, danin phal ni lo mah se. Tuna zirtirtu training nichina an sawi zawng zawngte kha unofficial-in aiawh la ta lo se tihngaihna a awm lo reng reng, kum khat chu kan hnungtawlh dawrh dawn tihna a ni a. Chuvangin, hei hi chanchinbuah te dan a ni love han ti thin mahse practical field-ah chuan ramri hrula awmte leh hmun hrehawma zirtirtu ngah ve si lo, Aizawl anga English Medium School nei ve bawh si lo tan chuan hengte hi keini chuan kan thatpui a. Chubakah thingtlang lo neiha ke khi tura mang khawh mai mai tur ho kha an kamding chet ve a, nuam hi an ti em em mai a. Suit nen an zirtir ve thin a, kan bialah te pawh pawisa hi a luh pahin ka hria a.

Chutih rual chuan tun hma atangin Mathematics teacher leh Science teacher hi rule-ah a awm hrang lo an ti a, (a tlatlum tlum leh a engemaw lak chuanin) school tam takah chuan Science leh Mathematics teacher kan nei lo thin a, tunah chuan kan in prove ta viau a. Tun hnaiah pawh ka bial Farkawna mihring tamna berah hian High School zirtirtu senior pathum kha tunah hian Headmaster-ah an kai rual dawn niin ka hria a. Mathematics teacher an neih chhun kha a kai



sang dawn tlat mai a. Chuti a nih chuan Mathematics teacher kha a school lian berah pawh kan nei dawn ta lo a ni a. An nil thak dawn chuan Muster Roll emaw, a khaw mi emaw, bial mi emaw min ngaihtuah sak se. Hman atanga rule a hrang si lo va tih reng pawh hi, rules te chu kar khat siam pawh a tling lo reng reng. Engatinge kum tam tak Assembly-a aupui tawh a la danglam si lova tih reng mai hi chu a lutuk tawhin ka hria a. Hetianga mamawh bik subject la tur hi chu a rule pawh hi siam danglam tur niin ka hria a, chu chu ka'n Minister leh kan Parliamentary Secretary te pawhin min lo hriatpui se ka duh a.

YMA in zirna uar kum kan puan lai khan khatih laia Finance Minister Pu Sangzuala ho a (khatih laia kan Chief Minister zahawm takin Pu Sangzuala'n ho che u sela a ti a) committee kan dinah khan Central YMA aiawhin ka tel a, hming pawh sawi ila a pawl ka ring lova, Pu Lalkhama, kan member pakhatin a rawn sawi kha tun thleng hian ka thinlungah a lut thin a. "Kohhran school hi a tha zel si a, kan teacher sorkar a pension a lut te hlawh tur ai hi kohhran school-ah hian dah zel ila, la ta se school tha kan ngah a ni mai," a ti a. St. Paul's High School saw hman kumah ka fa ten seat an chan loh tumin, "hei building kan sa zo tawh a, zirtirtu pathum leh LDC pakhat leh peon pahnih lak theihna hi in duh chuan kan hawng ang a, kan la vek thei ang," an ti a. Khatih laia Education Minister kha ka va hrih a, "i hawng nghal mai teh ang, naupang tam tak pawl 8 leh pawl 9 kan la thei dawn a" ka va ti a, tichuan, "hawng tawp se, kan appoint dawn nia, a ti a, zirtirtu appointment khan a rawn zui a, Kohhran School ah naupang 80 velin an pun phahin ka hria a. Khatiang khan kohhran school-ah hi chuan tlemte han tih pawh khan naupang tha tak an produce thin a. Ramin hma a sawn zel theihna tur chuan kohhran school te kan ngaih pawimawh a, an hlawh hi kan tum tho tho a ni si a, sorkar a tihpun ai chuan kan hlawkpui awm mang e ka ti a.

A dawt lehah chuan Industries Department hi ka sawi duh a. Kan Chief Minister zahawm tak leh kan Minister zahawm tak hmalakna zar ah oil te pawh kan lai chhuak dawn tan ta ni te pawhin a lang a. Hetah hian ka sawi duh chu executive post ah 1999 hnu lamah Mizo a nghetin an la la reng reng lo va, tunah hian a nghet lo in 4 bawr vel an awmin ka hria a, kan Minister hian a chiang zawk ang a. Chief Minister zahawm tak pawh nichin khan ka sawipui a, "North Eastern State-a Chief Minister ho DoNER Minister-in a koh khawmah hian hna hauh hi chu Oil Company-ah hian zu sawi hram turin ka duh che a ni," ka ti a.

Vety College an din dawn hian an University Vice Chancellor Vagella kha Central YMA aiawhin "Mizo vek Group C leh D ah min dah rawh," kan ti a, a awih lo nasa mai a. "A tir chuan 60% bak kan ti ngai lo" a ti a. Tin, chalak takin JE awmsa te kha helai ruakah an rawn dah a,

helai ruak kha Guwahati-ah te an advertise a, kha kha kan chhui zel a, “khang ai zawng zawng nen min lak sak rawh,” kan ti a, Imphal-a awm Vice Chancellor kha telephone hian ka be reng mai a. A khawm a an rawn bill khan ka residence ami kha singhnih leh tih a ni a, chutiang khawp chuan kan ti nasa a, cent percent an rawn la ta a ni clerk te, a hran hran kha.

Hmannia Vety-a ka kalna ah khami tuma an lak kha Head Assistant a lo kai tawh a, Tualpui khua a ni a, lawmawm ka ti hle nghe nghe a, khatiang khan a tih theih a ni. Tuirial-ah pawh JE an lak tur leh Grade-IV an lak tur zawng zawng kha YMA in leilung fate min lak ve ru kan ti a kan nawr nasa lutuk a, an hotupa Managing Director a lo chho a, State Guest House-ah Pu Ruatkima te nen chaw min eipui a, kan han tang tak tak mai a. JE ringawt pawh kha 5 vel NEEPCO ah hian, Tuirial khuah khan Mizo vek Grade-IV te nen engemawzah min laksak thak mai a. Chuvangin NGO atang te, Sorkar atangte pawhin tun atanga kan nawr nat loh chuan helai ruak kha an transfer a, khu lamah an advertise daih ang a, khatiang kha awm thei a nih avangin kan Chief Minister hovin hmanni ah pawh khan Oil India Company ami hote kha kan ko a, khatiang zawng tur khan training te lo pe teh u kan ti a, theihtawpin kan hotupa hoin kan Industry Minister-te nen kan tang a, kha kha tha thlah miah lo va trainingna tur te, Group C leh D ah te pawh thla thum lek lek te pawhin training an pe a, an la thin a ni a, khang kha tih thain ka hria a.

Tin, Trade & Commerce-ah hian a tam thei ang ber Border Trade Centre kan siam hian kan nihlawh dawn a, kan duh theuh bawk a, zing taka a lo kal hian a kal man pawh a tawi, kawng kual vak lova an kal hian Farkwn leh Vaphai te pawh a inhnaih an ti na a Farkawn hi an hmaih lek lek thin a, kan Minister hian min lo hriatpui se ka duh a.

Tin, BADP chungchang Demand 38-na Rural Development-ah khan ka sawi duh chu, kan chhawr em em a, kum tin vaibelchhe 40.17 vel an rawn release thin a, keini bial thlaler ami tan phei chuan kan inkalpawhna awm chhun leh kan building te, kan field te min laihsaktu an ni a, an chungah kan lawm a. Amaherawhchu, social education hi thil tangkai tak si a ruallo thin a. Sorkar hmasaah phei kha chuan Saikuti Hall sak nan khan kumtin a lut fai deuh vek mai a. Kha kha kan ngai thei lo em em thin a, hmun dang a miten tunah chuan a rawn darh zau ta deuh naa tuipui ral te pawh hi rawn hawlh tan ve turin kan beisei a. Kan bialah te kan Minister zahawm tak hian min lo hriat sak sela, field siam nan te, kawng laih nan te Social Education Fund hi min rawn hman sak ve turin ka ngen duh a.

Tin, pawisa kan nei lo hle naa Home-ah hian post fill-up hi tlem azawng hi chu min tihsak ve thei se, a bik takin kan infiam mite dah nan pheih chuan ti thei hram sela. Sorkar hna kan thawh hlimin Delhi-ah House Rent Allowance te nawrin ka cham reng a. Pu J. Lalduhawma, Kulikawn nen khanin kan thleng dun a, Hokey khel hi kan va en a, a lo hre nasa mai a, “saw saw Ashok Kumara, Dhyanchana fapa a nih saw, a thiam dan saw han en teh,” a ti a, pakhat leh chu Jeppalsiham, captain a ni a, a ti a, infiam mi hlir mai kha an lo ni a, Indian Airline aiawhte a hrang hrang kha. Chuvangin kan infiammite hi tunah hian duh angin accommodate-na kan nei tha lo hi Pu Speaker, sawi duh an awm vak tawh lo bawk a, i khar thelh kha a nia tlem min pek belh leh hlek teh, kan demand hi a tha si a, sawi tur a tam si a.

Tin, Agriculture ah hian tawite ka sawi duh chu Horticulture nen inngheng reng a ni a. Niminah Horticulture kha ka sawi hman ta lo va, ka chhuah chhungin a lo inkhar a. Ka sawi duh chu an thil chinte a inang deuh reng fo bawk a, a hlawhtling tur bik hi tih thain ka hria. Israela kan zuk kal khan tomato hi a lo tha em em mai a, Mizoramah Israel pa a lo kal khan “tomato hi khawi ami nge in lei,” a ti a. Bazarah a lo awm tuar mai a, “70% hi Maharastra ami kan lak luh a ni a, 20% hi Bihar ami a ni a, 10% hi chu Mizoram leh a chhehvel ami a ni,” ka ti a. A interest ta em em mai a, farmer a ni a, “thawhho theih dan a awm lo maw,” a ti a. Tomato te hi khuta tanga a lo kal avangin hel deuhin an rawn pack a helaia hmin tawk vel tur khan. Kan ei hi a hel a, chuan kan demand a nasa ropui si a, chuvangin tute nen emaw thawh hova Horticulture-in ruah nan lo tura an han tih dan te nena tan rual chauh pawh hi ti ila, kan pawisa hi kan save nasa dawn a, Agriculture leh Horticulture tang dunin han ti se chu.

Kan nu hman kuma Vellore-a damlo ka zu awmpui chuan hetah kg-ah ₹ 17 in kan lei a, Vellore-ah chuan kg-ah ₹ 2.50 a ni, an mahni state thar a nih vang khan. Chuvangin namen lova extra kan tharna hi hetiang ang chi thlaite hi a chi tin ti dul lovin a hlawhtling tur Maharashtra tomato han lei te chu tlawmngaihna a awm lo reng reng a, khatiang khan tan kan lak a thain ka hria a. Tin KVK, Hnahthial leh Kolasib chauh a awm khar an tum lai khan agriculture a ka awm laiin min khar sak lul suh u, hetia agriculture an rawn kaisan lai khan DO grade a an rawn kai khan DO an chhuak leh daih a, KVK an la bawk si a Dy. Director te Engineer te, chuvangin an bulah hian hlawh lak nan in hmang an ti a khar vek an tum a, khar a nihin kan Minister ho an tang vak a, paruk saw Lawngtlai te, Saiha te, N.Vanlaiphai te, Lengpui te hi kan chhut chhuah belh a ni a. Chutah chuan a thawk sa zawng zawng deputation kan nawr let vek ang a, deputation ni lovin Mizo mi min lak rawh u kan ti a. A hotu ber hi chu Director ai pawn hlawh a tam a, Ph.D a ngai a nia an ti a. Ka pu, Ph.D an lak chuan non-Mizo vek kan la ang a, kan farmer te tawng a rin theih lovang,

rule hran min siam tir rawh ka ti a, a nih copy min pe miah suh a rawn ti a. Mizote thawhna tur M Sc te, Mv Sc te thawhna tur khan kan ti ta a. Ti hian an tha em em mai a, Scientist rual kan la a, training an pe tha si a, ama sum te kan hman tir thin a, tunah pawh an la hman tir a, anni an awl si a DO buai deuh deuh ai chuan KVK a mi te hi pe tam deuh ila training-na ah , farmer-ten an chhawr nasa a ni. DO te chu kan sorkar a fel a, NLUP nen an buai lutuk a, chung Adma lamah hian leh KVK ah te hian Adma fund te hi pe tam se kan chhawr ka ring a. Kan fund lo kal dan hi 90:10 a ni a, a tha em em a. Pu Speaker pakhat chiaah. Zai a tui laklawh chuan tlaivar a awl a nia. Fertilizer hi ka sawi leh duh a. Fertilizer hi tuna organic kan tih hi a lo chi loh lutuk a kan han test a agriculture a kan awm lai bawka tih a ni a. Haryana leh Punjab buh kan ei zawng zawngte hi chemical fertilizer a chawm vek a ni a. Theihaite keini a thar lo berin organic kan ti hi a chi loh lutuk a. A kung te hi a inthan duh hleih lutuk a, a rah hmin duhna te, a tlak lohna te, chemical fertilizer hman hian a let thum chu tling zanin ka hria, thei inthan duh hleih zia hi. Chuvangin, chemical fertilizer-te hi iai miah lova kan hman uar thain ka hria a, chute a nih loh chuan farmer rethei te tein serthlum leh theihai kum 8 kum 10 nghah kha kan economy-in a phak lo, chemical fertilizer an hman kha chuan an thang zut zut mai a, helai hi kan chian a thain ka hria a. Chuvangin kan thlai leh theite a lo than duh a, a puitlin hma a, a rah kan farmer-ten an lo chhawr hmana tur hian chemical fertilizer hi uar leh zawk ila a that ka ring. Hun a awm tawh si lo a, Pu Speaker, la tam hle mahse hun min pek belh a, ka lawm e.

**SPEAKER** : Pu Ruatkima, veilam kha in ti fo a kel awmna ni ang maw, ka'n pe hmasa ang e.

**Pu LALRUATKIMA** : Pu Speaker ka lawm e. Ka hma ami kha hun zawng zawngah ka sawi hnu chiaha sawi tura ruahman lawk deuh emaw ni tih mai tur hian ka hnu deuhah hian a sawi ziah a, a thu sawi kha a dawt chiaha sawi tur ka nih avangin min rawn kheng tam khawp ta mai a, a sawi thiam si a. Central YMA ah kum 10 chuang ka pu a ni a, ka lo zui tawh a, a sawi thiam avang hian Aizawl khawpui in chhawng sang pui pui hi a zuar fo mai a ni. Chutiang chu a ni a, a lawmawm khawp mai. Pu Speaker, wawiih hian kan Minister 2 demand kan han sawi leh dawn a ni a, a lawmawm hle mai a.

Kan demand-ah ka han lut zui ang a, Demand No. 7-na Excise & Narcotics kha kan Minister zahawm takin a sawi angin kum thar atangin zu kan zuar tan dawn niin a lang a.

Amaherawhchu, kan Budget te kan sum ruahman han en chuan tihlawhtlin kan tum tak tak lo emaw ni chu le tih turin sum ruahman a phai tulh tulh emaw ni tih mai tur a ni a, kan inruahman lawkna hmuh tur a awm lo va . Chu mai piah lamah chuan Budget speech-ah te pawh sum leh pai kan hmuh thatna ber tur ni a ngaiin ruahmanna kan siam tura ka lo ngaih laiin, kan siam reng reng chuang lo va.

An motor kawl te pawh hi a hlui lutuk a, Pu Speaker, an 407 te pawh khu kum 15 kal ta ami te kha a ni tawh a. Chuvang chuan ngaituahna kan hman a tul takzet zetin ka hria a. Excise & Narcotics Department-te kha ngaituahna kan hman sak a tul khawpin ka hria.

Tin, Demand No.20-na School Education kha kan sawi a, school inspection hi kan lo ti ngai tawh mang lo ni khan a lang a, a pawi khawp mai. Hei hi chu ngaituah that leha ruahmanna thar kan Minister zahawm tak khan nei leh se a thain ka hria a. Tin, ka question te pawh hi waviin chawhma thleng khan chhanna la hmuh loh te hi education department lam te hi kan la nei nual mai a. Chuvangin tan rawn la se a thain, kan Member zahawm tak te pawh hian school education atang hian an zawhna an la hmuh loh thute an sawi bawk a. Kan han en a, kan la dawng lo a ni an ti a, tun thlenga la dawn loh kha chu tan kan lak a tul ka ti khawp mai.

Tin, Pu Speaker, text bu thar SCERT in a la buatsaih dawn niin ka hria a, a lawmawm khawp mai a. Chutah chuan kan zirlaiah te hian kan culture society mil leh Mizo hming te leh a lem te pawh Mizo pain, a ramchhung miin kan hriat thiam theih tur kha ruahman tha ka ti khawp mai a. Chutah chuan a bik takin Hindi hi Devanagiri leh Roman script-in kan Text book ah kan ziaak a. Zirtirtute tan khan a buaithlak em em a. Hindi in kan dah a, a hnuaiah khan Roman Script khan a inziak phei a, an hup loh chuan chhiar ngawt hleih theih pawh a nilo, class-ah hian Pu Speaker, chutiang chu a ni a hup beh tlat loh chuan class a zitirtute tan a lam dan kha a hnuaiah a inziak phei vek a, chumi dawt lehah Mizo tawngin, chumi dawt lehah English-in a awm a ni. Chuvang chuan engtin nge Hindi tak tak kha kan zirlaiten an chhiar dik theih ang tih hi ka ngaituah naah a awm a, en that leh theih ni se ka duh khawp mai. Chu mai a la ni lo a Pu Speaker, a bu ka rawn keng a, helaiah hian bawng ek lem hi a hriat reng reng lo va, a phe ruai mai a, pangpar ni awm tak a ni a, khatiang ang chi te a awm nual mai a. Tin, knowledge an tih a kha dah tur an hre lo nge an dah blank tawp mai a, helai chu school seal a ni a chuvang chuan khalai kha a lem nen an entir thlap thlap tur a nih lai khan hriatna hian lem a nei lo a nih pawhin khalai kha ngaituahna thar an rawn hman a dikin kan ring deuh hlek a.

Chu mai chu a la ni lo a, helaiah hian zing, morning a in ti a, ni chhuak pawh hi a lang lo a ni Pu Speaker, i rawn hmu phak thei lo a, ka bul ami te Doctor leh Engineer an ni a, an hre hrang thei bik lo in ka ring a ni, han en ve teh se. Tin Hindi tho a ni a, a paper hi a chhe em em a ni, kan ni tin chanchinbu paper ang vel hi a ni mai a. Kan tu kan fate tan chuan kar hnih khat an kawl chuan a vuai chhe zo vek mai dawn tih a lang reng a, chuvang chuan, SCERT ten an buatsaih dawn a nih chuan paper 80 gsm chin tal lo hi chu naupang tan a tha lovin ka hria.

Tin football lamah kan sang khawp mai a, chapter pakhat hian cricket a rawn dah daih mai a, thing tlang lam ka hmaa rawn sawitu bialah chuan run leh wicket awmzia te chu an hre lo reng reng ang, mahse zirlai buah a awm avangin zir a ngai tlat a ni, Football chanchinte emaw kha rawn ti zawk se a tha tur hi a ni a. Kan society mil deuh hleka kan kal hi Pu Speaker, a thain ka hria a. Tin, helai lesson pakhat hian ka thianpa Victor-a a ti a, Mizo tawngah Victor-a tih hi hming vang tak a ni a, Lala emaw Liana emaw Sanga emaw pawh kha rawn ti se a fuh zawkin ka ring a, Victor-a hming kha a rawn dah daih mai a. Kan zirlai zir turte hi naupang te te kum 10 mi lek lek te an ni a tan lak a ngai khawpin ka hria. Kan syllabus kan thlak dawn a, chutiang chuan kan ze mila buatsaih theih hi a ni dawn lawm ni ka ti a.

Tin, school timing kan thlak dawn ni te pawh khan chanchinbuah kan hria a, a thu mai nge? Thu chu tisaah chantir tur a ni em tih vawiinah hian kan la hre lova, chutiang te chu ka han sawi tel duh a ni.

Tin, Pu Speaker, Demand No. 31-na Agriculture ah khan han kal leh ila. NLUP kha kan sawi a, NLUP hlawhtlinna kha chu job card tlakhniamna te, tlangram lo neih buhthar a tlem hunah te, Vawksa leh Arsa-ah te kan intodelh hunah te, a tlawm hunah te hlawhtlinna hi kan chhiar dawn lawm ni tih te ka ngaihtuahnaah chuan a awm fo a ni. Chutihlai chuan Chanchinbua kan hmuh angin mi 65 zet mai Lengpui khuaah NLUP beneficiaries Lengpui khua ni silo an awm thu kha RTI hmangin chhan a ni a. Chutah chuan Lengpui mi 9 te nen an vaiin khatiang kha chungkua 74 an ni a, chungte chuan chhungkaw 9 Lengpui khua amite khan pawisa an dawng reng reng lo a ni tih kha an VC ten signature pe in an rawn thlen a. Hengte pawh hi kan inenlet/kan inenthat a ngai khawp mai. Chuvang chuan MNF sorkar laia bul tan Oil Palm te a hlawhtlinna kan hmu chho zel hi a ropui ka ti bawk a ni.

Tin, Home Department-ah han kal leh ila. Demand No. 16-na ah khan Pu Speaker, Home Department changtu Minister hi a viak a tha a, a tang khawp mai a, MLA Election lai khan a vawrtawp tak tak a lo thlen khan hel thawhpui party an awm a ti a, inpuhmawhna kha a awm chiam a, mipuite'n vawiin thlengin thudik kan la hre lo a ni. Chuvang chuan remchangah thudik tute nge hel thawhpui party chu lo ni reng khatih lai hun khan tih te pawh hi hriat a chakawm khawp mai.

Tin, Pu Speaker, kan Minister zahawm tak ho khan Central YMA khan August ni 11 khan kan Chief Secretary te pawh telin The Mizoram Maintenance of Household Register Bill Village Census Register kha siam turin ruahmanna an titlu a, mahse vawiin thlengin kha bill kha he House zahawm takah hian kan la ngaihtuah lova. Kan ram chhungah ram dang mi leh hnam dang mi an zalen em em a, khawiahnge i kal dawn tih zawttu pawh kan awm ngai mang lo a, chutiang chuan BSF duty te pawhin thlatin hian Bangladesh atangin detection leh deportation an neih loh thu leh an report kha a nil reng mai a ni an ti lehzal bawk a, chutiangte chu kan ni a, tan sauh sauh a ngai a.

Tin, kan Minister zahawm tak hmalaknain police officer-te an sipaite chhawrlui thin, in sakna atan leh huan atan te a chhawrluite pawh an la awm tih thu kha kan la dawng thin a. Police Officer pension te leh Officer thenkhat hian la chhawr an la awm fo niin a lang a, ka thu dawna hi sual lo turah ka ngai a, khatiangte kha kan dinhmun a ni a. Tin, kan ramah in kidnap a hluar khawp mai a, state pawn lama miten kan ram chhungah an rawn kidnap a, tan kan lak zual a ngai a. Khawthlang lam phei khu chu Pu Speaker, Kidnapping Trade Centre a ni ringawt mai a, sum tuak nan an hmang a, state pawn lam mi hnathawkin an lo kal a, chutah chuan an lo kidnap a, pawisain an inkhul leh a, kha kha a tha lo takzet a. Police Quarter sak tender lai mek pawh hnathawh a lo tul ta a, chutiangte chu kan dinhmun a ni a, tan han la sauh sauh se ka duh a ni.

Tin, Pu Speaker, Rural Development-ah khan ka'n kal lawk ang a. Ka hmaah khan Tuipui South bialtu zahawm tak khan a sawi tawh a. Khami Thingsai BADP a hnathawh Thingsai Police Check-Gate kha a chhe khawp mai a, chanchinbuah leh facebook-ah te kan hmuh ang khan, an enfiah tawh turah ka ngai a. Khalai kha min vil sak zel sela, kan ram tan assets zel a ni a, tun ang huna kan tih loh chuan tihngaihna a awm dawn lo a ni. Tin, Kristmas hma ngeiin ni 100 inhlawhna state share kha pek ni thei se thingtlang lam unaute tan a lawmawm ka'n ring bawk a ni.

Tin, Demand No. 40-na Industries-ah khan Zuangtui Industrial Estate saw kan hriat theuh angin sawti sawn a awm a, saw mi huam chhungah sawn LSC nei 12 an awm a, AMC huam chhung khawpui chhungah Industry han din kha harsatna tam tak a awm a, chuang chuan ngaihtuahna thar kan sorkar hian a hman a ngaiin ka hria a, lo enchiang sela.

Tin, Demand No. 44-naah khan Trade & Commerce kha kan han ti a. Hetah hian tun thlengin ka zawhna la rawn lut lote pawh a awm ve tho a. Zawhna hun a awm tawh lo mai thei a, MoU Bangladesh te nena kan sign kha khawiahnge ni? Pu Speaker, ka hmaa mi kan member zahawmtak kha minute 15 i pe a, kei chu minute 12 chiah ka sawi ang.

Tin, Vairengte Bazar sak tur nikum lama ruahman tawh tunthleng hian hma la lak loh a ni a, khulai bazar lun dan leh pawimawh dante kan hria a. Chuang chuan hmalak ran dante a awm lawm ni? Tin, Zokhawthar Land Custom Station te, Kawrpuichhuah te, Saikhumphaiah te khan Border Trade Centre te kha kan ti dawn ni te khan chanchinbuah te kan lo hmu a, a lawmawm khawp mai a, hei a rei tawh a, Border Trade chungchang hi inremnain a ken a nih avangin tihlawhtling ngei turin tan lak a ngai a ni. Tin, Central sorkar pawhin a tih ve tur a awm a nih pawhin tihran kha a mawhpurhnaah kan ngai a, chungte chu ka sawiduh a ni.

Tin, Pu Speaker, Demand 16-na Home-ah hian khulai Central Jail-ah te khuan Jail hotupa te pawh khuan staff-te khu in saah te a chhawr niawmtakin thu ka dawng a, chutiang chuan Jail Motor te pawh mimal in sak nan kan hmang zel a nih chuan pawisa kan neilo a, harsatna tam tak Motor maintenance atan te, POL atan te chi hrang hrangin a kal a ngai a ni. Chutih lai chuan khatiang mimal thil lutuka han tih kha chu a zeuh zeuh te chu ni sela thudang a ni a. Khangte kha kan in enchian a thain ka hria a.

Pu Speaker, a tawp bera ka sawi duh chu tawite he Village Census Register hi kan himna tur niin ka hria a, kum 1995 chho khan Pu Lalkhama Chief Secretary a nih lai khan a buatsaih a, chumi hnuah chuan Sorkar hmasa MNF Ministry-ah khan Pu Tawnluia'n a buatsaih leh a, 2008 kum tawp lamah khan bu tha deuhin Planning Department kaltlangin an chhu a, cheng nuai 18 man zet mai a ni a, chu chu 2008 a Congress Election manifesto-ah pawh khan a tel a, mahse an ngaihsak zui ta lova.



Central YMA in a bu zawng zawng cheng nuai 18 man kha a chhawmzui a. Chuvangin kha bu kha a tangkai a, a tha a ni. Kan ramah khua leh tui dik tak te chhinchhiah that hi sorkarin kan tih tur a ni a, kan pianni leh thla te, khawi atanga lo kal nge tih te kha Pu Speaker, a awm a, a pawimawh em a, hei chu minrawn ngaihpawimawh sak se, kan Home Minister zahawm takin hma ka la dawn a lawm a tih avangin Assembly Question-ah pawh Home-ah ka zawt a, mahse official lamin “Planning Department chan a lawm,” an lo ti si a. Planning lamah ka lo zawt silo a, Home chan a ni lo an tih avangin ka zawhna kha min lo tihthih sak a. Kan Minister zahawm tak pawh hian a ngaihpawimawh niin ka hria a, ngaihpawimawh tling a ni a, hei hi chu uluk taka khawtin khua leh tui dik takte chhinchhiahna hi kan neih hlan hi a nghahhlelawm takzet a ni tih ka sawi duh a ni e.

**Pu P.C. ZORAM SANGLIANA :** Pu Speaker, tawite chauh sawi kan duh a. Hmanniah general discussion-ah general deuhin ka sawi tawh chungin tun tumah chuan bial chhungte pawh han luh ve te ka duh a. Tin, puthhuak ang zar zarin, Bawrh Saiabe an lem em ni tih tur ang deuhin ka hmaah pahnih ten an han sawi a, a ngaihnawm hle a. A hnunung zawk phei kha chu Leader thusawi ang deuh hlek ten an han sawi a, a ngaihnawm ve hrim hrim bawk a.

Demand No. 7-na atang hian tan ka duh a. Excise & Narcotics Department hi kan ram tana an man power te leh an dinhmunte an tlem tehlu nen, anmahni thawhrim vanga thalai leh chhungkua ruihhlo ngaiten a tihbuaite chhanchhuah an nih nasat zia te; tin, chumi kaltlanga thalaite tichhetu tur tam tak an han man chhuah leh an han tihral thin te; chumi piah lamah eng eng emaw avanga kohna an hmuhah te, chung kohna an hmuh te chu an man power tlem ngaihtuaha an bawhzui thin dan te; tin, NGO thawhpui an thiam dan te leh hmun hrang hranga an hmalakna hi kei ka lo thlir ve reng thin te a ni a, chutiangah chuan lawmawm ka ti a. Kum thar lamah sorkarin policy thar an neih turah hian a man power, an tam leh tam loh kei ka ngaihtuah lova. Helaia kan dan han pass tawhah khan anmahni mai bakah mi chi hrang hrang, NGO tinreng leh mimal te thleng pawh hian miin a hman tangkai theihna tur te kha an han siam a ni a, chu chu lawmawm ka ti hle a.

Nakumah hian kan bial Bairabi-ah Mizoram-a pawl lian leh hlu ber mai ti ila kan sawi sual awm love, YMA ten General Conference an nei dawn a, chutah chuan Bairabi khu ramri hrula awm kan ni a.

Tunlai tak hian Bairabi thalaite zingah ruih hlo No. 4 leh thil thalo an chingthar nasa hle mai a, nikum lam leh term hmasaah te khan check gate kan dil thin a. Tun tumah hian kan Minister-in khawngaih takin min han hriat sak leh sela, check gate leh out post mumal tak han neih a, khulaiah khuan a theih chuan force te pawh tlema zawng tal te pawh min han dah sak turin ka ngen duh a. Ramri hrula awm kan ni a, buaina leh harsatna chi hrang hrangte kan tawng thin a. Chuvang chuan hengte hi khawmpui thleng turte kan ni bawh nen Mizo ram pawn, pen khat leka ramri dang va kai thei te kan ni a, helaiah hian sum kan neih dante kan hre vek nachungin kan Minister-in min han ngaihthlak sakin kawng min han dap sela tih hi kan duh hle mai a. Hmanni lawka biala ka zu kal ve pawhin NGO hrang hrangte leh khawtlang hruaitu chi hrang hrang leh political party tin tena min lo sawipui te a ni a. Chuvang chuan helai hi khawngaih takin kan uar duh deuh hlek a. Chutiang te te chuan tawitein ka sawi duh a.

Demand No. 16-na Home Department bikah hi chuan hmanni General Discussion-ah pawh ka sawi tawh ang khan kan ram himna hi an kuta awm hi a ni em em mai a, veng tin, (tawng mawi lo ni suh sela) Association tin te leh thil chi hrang hrangte leh pawl chi hrang hrangte hian a duh duhin kan sorkar order te min hal khum tawh a. A duh duhin kawng an zawh a, kawng min dang tih hi tunlai chanchin thar kan hriat lar em em zing ami te hi a ni a. Heti em em mai a a hman hmanina lalna hman tumna ramah hian Kristian ram hi kan awm tur a ni emaw chu aw. Tha te tea dawhkana sawifel theih loh hi a awm lo va, Mizoram kum 20 ram buai pawh dawhkana chinfel theih a nih chuan khawtlangin kan mamawh leh phu kan nih tih kan inhria emaw, kan dikna kan lantir dawn a nih pawhin tu pawh hian dawhkana kan sawifel hi a thain ka hria a. Kan Chief Minsiter leh kan Minister zawng zawngte leh anmahni puibawmtu tinrengte hi kan en thin a, chumite chu dawhkana thil sawipui theih lohin pakhatmah tu tan mah hian an awm lo niin ka hria. Mahse, waviinah hian kan dinhmun han en ila a hman hmanin nawrh kan tum ta a nih hi, theih ang tawh hian kan che ta vek mai a. Entirnan, Congress thalaiin Remna leh Muanna lo awm hlim 1987-a India ram political map a lo chhuah a Vanapa Hall-a India ram political map waviina kan Home Minister ho ngei maia kan han hal ang te kha chu hnam tan hian hal loh chi chu a ni lo. Inremna behchhana political map lo chhuak kha a ni tlat a. Vairengte-ah State Bank kawtah kan zuk hal leh a. Khangah te khan Congress thalaiten engatinge kan halna chhan kan tih chuan, khata map lo chhuak, political map lo chhuak ah khan, Mizoram ri hi Rengtekawnah a ni tawh a ni. A na em mai a, Mizo neitu, Mizoram neitu, India ram neitu tan chuan a na a, chuvang chuan Congress thalaite khan Vanapa Hall kawtah leh Vairengte State Bank kawtah kan zu hal a ni. Chutiangte chu a nih laiin waviina thil hal chanchin kan han hriatte nen hi chuan selfish hi a tel tlatin kei chuan ka hria a. Ram tan kan tih rual hian, kan rin Pathian tan

hian kan chet dan tur hi a inmil em? Naktip nakthaiah Chanchintha kan sawi leh ang a, chu nen chuan kan sawi hunah hian kan ip zek mai lo ang maw tih te hi kan ingngaihtuah a hun ta hlein ka hria.

Chuvangin Home Department bikah pawh hian hmannia ka sawi ang khan post ruak 1500 chuang ngawt mai a han nei te hi fill up vat tura kan Finance Minister pawh hian, Supplementary Demand tih hunah min fill up se ka duh hle mai. Chuvang chuan hengte hi Pu Speaker, ka sawi rualin biala ka'n luh duhna chu Bairabi-ah khuan O.C. fel tak min han pe a, kan lawm hle a, chutih rual chuan ramri hrula awm kan ni a, Motor nam nun chawp ziah ngai mai han neih khu chuan misual an tlanche thui hman thin a ni. Chuvang chuan Motor nam nun ngai lo min pe turin ka ngen duh a ni.

Demand No. 31-naah hian Pu Speaker, India ram hmarchhaka awm hmasa ber Oil Palm herna kan District chhungah ka bial chu a ni chiah lova, Zoram sorkar leh Oil Company ten an han buna an han herchhuah theih rual hian Oil Palm hi a danglam bik tlat. Kan thlai dang ho hi chu thar hun bi, thalah te emaw a ni thin. Oil Palm erawh hi chu kum tluana rah a ni ringawt mai a, chuvangchuan, fur lai pawhin a phurh chhuahna a ngai a. Link road an laih te hi fur lai pawha phur chhuah theihna turin tan lak ni sela, khung kan khawl te khu hman tangkaiin a awm ngei ngei ang tih ka ring a. Kum tluana rah, Zorama tha em em mai kan neih ah hian lo neituten an kut hah man an thar lehzual theihna turin heng road te hi siamthat ngei ni se tih hi ka sawi duh a.

Tin, Demand No.38-naah Rural Development han tih hi chuan Congress tih hi a lang nghal a ni. A chhan enge kan tih chuan miretheite tan RD kaltlang hian zuar lo a sem zawh a ni tih hi a lo piang ta a ni. Chuvang chuan rangva han sem chhunzawm zel a nih hian thingtlang mirethei tak tak, engtikah nge rangva inchung kan neih ang tih pawh suangtuah pawh suangtuah ngai lo heti zat chih sak an ni tawh a. Tuna han chih nawn leh na tur atan te hian a pawimawh a, a dang tam tak an hnathawh dang tam tak sawi tur tha ka ngah lutuk a, mahse hun a awm si lo. Helaiah hian uar zawkin han sem zui zel ni se kan va lawm dawn em tih hi thingtlang mite aiawh in ka'n sawi duh a.

Demand No. 20-na School Education chungchangah hian tawite han sawi ka duh chu chhung tin hawlh a ni. Hmannia kan sawi tawh ang bawkin Finance Minister hian Supplementary Demand atan khaw tin, chhungtinin kan mamawh tur atan hi chuan sum pawh hi min dah sak rawh se tih hi kei chu ka ngen duh takzet zet a. Kolasib District pumpui angin ka sawi

ang a, Kolasib district-ah khuan Sorkarin Higher Secondary School pakhatmah kan nei lo, ka bial bikah C.Z Higer Secondary School khu tunah khuan naupangin an bawh em avang in ka MLA fund atang pawhin building extension tur tlema zawng kan tihsak a, chuti chung pawh chuan zirlai an awm belh zel. Khawngaih takin hetah te pawh hian min han hriatsak sela tih hi ka duh a.

Tin, chutih rualin Pu Speaker, DIET puitling min pe hi kan va lawm tehreng em ! Kan lawmna tihfamkim lehzualna tur atan chuan a building hi sak zawh thuai thuai a function tir vat khu bial mai ni lo, a District pawh hian kan lawmna niin ka hria a, kan hotute pawh hian kan District chhung amite pawh hian kan nghakhlel vek niin ka hria a, hei hi lawmawm ka ti.

Industry Department-ah hian tawite han sawi ka duh chu Meidum-ah Gas hmuh chhuah a ni tih kan hria a, House-ah te pawh kut kan beng dar dar tawh a. Mahse Pu Speaker, kan Minister zahawm takte ka ngen duh chu Gas a awm a ni tih hmuh chhuah tawh hnuah a thawktu ONGC-te tunah hian an chawl tlat mai. Khawngaih takin an hna an chhunzawm leh theiha he Gas hi kan House Leader-in a sawi angin mahni thukah ngei han herh haw ve ngei theihna tura daih tur kha a ni dawn si a, hei hi lak chhuah vat ngai kan ti hle a ni.

Pu Speaker, pakhat chiah Trade & Commerce ka sawi leh lawk duh a. Trade & Commerce hi kan tihchangtlun chhoh zel hian kan ram hausakna tur a ni. Kan nu ho bazaar te leh kan hmeichhe ho ti zawk ilara dik ang chu, colour combination leh matching an han hriat zia te hi, khawvel hnamah hian kan hmeichhiate anga matching combination ti thiam hi an awm dawn em ni aw ka ti thin. Cheraw hmanga World Reocrd Mizo thalaiten an siam tum khan Cheraw-ah chauh an pholang a ni lo va, kan nuten colour combination an thiam zia tarlangin khawvelah hian kan nula te, kan hmeichhia te incheina hi an pholang tel a ni. Chung tak te chu Trade & Commerce kaltlang hian kan sumdawna, kan puantah thiam te leh kan eizawngtuten sum leh pai an hmuhna tur a ni.

Chutih chhungin a ram chhungah ngei pawh kan bazaar min han sak sak hrang hrangah te khawtin mai hian kan va tangkaipui em. Keini kan bial bikah pawh Venglai leh Diakkawn Kolasib kan bazaar ten min zo ta lo. Kan Minister hian khawngaih takin hengte hi a tihpuitlinna tur min han pe se kan va lawm dawn em. Vawiinah hian kan Minister pahnih ten an Demand rawn pharh hi lawm taka pass pui hi ka rawn support a ni e, ka lawm e.

**SPEAKER** : Ngawi rawh aw Pu Mahima hi a phar hmasa em ?

**Pu JOSEPH LALHIMPUA** : Pu Speaker, ka lawm e. Demand 4 tawi te a han sawi ka duh a.

Demand No.20-na School Education Department, kan Minister zahawm tak Pu Rohluna'n Education Department a enkawl dan chungchang leh Zoram mipuiin kan hriat atana tha tih tlem te ka nei a. Nakinah a chipchiar chu ala sawi teuh thoin ka ring a. Amaherawhchu, ama hmalakna a nih avang hian atana sawi nuam vak lo thil awm thei a ni a. Pu Speaker, sum leh pai kan harsatnate kan hria a, zep thu a awm lo va. Chuti chungin zirtirtute hlawh lak theih loh chungchang te, harsatna tam tak a awm a ni. A bik takin Hindi zirtirtuten thla 7 emaw zet hlawh an la lo va. Hemi chungchangah hian political party ang te leh chanchinbuah te, social media hmang te pawha sorkar leh a bik takin a changtu Minister te, sorkara kan hotupa ber Chief Minister te thlenga demna thu te a awm thin a. Hei hi Department lamin an thiam ang tawkin thudik an sawi thin nachungin helai hmun atanga mipui hriata han sawi hi thain ka hria a. January 23, 2014-ah khan CSS hnuai Hindi zirtirtute hlawh lakna tur UC leh engkim a tul ang te Ministry-ah thawnthlak a ni a. Tichuan, query chi hrang hrang an rawn siam a, a hman lohna turah in hmang te an rawn ti a. Chutah chuan kan Ministerin kan MP te a ngen a, Lok Sabha MP te, Rajya Sabha MP te pawhin Ministry-ah an va kal a, a hman lohna turah in hmang min ti tlat a ni, hei hi in rawn sawifel a ngai a ni, an ti a. Chutah chuan kan Minister ngei hi Delhi-ah zuk kalin Ministry-ah file-te kan officer te nen an zuk hai ta a. Chutah chuan CSS hnuai Hindi zirtirtu 1305 hlawh atana min pek UC kan siam leh Higher & Technical Department in Mizoram Hindi Training College atana pawisa an hmanna UC an siam kha Ministry-in an lo thil kawp a. Hindi zirtirtu hlawh tur chauh Education hnuai an pek kha Higher & Technical Department hnuai Hindi Training College atana pawisa an hmanna nen an thil kawp avangin an lo hmu thiam lo va query an siam a ni a. Chung zawng zawng chu kan Minister zahawm tak hian Ministry-ah Secretary mai ni lovin, Dy.Secretary te thlengin file zawng zawng a um chhuak a. Aman a zuk hmuhchhuah hnuah an pawt then leh a, chumi file ang chuan a hranpain an kal tir leh a. Chumi hnuah ni 22.9.2014-ah Hindi zirtirtu hlawh tur sanction an rawn tichhuak a.

Amaherawhchu, vanduaithlak tak maiin kan Education Department in, Head of Account an lo thun dik lo leh a. Chu chu kan officer ten theih tawpin an zuk umzui a. Ni 31.10.2014-ah Mizoram sorkar account-ah an rawn dah ta a. Tichuan ni 3.11.2014-ah Finance Department-ah allocation buaipui a ni a, ni 5.11.2014-ah Finance Department in sanction order a pechhuak a ni. Hetianga vanduaina tawk chung pawha heti khawpa Minister-in a umzui hi Hindi zirtirtute tan hi chuan a lawmawm tawpin ka hria a. Hemi chungchang hrechiang mang si lo va

Hindi zirtirtute hlawh la thei lo khawngaihna nge ni ? Political hamthatna nge ni lak tuma beih vak vakna hi a fuh lo in ka hria a. Pu Speaker, helai hmun hi thudik sawina hmun a nih avangin Zoram mipui hriatah kan Minister zahawm tak hmalakna tawi tein ka'n tarlang duh a ni.

Tin, SSA te, RMSA chungchangte an sawi thin a. Ni.13.10.2014 khan HRD Minister zahawm tak Pi Smriti Zubin Irani chuan kan Chief Minister hnenah lehkha a rawn thawn a. Chumi a lehkha thawnah chuan India ram state leh UT hrang hrangah RMSA atana pawisa installment vaibelchhe 1705.4 an pechhuak tawh a. August 2014 thleng hian India ram state zawng zawngin matching share pakhat mah an la pe lo. Chu chu HRD Minister-in kan Chief Minister hnenah a rawn thlen a ni a. Chutiang harsatna chu keini state pachhia mai ni lovin India ram state hausa zawkah pawh harsatna an nei a ni tih te pawh he House-ah hian ka sawi duh a. Chuti chungin kan Minister-in theihpatawpin hma a la a, vawiin thleng hian RMSA hnuaiyah bik pheih chuan hlawn tur sanction pek zel an la ni. Heng kan Minister hmalakna te, kan Department officer ho hmalakna te pawh hi vawiinah hian a hriatpuitu ka nih ve avangin Zoram mipui hnenah tarlan a thain ka hria a, ka han sawi a ni.

Tin, Education Department-ah hian Zoram mipuiin hria sela tih ka duh a awm a. Northeast India State tam zawkah leh India ram state tam zawkah hian SSA an din te, School an hawn te, RMSA an hawn te hian an state-in a mamawh tak tak milin, chutiang atan chuan zirtirtu post te siamin post against ang chuan an hawng thin a ni. Kan ramah hian sum leh pai awlsam taka kan lakluh theih laiin, nichina kan member zahawm tak takten an sawi ang khan zirlai naupang tlem te te nei, khaw te tak te teah school tam tak kan din a. Zirtirtuah mi tam tak kan la, a lawmawm em em. Amaherawhchu, kan mamawh bak kan tih avang hian nakinah harsatna tam tak kan la nei thei a ni tih erawh hi chu Zoram mipuiin kan hriat a thain ka hria a. Kumin Annual Plan-ah hian SSA hnuaiyah vaibelchhe 192 pek kan ni a. Chutah chuan vaibelchhe 83 vel hi hlawnah a kal dawn a ni. RMSA hnuaiyah pheih chuan vaibelchhe 38 chuang pek kan ni a, chutah chuan za zela 80 deuhthaw hi hlawnah a kal dawn a ni. Vawiinah chuan za zela 90 hi central sorkarin min tum sak a, nakinah chuan a aia tlem min tum sak ang a, nakinah chuan a zawng zawngin state in kan tum hun tur ala thleng ang a. Chumi hunah chuan state-in kan tuar hle dawn a ni. SSA bul tanna a lo fuh vak lo hi a pawh khawp mai. Hmarchhak state thenkhatte kan en chiang a, India ram hmun dang kan en chiang a, chutiang chu an kalpui dan a lo ni ve lo va, chu chu mipuite hian kan hriat a thain ka hria a.

Pu Speaker, Trade & Commerce Demand No.44 na chungchang tawi tein ka tarlang duh a. Land Custom Station kan tih leh ICP (Integrated Check Post) kan tih hi a inanglo hle a ni tih hi mipui hian kan hre chiah lo va, Kan Minister zahawm takin Zokhawthar chungchangah te, theihpatawpin hma a la a, Central sorkarin an hawn tur a nih avangin anmahni an la remchang lo va. Tin, Tlabungah Integrated Check Post, LCS aia lian mah chutiang tur pawh kan Union Minister zahawm takin a changtu Minister te a bia a, kawng thui tak kal a ngaih avangin vawiinah hian duhthusam a la thleng lo va. Chuti chungin World Bank in vawiinah chuan Tlabung atangin Kawrpuichhuah kawng min siam sak dawn a ni tih te, Lunglei atanga Tlabung National Highway-ah min puan sak a ni tih te kan hriat avang erawh chuan kan lawm hle a.

Hei, a bul atangin kan Chief Minister, kan House Leader zahawm tak hi ka zawt thin a, ka chhui ka chhui a. Lunglei Circuit House a mikhual thlenna Register bu saw ka hai ngat ngat a. Kan member zahawm tak Opposition Group Leader , kan MP hlui pawh a hrechiang bertute zing ami a nih ka ring a. Kum 2005, June ni 25 ah te, July ni 19 leh ni 21 ah te hian Wrights Company hi Lunglei-ah an lo kal a, consultant, Chandra Chakraborty tih te, MC Barma tih te, BS Mitial tih te an lokal a, chungte chuan Tlabunga border trade neih dan tur an rawn en a, Home Ministry tih an ni. Vawiina kan House Leader zahawm tak hi khatih laia Opposition Leader kha a ni a. A thiante nen an inbiak dan te, central ministry nen an inbiak dan te, khatih laia MP, vawiina opposition group leader-in khulaia hma a lo lak ve dan te pawh kan House Leader-in a sawi thin kha. Tichuan hun rei tak hlamchhiaha a awm hnuah tunah hian a bul tan tute ngei hian theihpatawp-in hma an la leh a, chhim lamin tunhma atanga kawtchhuaha kan lo neih ve a nih avangin sorkarin a ngaipawimawh em em a ni tih ka'n sawi duh a. Kan Minister zahawm takin a changtu Minister of States for Homes a zuk bia a, lehkha te a thawn a, chumi bawhzui chuan kan Lok Sabha MP-te nen pawh meeting pawimawh tak tak te an nei a. Kan Chief Minister-in Mizorama zin turin a zuk sawm a, chutiang atan chuan Tlabung pawh focus a ni tih te an sawia, heng kan Trade & Commerce Minister zahawm takina a hmalaknate hi Zoram mipui hian an hre lovang tih ka hlau a, Pu Speaker, tawitein ka'n sawi a ni.

Pu Speaker, a tawpna ber atan chuan Demand No.31-na leh Demand No.40-na hi tawitein ka tarlang duh a, Agriculture department leh Industry department te an ni a. Central sorkarin scheme tam tak min siam sak thin a, chumi scheme base chuan hna kan thawk thin a. Agriculture pawimawh zia te, Industry department pawimawh zia te vawiinah hian sawi a ngaiin ka ring lova. Pu Speaker, ka sawi duh chu hei hi a ni, khawvelah kohhran tha kohhran chak enge ni kan tih hian programme oriented, programme kohhran nilo, a mamawhna avanga thlarau bo zawng

thinte hi kohhran chak an ni. Programme in siam a kohhran anga kal pet pet hi chu kohhran tha an ni love. Mamawhna anga kal hi kohhran tha a ni an ti thin a. Vawiinah hian ka ngaihtuahnaah Pu Speaker, thil tam tak a awm thin a, Agriculture department te, Industry department te, nimina kan passed tak Horticulture department pawh ni sela, central mi rawih ten kan ram sik leh sa hre miah lova scheme min rawn siam sak, a ngai ngaia tihhlawhtlin kan tum hi kan ram tan hian a tha ber angem le tih hi ka ngaihtuah a ni.

Chuvang chuan kan ram sik leh sa mila kan officer-te pawh hian ngaihtuahna senga an siam danglam ngam hi a thain ka hria a. Central sorkarin programme an siam dan, vai hovin an siam, India ram pumpuiin inang khat veka kan kalpui hian kan ramah hian production a pung zel ang em ? Chuvang chuan production oriented tak taka engtin nge thar chhuah kan neih theih ang ti zawnga kan officer te pawh hian ngaihtuahna an sen a, chuta tanga sum leh pai tam tak lo kal te pawh hi tangkaia kan hman an tha hlein ka hria a, heng hi ka ngaih pawimawh tak tak te a nih avangin ka'n sawi a ni. Hun min pek belh avangin ka lawm e, Pu Speaker.

**Pu NIHAR KANTI CHAKMA** : Pu Speaker, ka lawm e. Hei vawiinah senior Minister pahnihte Demand kan sawiho dawn a, a lawmawm ka ti khawp mai, kan minister te hi chu an efficient a ni. Hun tam ka hman lo ang a, ka ngaih pawimawh zual te tarlan ka duh deuh a ni. Pu Speaker, ka Bial chhung atana Demand ka neih chu, hei ka bial pumpui hi RD Block 2 hnuaiyah kan awm ve a. Tlabungah tun thleng hian RD block hi kan la nei lo va, ka bial pumpuia khaw thenkhat hi Bunghmun RD block hnuaiyah an dah a, thenkhat chu Lungsen RD block hnuaiyah an dah a, ka Bial mipuiten hemi avang hian kawng tam takah harsatna kan neih phah a ni.

Chuvangin Rural Development Minister zahawm tak Demand a ni bawka a, Tlabung tan RD block dah a hun tawh ka ti a. A chhan chu Tlabung hi hmanlai British hunlai atang tawhin khaw lar a ni a, a hma kha chuan Aizawl, Lunglei leh Demagiri tih thin a ni a. Entirna atan Pu Speaker, ka'n sawi duh chu, mirethei ve deuh te hian IAY te an dawng ve thin a. Lungsen atanga lak te a lo ngai a, nikhatah lo kal ta se, khami ni a an lak theih loh chuan Lungsen-ah chuan Hotel pawh an nei lo va, riaha tur pawh a awm lo va. Chuvangin mangang deuhin an haw leh thin a, hei vang hian harsatna tam tak kan tawh phah thin a ni. Chutiang chuan Malsury Village Council te, Puankhai Village Council te, Bandiasora Village Council te, Bunghmun RD block hnuaiyah hian an awm a, Bunghmun ah pheih chuan motor pawh tun thlengin ala thleng lo a ni a.



Chuvangin kan mipuite hian harsatna tamtak an tawh phah nasa hle thin a, chuvangin requirement kan en a, mipui ngaihnanah erawh chuan RD block hi pawisa bawm niin an ngai a ni. Tlabung mipuite hian hma kan sawn theih nan RD Block hi kan mamawh em em a ni tih min lo hriat sak la ka duh a ni. Ka bial mipuite tan R.D block hi min dah sak theih chuan ka bial mipui zawng zawngte kan lawmin kan changkan phah dawn a ni tih ka'n sawi duh bawk a ni.

Tin, Agriculture chungchang hi kan Bial phei chu Agriculture-ah potential area a ni a, lawmawm ka ti khawp mai a, Agriculture Department-te pawhin hma an la nasa hle mai a. Mizoram pumpuiah ka bialah hian kum khatah vawi 2 lai buh thar kan seng thin a. A thar hmasa phei chu kan agriculture Director nen buh seng naah te pawh kan tel ve a ni. Chuvangin kan mamawh ber chu leilet hi a zau tawh lo hle a, mirethei vek an ni si a, chuvangin JCB pakhat, entirnan, NLUP pawisa pawh dawng loin leilet zau thei ang ber kan neih theih nan JCB min pe ta se, chutah chuan kan production nasa takin a lo pung dawn a ni. Mizoram pumpui hi kan intodelh thei lo a nih pawhin ka bial Tlabung Sub-division chhungah tal intodelh theih ni se a tha hlein ka ring a. A potential chu kan nei tha khawp mai a, theihtawpa agriculture-ah pawh hma min lakpui turin ka ngen a ni.

Tin, Home Department chungchangah pawh hian Pu Speaker, ka bial hi hnam hrang hrang awmna hmun a ni a, amaherawhchu lawmawm ka tih deuh mai chu, OC fel deuh mai min dah sak a, mahse a motor hi a chhe em em mai a. Law and Order enkawl nan chuan motor hi fit deuh hlek a ngai si a, border a ni a, a lum em em bawk a, hnam hrang hrang awmna a ni bawk a. Chuvangin kan Minister zahawm tak hnenah pawh ka ngen duh chu motor tha ve deuh, fit ve deuh min pek theih chuan kan lawm hle ang.

Pu Speaker, Education chungchang pawh hi kan sawi duh chu practical problem hrang hrang kan nei a. Entirnan, RMSA leh SSA hnuaiah sikul tam tak min pe a, a lawmawm a. Mahse ka bialah chuan backward education district angin an ngai a, tunah erawh chuan hei hma a sawn chho ve zel bawk a. Tin, harsatna pakhat kan neih chu RMSA hnuaiah high school te min dah sak a, a lawmawm rualin zirtirtu leh zirlaiah hian engemaw chenah harsatna a awm ve thin a, a chhan chu zirlai tam zawk hi Chakma an ni a. Mother language-ah hian Chakma a ni a, ka biala zirtirtute dah chu Mizo vek an ni a, a lawmawm a, lehkhathiam an ni a, MA thlengin an zir ve a, an thiamna hi a sang hle mai a. Amaherawhchu practically a zir turin zirlaite chuan Mizo tawng an thiam lo a ni. Zirtirtute chuan mizo tawng an thiam a, Chakma tawng an thiam silo a, communication problem an nei nasa em em a ni. Chuvangin Pu Speaker, ka sawi duh chu kei pawh

Mizo tawng duh angin ka thiam vak lo va, minister kum 5 chhung kan nih ve avangin Mizo Tawng ka zir ve chu a ni a, chuvangin ka bial pumpuia Mizo language an zir ve theih nan primary atangin zirtirtu min dahsak thei se ka lawm khawp ang.

Ka Bial hi sawi ta ila vanduai emaw vanduai loh hi ka sawi thei lo va, a bikin ka bial chu a tam zawk Chakma an ni a. Keini Chakma District-ah hian in hmuh angin mahni mother tongue-in an zir ve a, keini erawh chu Lunglei district huam chhunga Chakma awm te, Aizawl district huam chhunga Chakma awm te hian mahni mother tongue-in kan zir thei lo hi a paw ka ti khawp mai a. Hemi chungchang thleng hian minister zahawm takin min ngaihtuah thei se a lawmawm khawp ang. Hmanniah zawhna chhannate chu min pe tho nain hei Malsuri ka bialah zirtirtu pakhat chiah a awm a, zirlai naupang 63 lai an awm si a, engtinge zirtirtu 1 in school 1 a enkawl ang ? A bikin practical problem kan neih chu primary level-ah ka bial pumpuia a tam ber chu single teacher primary school a ni. Grass Root-ah a that loh chuan kum kal chho zelah quality education chu a pek theih ngai lo vang.

A hnukung bera Pu Speaker kan sawi duh chu, kuminah HSLC result chu a tha em em a, a lawmawm a. Ka bial pumpuiah exam centre 1 chiah kan nei a, Chu chu Tlabung Government High School Centre 1 ani. Hmanniah Tipperaghat High School chu centre 2-na an dil ve a, an phu a ni, eligible criteria pawh an nei a ni. Entirnan, exam centre 1-ah zirlai 200 theuh exam theih a ni a. Kumin chu 200 aiin an tam avangin school dangah centre siam chawpin an exam ta a ni. Chuvangin, Tlabung ka bial chhungah hian HSLC exam centre dang dah kan mamawh a ni. Hei hi min pek theih chuan a lawmawm khawp ang. Pu Speaker, ka lawm e.

**SPEAKER** : Awle, Dr.K.Beichhua.

**Dr. K. BEICHHUA** : Pu Speaker, ka lawm e. Vawiina kan Budget session neih hi thupui neia thu chu ni ila chuanin thu a thupui chuan Mizoram sum harsatna leh inrenchemna tih thupui kan hman ka ring a ni. Mahse, thupui nei chi a ni lova, ka Unstarred Question-ah khanin kan statein a leiba a neih sorkar anga neih te, private anga neih te, company anga neih te, contractor anga neih te ka zawt a, a chhanna pawh ka hmu a ni. Chutih laia ka rilrua awm chu demand kan sawi hian hmun 3-a hmun 2 hi chu kan hun kan hman tawh a ni. Chuti laia ka rilrua awm chu ei leh bar lampangah kan ngaihtuah a. Kha ka Unstarred Question a answer min pek dan kan hmuh chuan ei leh bar lampang ka ngaihtuah chuan hmun 3-a thena hmun 2 chu kan pumpui hian a bain a nihna

tur lamah a thawnliam vek tawh tih kha ka rilruah a awm a. Chu lovah chuan, silh leh fen kan ngaihtuah a, a bain nalh tak takin kan lo inchei alawm le tam tak hi chu tih kha ka rilruah a awm a.

Chu lovah kan infrastructure leh kan office leh kan motor te kan ngaihtuah a, a bain motor nalh tak takah te kan lo chuang reng alawm le tihte kha ka rilruah a awm a ni. Chu chu keima rilruah a awm a ni. Chutiang chuan, chutiang dinhmunah chuan vawiinah hian sum leh paiah kan harsa tih member zawng zawngin kan sawi a, mipui pawhin kan hria a. Kan finance minister zahawm tak pawhin a sawi a, a dinhmun awm tur hi ka ngaihtuah thin a, chhungkaw pa ber damlo thih ngama na oxygen nen fate eee...hlahuh suh u, hlahuh suh u ka damchhuak mai ang, ka damchhuak ang ti a huaisen taka min kalpui angah ka chan a. A hmalaknaah hian fakawm pawh ka ti a, keini naupang te te te pawh hian hei hi challenge-ah kan la dawn a ni tih kha a hmasain ka sawi duh a ni.

Demand No.7-na Excise & Narcotics department-ah khan Pu Speaker, hun kal taah khanin Lungbun bul ka bialah khianin Excise 2 nge 3 nge ni an pistol puah theih loh avangin tihhlumin an awm a ni. Chu chu ka rilruah a rawn lang a. Vawiinah hian kan ramah ruihhlo tam tak proxivon atanga methamphetamine (chiahpum) leh thil dang dang Excise & Narcotics te hmalakna, min venna hnuaiyah kan awm a. Chutiang dinhmun a awm an ni a, an dinhmun hi dinhmun khirhkan leh harsa takah an awm a ni. Chulovah hei kan dan Mizoram Liquor Prohibition & Control Rules alo chhuak tawh bawh a. Hetiang a nih takah phei chuan an hna hi tih tur a tam dawn hlein ka hria a. Chutih laiah kan budget kan plan kan en khanin demand kan en khan advertisement & publicity-ah khan ₹ 50,000 chiah a ni. Chuloah publication-ah khan nuai khat chauh, chu lovah machinery & equipments-ah khan nuai hnih chauh, chu chuan Mizoram hi he total prohibition kan hlih tak kan control tur hi kan kut ke ber a ni si a kan control thei dawn em tih hi keimahah zawhna nasa takin a lut a ni. Vawiin dinhmunah chuan thawm ring tak Jet fighter anga ring dan bawhchhiatna pawh kan control theih loh kan tih tawh kha, thawm nei miah loa dan bawhchhiatna control tur chuan he kan demand ka en hian a beidawn thlak hlein ka hria a, chu chu Excise & Narcotics bik ni ta se.

Demand No.20-na School Education kha en leh ta ila. Hmannia ka sawi tawh ang khan Mizoram mipui chuanin world class education hi kan nghak a ni. Chutih lai chuan in tidik e, in tidik love, ka ti lo. Kan tidik e, kan tidik love ka ti lo. Chuti lai a inhmehlo deuh chu nichina kan sawi tawh RMSA zirtirtute, SSA zirtirtute leh Hindi zirtirtute hlauh pek theih loh leh world class education hi chu a inhmeh lo ka ti a ni. Chuvang chuan helai hi kan in concentrate hle thain ka hria a. Vawiinah hian pawl 10 an lo pass ang a, march velah an lo exam ang a, mi tam tak higher

secondary tha neilo district kan ni deuh vek si a. Aizawlah hian an rawn kal khawm anga, admission tihpui turin an bialtu MLA te hi min han sawm leh dawn a ni. School tam taka zirtirtute hi kan ngen leh ngawih ngawih dawn a ni, ‘mawh mawh khawngaih takin mawh mawh’ tih kha kan hna tur a ni leh ringawt mai dawn a ni. Chutiang dinhmunah chuan kan awm a. Chuvang chuan, engpawhnise, district lama higher secondary te hi kan hotute hian theihtawp chhuahin tihchangtlun deuh hlek tum ta ila, chutiang chuan, Aizawla admission harsa pawh hi a zia ngei ang tihna rilru ka nei a ni.

Tin, nichinah khan Dampa bialtu Pu Robiaka, kan MLA zahawm tak kha ka zawt a. A bialah khan higher secondary kan neilo a ti a, sorkar higher secondary kan lo neilo a lo ni a, private chu annei a ni. Mizoramah hian ka ngaihtuah a higher secondary awmlohna constituency hi kan Speaker constituency hi ni leh tlatin ka hria a ni. Private pawh awmlo, government pawh awmlo, chuvang chuan, engpawhnise, Tuipang hnaih bera awm ka ni bawk a, nichina ka sawi ang khan, kan pute hian Tuipangah te hian higher secondary hi min dinsak lul teh u tih kha ka ngenna che u a ni. Chu chu school education-ah ni mai sela, tawi te tein ka, n sawi mai anga.

Home department kha han sawi leh ta ila, Home Department hi eng sorkar pawhin sorkarna siam ta se, veteran politician, politics tawn hre deuh ber leh nu leh pa chan chang thei tur dinhmuna kan ngaih hi kan pe deuh tlangpui zel a ni. Chuvangchuan, wawiina kan Home Minsiter chungah pawh hian beiseinna lian tak kan nei a ni, wawiina kaihhruaite hian. Chutihlai chuan ka ngaih pawimawh deuh chu thil tam sawina hun a ni lo a, hmun dang te hi chu thudang ni ta se, ramri kan buaina hrul velah hi chuan kan sipaite post hi dah tam ta ila ava tha dawn em, tih hi ka ngaihdan a ni. Tute State atangin emaw kan thlam te, kan leilet te duhtawka an suasam hnuah an insaseng vek hnu a kan zuk lan leh ringawt thin te hi chu a tunlai tawh lo ka ti a ni. Chuvangchuan, Bairabi-ah khuan eng tih theih ka neih loh laiin vawi hnih lai he boundary dispute-ah khuan ka zuk kal ve a, eng ka ti thei chuang lo a. Chuta ka thil hmuh chu khulaia sipai Platoon khat kan neih ringawt pawh khu alo tangkai viau a ni tih ka zuk hmu a ni. Chuvangin boundary hrulah hian kan sipai post te khu dah tam thei ila.

Tin, District lamah mahni district te han sawi zel phei chuanin, kan quarters chhe lutuk hi, kan hmelma kutah kan boral lo anga, thli hian min tiboral dial ang tih hi a hlauhawm viauin ka hria a. Chuvangchuan a bik takin kan district a kan police quarter te khi khawngaih takin min ensak ula tih ngenna ka siam duh bawk a ni.

Tin, chu loah chuan Agriculture hi tawitein han sawi ve leh bawk ila. Vawiinah agriculture-ah hian kan rama wet rice cultivation ngaihtuahin keimahni eikhawp hi chu kan thar chhuak theiin ka hmu thin a. Chuvangchuan vawiinah kan wet- rice, cultivation neih theihna tur hmun hma tha, entirnan, chhim lamah chuan Phurra te, Chamdur te, Lawngmasu te, Maisa te, Salachhuah an tih ang chi te saw, exploit ta ila, agriculture a hmalaknan hmang ta ila, mechanise bawk ila, ava han tha dawn em, tih kha ka rilruah a awm a ni. T.V ah Agriculture minister zahawmtak a taimak zia kan hmu a, buh a seng lai te pawh kan hmu a ni. Kan Agriculture Minister hian buh hi kan pi leh pute seng dan ang takin a seng a, tun atanga reiloteah chuan khawl nena kan agriculture minister-in buh a seng lai hi hmuh ava chakawm em, tih hi ka rilruah alo lut a ni. Chutiang chuan kan ram neih ang te te te hi exploit thei ta ila, tih kha a tha hlein ka hria a.

Industries-ah hian hei COPU a kan awm ve takah hi chuan hmun hnih, Integrated Infrastructure Development Centre, Champhai Zote leh Pukupui a kan neihte kan han tlawh a, sum tamtak nen helai hi kan lo buatsaih a ni. Chutah chuan mi pakhatmahin helai Industry din tumna leh a ding ta tih ala awm lo te hi rilru a khawih hlein ka hria a. Chuvangchuan, keimahniin kan tih theih ang ang chite hi chu, a theih pheih chuan tuna kan hmun hma neih angah te pheih hi chuan a man nei lote pawn awareness atan engati nge heng ho hi kan lo tan tir mai loh tih te hi ka rilruah a awm a. Chutiang chuan vawiina, keimahni maia kan tharchhuahte , keimahniin kan siam chhuahte hi chu in promote sak hi kan tih tur hliah hliah niin ka hria a.

Hun a tawia, Pu Speaker, tawi te tein ka'n sawi anga. Trade and Commerce-ah hian, Zokhawthar saw tun hnaiah hian ka va hmu ve chauh a, sawtiang saw tunhma tangin Chappuih hian lo awm daih ta se, kalkawng tha tak nei sa, Chhimlamah sawn, ava han tha dawn tehlu em, tih hi ka hmuh dan a ni a. Chuvangchuan, International Boundary tha deuh hlek angah hian chuan Trade Centre hi tun aia tam hian hma la ta ila, Zoram hian avan thatpui dawn em tih hi ka ngaihdan a ni.

**SPEAKER** : I hun i hmang zo.

**Dr. K. BEICHHUA** : Pu Speaker, tawi tein Rural Development kha kan sawi anga, Rural Development hi a bik takin Block Level leh District Level ah chuan a bik takin thingtlangah chuan Rural Development hi Department ropui bera kan ngaih kan ti lo thei lo a. A chhan chu kan development engkim leh kan chhawr ber a ni a, chuvangin vawiinah helai hi Niawh tlang atangin phone ka dawng a, “ Ka pu, BDO kaltlang lovin Aizawl a mi pakhat alo kala, nuai 8 in helai hmun

hi va lai rawh, kan hotuten min ti e,” tiin ka bialah khian BDO pawh through lovin a kal tawp mai a ni. Helaia kan work agency kan zawhnaah kha chuan BDO tih vek a ni bawk si a, ‘E, ngawi rawh u, a hmingte lo hria ula, kan hotute kan zawt chiang dawn nia, tha deuhin ka lo zawt anga, a fel mai ang,” tiin ka chhanga.

Chutiang chuan Rural Development through hian BADP te hi tunah hian thingtlanga mi te, International Border area a awm te hi BADP thuam mekin kan awm a, hengte pawh hi a nihna dik takah chuan, a infrastructure develop-na tur leh a socio – economic develop-na tur hian a border area a chengte tan hian Central sorkar hian hengte hi a rawn theh chhuak a ni tih hi kan rilruah awm se. A hnufual zawk leh a rethei zawk dinhmuna kan dinna lai hi min hriatthiampaia, hnate pawh hi a area mite ngei pawh hian thawk ve thei ta se, a va lawmawm dawn em. Heng hmun dang Aizawl ami daih atanga kan va tih te hi chu, tu ten emaw contract an lo lei chhawng ve leh ta a, a hna te pawh hi a that tur ang hian a tha thei thin lo a, churangchuan kan hotute hian heng thilte hi min enchian sak ula, a lawmawm viau ang tih kha ka sawi duh a, Pu Speaker, ka lawm e.

**SPEAKER** : Pu Zawma.

**Pu VANLALZAWMA** : Pu Speaker, hun rei tak ka la lo ang a, kan member zahawm tak tak ten an sawi hlawm a. Ka sawi ve leh duh chu a bu puia kan pawisa dah dan neilo hi helaiah hian a tlem deuh a, helaiah hian ti ta se, tih te kha sawi ka tum chiah lo a. A chhan chu kan kalphungah hian tilai han tihdanglam dawrh hi chu kan thei lo turah ka ngai a, sawi sawi mah ila, a ngai hian kan pass tho thin a. Ka rilruah awm zawk leh ka’n tihrik duh zawk chu hei kum thar a ni dawn a, kan Minister zahawm tak tak te leh kan Finance Minister ten Budget te an puahchah leh mai dawn a, chumi hun atana ngaihtuahna an hman atana point thenkhat han tarlan ka duh a.

A hmasa berah chuan School Education ah hian kan education system hrim hrim hi tun hma atang khan ala fuh chiah lo ni hian ka hria a. U.T hlim atangin ti hian kan ti choh kan ti choh a, a laklawhah kan kal chho a, tihvak ngaihna kan hre lo a ni a. Tuna ka’n rawt duh chu kan Minister zahawm takte pawhin min lo hriatsak se, a bik takin School Education te hi chu kohhran hrang hrangten tunah an rawn hma chho leh ta mek a, helam tihchak hi a kalphung tur niin ka ring a. Mizoram zirna siam tha tak tak tur chuan nichinah kan hotu tam takin an sawi a, zirtirtu transfer tih velah pawh thingtlang lam kan buai em em na chu, transfer theih an ni a, Aizawl khawpuiah awm an duh a, kohhran school angah te hi chuan lungawi takin an thawk mai a. Tin, inpeknate nen an thawk a, helam tihlen leh zawk hi a tha mang e aw, ka ti a.

Transport Department-te pawh kan Minister zahawm tak a awm ta lo hlauh a, tun hma ngaihtuah chuan Transport Department hi te tak a ni tawh a ni. Kan privatise chho a, Sumo te kan service tir vak vak a, hei hi sorkar tan chuan a hahdam thlak a, a service a tha bawk si a, tiang hian Education pawh hi kalpui leh ta ila. Shillong leh Delhi-ah te pawh hian school tha leh hmingthang hi chu kohhran school a nih loh pawhin private school a ni vek a ni. Sorkar school chu engemaw zat a awm tho, chuvangchuan khami policy lianpui kha kan kalpui chhoh zel hi kan ram kalphung atan hian tun dinhmunah chuan kan ngaihpawimawh tur niin ka ring a, sawi tur tamtak a awm ang a kha ti te khan kan duhtawh mai ang a.

Tin, Agriculture hi hei kan Minister zahawm tak a awm a, a mangan thlak dan hi sawi thiam pawh hi a har angreng a, tumah va dem hleithei pawh kan ni chuang lo a. Entirnan, eng form form emaw te fill up a ngai a, eizawna enge ni tih chuan, lo neih, Agriculture, tih hi a tam a, a percent Mizoram ah hian ala sang khawpin ka ring. Ramdangah chuan enge in eizawna tam ber min ti se agriculture tih loh theih loh hi a la ni a. Heta eizawng hi kan la tam khawp mai a. Amarawhchu chutih lai chuan tui tak leh phur taka agriculture a bung hi chu kan nei tlem khawp mai in ka hria. Engtinng e kan tih ang engtinng e kan in tui tir theih ang tih pawh hi ngaihtuah deuh te pawh a thain ka hria a ni. Kan IAS officer hnamdang Mizorama rei tak awmin a sawi kha in hre tawh mai thei a, “Pa ho hian politics an sawi tui ang hi chuan an eizawna agriculture hi sawi tui se chuan an changkang ngawt ang,” a ti a ni. Mahni eizawna lam han sawi tui hi kan awm mang reng reng lo mai a. Tun hma kan Mizo nun ang kha ngaihtuah ila kan pi pute kha chuan ramhnuai lo an neih dan vel kha an ti ti tui ber kha a ni a, tiang khan an khawsa chho va. Tuna kan awmdanah hi chuan agriculture a in hmang tam em em si khan kha lampang kha kan sawi ngai reng reng lo a ni. Chuti zawnga ngaihtuah chuan engtinng e kan tih dawn le? Ngaihtuahna thar hmanga hmalak a va ngai ve tih hi ka sawi duh a ni.

Vawiin tlai ah hian kan Minister-te pahnih ka ngen duh a, Christmas a hnai tawh a, hlauh la thei lo zirtirtu te kha lak tir dan i ngaihtuah hram ang u tih kha ka'n sawi duh a. Kan Minister MGNREG changtu kan ngen duh lehna pawh a theih hram chuan ni 100 inhlawhna kan tih hi ni hnih ni thum tal chu christmas hma hian kan siam sak leh thei dawn lawm ni aw tih kha ka ngenna a ni a.

Ka thu tawp na atan chuan, MLTP 2004 a kha kan han hmu a point khat lek sawi lan duh deuh ka nei a, kan chhiar dan te pawh a in anglo mai thei a. 64-naah

khan “No retail sale stocks shall be within close vicinity of place of religious worship or school” tih hi a awm a ni, heti ringawt chuan a va buaithlak awm mang e ka ti deuh va. Hei pawh hi ennawn leh ava tha. A chhan chu, close vicinity tih hi eng kawnga hrilh fiah tur nge aw tih hi ka ngaihtuah deuh va. Hrilhfiaktu a zir khan a inang lo deuh dawnin ka hria a ni. Heti lai te hi chu kan .enfiah a ngai hlein ka hria. Pu Speaker, i dinglam ami te kha an lawm viau va, kei lawm viau turah pawh ka lo ngai lo va, muang chang deuh turah ka ngai a, mahse kan hmanhmawh ta angreng a. Engpawhnise, kha te kha min note sak ula, a dang pawh ka chhiar Chiang lo va, kha khan ka mit a la riau a, thil tam tak sawi tur a awm ang a, amaherawhchu hun ten min daih tawh lo turah pawh ngai ila, hun tha tak Pu Speaker, min pek avangin ka lawm e.

**SPEAKER** : Tunah chuan Minister zahawm tak Pu R. Lalzirliana, Home Minister i lo sawm ang u. Kan sawihonaa sawi fiah ngaite a sawifiah hnuah a demand hrang hrangte pass dil nghal mai sela.

**Pu R. LALZIRLIANA, MINISTER** : Pu Speaker, ka lawm e. Vawiin ka Demand member 18-in kan sawiho va, nimin ang khan kan bang hma leh mai dawn emaw kan tih avangin tlai lam thingpui te pawh kha buatsaih lovin kan awm a ni awm a. Department a tam deuh hlek avangin darkar khat te chu ka duh mai thei a, min lo hriat thiam ka beisei a ni.

Kan member zahawm tak tak ten an sawi kha hengah hian ka lo chhinchhiah a. Vawiinah hian a hmasain ka department-a officer te MLA ten an thil kan note bakah note tura mi thahnem tak an lo kal hi a lawmawm ka ti khawp mai. House kan zah thiam hian mahni kan zahawm a ni tih hi Department dang zawng zawng pawh hian hria ila, hnam kan changkang zel a ni tih hei hian a lantir in ka hria. Tin, chumi piah lamah a changtu hi mi tlinglo tak ka nih bawkw avangin mite an rawn tawiam tha hi an chungah ka lawm em em a ni tih ka'n sawi hmasa duh a, Tichuan kan sawi ang khan a mimal a kan react chuan hmanah kha ka bei vak mai a, an react a helaiah kan lokal tawh dan te, kan lo kal leh zel dan tur te han sawi ve ngai bawkw si kha a rei ta lutuk a, kan hotute an phun deuh hlekin ka hria a. In thusawi kha chu kan lo chhinchhiah a. Helaia ka thusawi turah hian a rawn sawi Chiang hlawm deuh bawkw tho-in ka hria a. Nichin khan kan member zahawmtak-te khan Home Department-ah hian, other charges ah hian a tam lutuk deuh em mai tih ang chi te kha a awmin ka



hria a, hengah hian nuai 242 kan nei a. Other charges-ah hian nuai 160 hi police uniform leina tur a ni a.

Tin, uniform mai kha a ni lova, a puantana lei mai kha a lo ni lova, a thui te leh thil dangte a lo awm zel a, kumin-a kan hman tur tak hi chu ₹ 82,20,000/- chauh a ni tih kha ka'n sawifiah duh a. Tin, (MV) Motor Vehicle khan motor 80 lai lei tur emawa zuk inngaih deuh mai te, a va tam em em ve han tih mai kha thil awm thei a ni a, ka lo ngaihthlak danin. Khangah khan motor leina tur pakhatmah kan nei lova. Tunah hian keimahni state budget ni lo, central Home Ministry atanga kan hmuh a, motor kan mamawh ngawih ngawih (nichinah kan member ten Outpost-ah te, Police Station-ah te in motor neih chhiat zia in rawn sawi kha ka hre reng a) chutiang tur chuan GAD lamah te kan han kaltlang a. Amaherawhchu, sawi leh sawi hnu wawiinah hian kan sum harsat avangin kan motor leina tur pawh chu Finance lamah hian a la tang rih a ni tih kha ka'n sawi duh a. Chuvangin, Motor Vehicle lama kan sum neih hi wawiina kan Budget han pass chiah-ah pawh hian kan indaihlohna chu ₹ 3,28,51,000/- lai a ni tih kha kan hotuten min lo hriatpui turin ka duh che u a. Tin, tuna kan neih ang ang hi POL leinan te, repair nan te a ni a. Tunah hian Home Department hian motor 655 kan nei mek a ni. Chuvangin, kan hotuten a tam lo tih kha min lo hriatpui ka duh a.

Tin, kidnap tih chungchang te, tunlai chanchinbu-ah te leh helaiah te pawh kan han sawi nual a. Kan sorkar ve chung hian vanduaithlak takin tum hnih Mizote telna a awm a. Chu pawh chu Mizote kidnap tel an tum lova, an bulah hnamdangte an lo awm ve avangin anni an lo chhuah mai chuan, an kalna lam leh umzuina lam kha a ran lutuk dawn avang a nih ka ring a. Anmahni lam rawn inphat mar lehna-ah chuan "Mizo chu tih kan tum reng reng lo, an tum ram an han thlen ve si kha chuan, chhuah leh mai theih pawh kha an ni ta lova, pawh kan ti khawp nghe nghe a ni." an ti a ni.

Nichinah khan kan member zahawm tak West-II bialtu khan police pension tawhte leh a pension lo te pawhin an naute hi hnathawkah an la chhawr reng an ti a. Khawngaihtakin ka hnenah rawn sawi sela action kan la ang tih ka tiam duh a.

Tin, Thingsai Police Check gate chhia tih hi a dik a. Kha kha a estimate amount kha 10 lakh emaw a ni a. A hma khan 6 lakh sanction a ni a. Tichuan, 6 lakh khan zawh tur a ni lo reng reng a, 4 lakh dang a la awm a, chu chu a kum leha sanction tura tih a ni a. Khalaiah khan hriatthiam loh deuh hlek a lo awm kha a pawh kan ti khawp a. Tunah chuan tha takin kan B.D.O ten

an sa thei turah kan ngai a ni. Tin, tunhnu-ah chuan heng nuai sawm, sawmhnih man hnuai lam ang chi reng reng building sak hi a kum leha chhonzawm tur emawa tih hi a rem lo in kan hria a. Chuvangin, kum khat-a zawh zel turin kan buatsaih a ni tih kha ka'n sawi duh a. Kha kha Police lam a ni a. BADP nen a inkaihnhawih avangin BADP ah khan a ni daih bawk a. Kan sawi thleng tho tho a nih chu.

The Mizoram Population Registration Bill an rawn duang zo thawkhat tawh a. Amaherawhchu, hnam ang hian fimkhur a ngai khawp mai a. Human Rights Commission te tunah hian kan thleng zung zung tawh a. Chuvangin, ennawn leh tha kan ti a, ka hriatsual loh chuan thla thar ni 4 ah hian kan YMA te leh kan Home Department ten ennawn leh turin kan buatsaih nghe nghe a ni.

Ramriah hian Outpost a tam thei ang ber dah ka duh a. Amaherawhchu, sawi leh sawi hnu mihring chuan kan daih kan ti thei, mahsela, sum leh pai te, motor te leh engkim in sak te a lo ngaih vek avangin tun hunah hi chuan a harsa deuh rih a. Outpost pahnih lai kan hawn belh nghe nghe a ni tih kan sawi duh a. Kan sorkar hnuin tun term-a kan han luh leh hnu pawh hian bomb te a puak leh nual a, hengte pawh hi kan hria a. Amaherawhchu, kan police ten chak takin hna an thawk a, a tipuaktute, misualte an man chho zel a ni tih kan hmu bawk a.

Tin, nichina kan sawi ang khan Human Rights pawl ami, Asian indogeneous people network pawl ami Santosh Chakma an tih khan ni 13.10.2009-a Zarzokima thah a nih a Mizoten Tuikuk, Riang te chung a thil an zu tih dan kha sorkar-in an fuihpawrh angin, keimahni fuih pawrh angin a zia k a, Human Right Commission-ah nasa takin min hek a. Anni pawhin a tirah chuan an la thu tak viau a, amaherawhchu, thu dik hi chu a tlu ngai lova, dawt hi chuan ke a nei lova a tlu leh mai thin angin tuna kan sorkar leh Human Right Commission te vawi duailo an inchhan hnuin tunah chuan thu tling loah a ngaih sak ta a ni tih kha a lawmawm em a kan sawi ve duh a ni.

Tin, hei mai hi a ni lova, Riang (Bru) chungchangah pawh National Human Right Commission-ah hian case pathum sorkar hi min siam sak a. Chungte pawh chu theih tawpin kan Sorkar hnathawktu kan officer-ten thu dik kha huaisen taka an sawi zel avangin heng thil zawng zawng pawh hi thu tling lovah an ngaihsak ta a ni tih hi ka sawi leh duh a ni.

Nichina kan sawi tak ang khan border Outpost te hi a pawimawh em em a, chuvangin, thei leh theilovin misualten min rukbona Chikha hmunah kan Forest Department-ten an ui em em, amaherawhchu, kan Minister ten, 'hengah hi chuan min vengtute an ni baw k ang a. Chuvangin, police an awm hi central lamin an hriat kher pawh a tul lova, helaiah hi chuan Outpost hi dah mai ni rawh se,' tia Forest Minister-ten min tihpui avangin wawinah hian Chikhaah BOP kan siam tawh a, tunah hian an awm reng tawh a. Tin, North Tinghmunah hian BOP kan siam baw k a. Hei hi HPC(D) ten tuklaih chhiah an khawn thin avangin chung dang tura siam chu a ni tih kan sawi duh a.

Tin, kan department-ah hian Sainik Sikul hi kan din ve a. Chu chu tunah hian chak takin Chhingchhipah khian hma lak chhoh zel a ni a. 13<sup>th</sup> Finance Commission atangin nuai 5000 hi min pek tur a ni a, tunah hian 1<sup>st</sup> Instalment leh 2<sup>nd</sup> Instalment kan hmu tawh a. Chak takin hna thawh mek a ni a. Tichuan 3<sup>rd</sup> IR Bn. Headquarters hi Thingkahah Lawngtlai District-ah dah tur a ni a. Hei hi DoNER atangin 1<sup>st</sup> Instalment cheng nuai 1023 kan hmu tawh a, chu chu North East Consultancy Service, (NECS) te hnenah thawh tir tura pek a ni a, work order pawh pek tawh a ni a. Tunah hian an thawk tan a, kawng te an lai tan mek a ni.

Ramri chungchang kha kan ngai pawimawh a, a dik a, ramriah hian inpuhtawna tam tak a awm thin a. Hei hi kan ngai pawimawh ber tur pawh niin kan hria a. Chungah chuan Phuldungsei, Tripura-ah khuan khawlai takah ramri a kal tlang a ni a. Hei hi state pahnihte inkara ramri tur an siam dan hi a dik lova, Inner Line Notification-a a chuan loh danin Survey of India toposheet no. 84A/(v) a an tih anga tih a ni lova. Chuvangin, kan sorkarin Home Department lam atangin Tripura sorkar te an dawr a. Tichuan, Silchar-ah helai chanchin hi sawiho a ni a. Hemi kan sawihona rah atang hian tun atanga reiloteah hian Survey of India kaihhrainain a hmunah en ho a ni dawn a. Tin, Assam ramri nena kan buainaah te pawh Guwahati lamah te pawh zu sawiho tawh a niin hma chu theih tawkin kan la ve zel tawh a ni tih kha ka'n sawi duh a ni.

Aizawl City Surveillance Project hi kan buaipui mek a, Govt. of India chuan cheng nuai 1200 zet minrawn pe dawn a, first instalment leh second instalment pawh kan la tawh a, tun Krismas hma ngei hian first phase chu zawh kan tum nghe nghe a ni. Tin, chutiangin ram venhimna lamah hian theihtawp kan chhuah zel a, (CCTNS) Crime and criminal Tracking Network System hi a pawimawh hlein kan hria a. Misual hnu chhuina kawngah te chak zawka police te kan inbiak tawn zung zung theihna tur leh hmun pawimawh lai deuhah chuan internet a thlun vek tum a ni a. Police station-ah phei chuan 41 laiah thlunzawm tum a ni nghe nghe a ni. India rama a titha ber te

zing ami kan ni a. Tunah hian 91% vel kan hnathawh turah hian kan zo tawh a. Ministry of Home Affairs pawhin state sorkarah min lawmpui thu, hemi kan thawh chak avanga min lawmpui thu te hi min rawn hrilh nghe nghe a ni.

Police building chhia te kha in rawn sawi a, a dik lah tak a, kei ka zin ngam loh phah a. Kan building te hi a chhe lutuk tawh a, a hrehawm khawp mai a. Chutiang chuan, kan PHQ ber pawh hi a chhia a, state dangah te in kal chuan Police Headquarters, an DGP awmna te hi chu hmun nuam tak a ni a, hostel te nen engkim an nei a. Chutiang chu a nih laiin keini chu U.T laia kan sak kha kan la ring chho a ni a. Chumi a nih avang chuan DoNER lamah kan dil a, nuai 1500 chu tunah hian retain a ni tawh a. Tin, SP Traffic, kan traffic jam nasat zia te, office mumal an la neih loh avangin heng an office sak nan hian nuai 1500 tunah hian DoNER- ah retain-in a awm mek bawk a ni. Chungte chu tuna in sawi pawimawh zual Home Department ah hi chuan ni mai se, sawi tur tam tak a la awm a.

MPS te hi tunhnaiah direct-in panga kan la a, a hma khan sawm kan la tawh bawk a. Hengte hi NEPA lamah training in an awm a, a then an zo tawh a. Tiang chuan, MPS pahnih tunhnai maiah khan IPS ah an kaisang a. chungte chu Home Department lama kan lo kal tawh dan tlem kan sawi duh a.

Tuna kan Budget-ah hian Mizoram Police hi motor kan neih te leh mihring pawh hi kan tam tham a ni tih kha kan sawi duh a. Kan hnathawh hi Office-a thawh ve chet chet a ni hranpa lova, hmun dang dangah chutah khatah a n in that, chutah rukru a awm, chutah misual an awm ti a, mi pahnih khat lek kal mai pawh ni lo, a battalion, company deuhthawa move chang hi tam tak a awm a ni. Chuvang, chuan kan hautak viau a, functional unit 25 lai kan awm nghe nghe a, BOB te leh Police Station Out Post te hi hna hautak tak awmna a ni vek a ni tih kha sawi ngai lovin in hre theiin ka ring a. Tiang chuan tuna kan pawisa hmuh ah hian kan TA/DA te pawh kan inpe leh thei dawn chuang lova, RE lamah te engemaw tia kan Finance Minister lamah te min rawn duhsak leh loh phei chuan a buaithlak viau dawn a.

Home Guard kan tih te pawh hi 223 vel hi central in a hlawh chanve an tum turin keinin hlawh chanve tum tur in lak phalna min pe reng a, Amaherawhchu, hei pawh hi kan la hlei thei lo a, tuna kan budget allocation-ah phei chuan kan indaihlohna tur hi cheng nuai 200 vel lai a ni a. Chutiang a nih lai chuan Jail lamah hian kan IG Prison hian Jail pasarih a enkawl mek a, kan Jail 7 ah chuan mi 1000 chuang tang kan nei mek a. Modernization atangte hian engemawzat tunah

hian in sak te kan nei mek hei hi in rawn sawi lovin ka hria a. Other charges lamah hian nikum lamah kha chuan nuai 8,454,000 min pe a, kuminah hi chuan kan harsatnate Jail- ah chaw tha an ei zawk nan te, inenkawl na damdawi tha an neih zawk nan te leh thil dang dang atan khan nuai 211 leh singga lai min rawn pe a. Helaiah hi chuan kan lawm khawp mai a, lawmthu kan Finance Minister hnenah pawh ka sawi duh nghe nghe a ni.

Sainik Welfare and Resettlement tih hi sipai bangte, an chhungte an thih san tawhte chhawmdawl na hna thawktu an ni a. Tin, sipai tanglai tunah hian kan term kal ta leh tun maiah pawh khan mi engemaw zat kan han thawn a ni a. Chungte chu India rama sipaia an tannaah hian hmanlai ang bawh khan an la huaisen tho mai a. Khulama medal dawngte hi keini pawhin helamah chawimawina kan lo pe ve thin a. Hman lawka Kashmir-a hel hotupa thattu pawh kha cheng nuai nga lai hman ni ah khan kan pe nghe nghe a ni.

Fire Emergency Services-ah hian tunah hian bill pending hi a la awm nual a, motor vehicle atana tuna kan plan-a min han pek hi cheng nuai 10 leh 5000 ni a. Kangthelh motor hi chi hrang 30 kan nei a, a thawktu te, officer te leh midangte han chuan ve nan hian motor 14 kan nei bawh a, a vaiin 44 a ni a, chutiang ho kumtluana han enkawl nan chuan a huphurhawm angreng hle tih chiah kha kan sawi thlang ang e. Tichuan Home department lamah chuan kha kha tawh mai sela a thain ka ring a.

Agriculture hi sawi tur a tam mai a dawhthei taka min lo ngaihthlak sak chuan minute 10/15 ah chuan ka zo leh mai chuan ka'n ring a. Mizoram mipui 60% vel hi agriculture-a eizawng kan ni a. Kum 2008 lam atang tawh khan kan agriculturist hote, lo neitute dawm kan nan hian programme chi hrang hrang siam a ni hlawm a, amaherawhchu, kan la hlawhtlinpui lutuk hlawm lo va. Tichuan tunah hian New Land Use Policy (NLUP) kan tih kha duang chhuakin hemi hian nasa takin min tanpui chho a ni. Lo neitu tam zawk hi tlang rama lo neia eizawng kan ni a, chu tlangram lo neih chuan lei chunglang hang tha kumtin a len ral thin a, chuti a nih avang chuan ecological balance te pawh nghawng thei hial turin kan ram a awih si a, a lo awm chho hi a pawh kan ti khawp mai a. Chuvangin, hetiang thlang lova tlang ram lo neih, lovat a tichereu reng lo hian hlawk zawk si leh tha zawk si a lo neitute enkawl dan hi agriculture department chuan kawng hrang hrang in a zawng mek a ni.

2014-15 ah hian scheme hrang hrang NLUP kan tih te, National Food Security Mission ( NFSM) kan tih te, RKVY kan tih te, National Mission on Agricultural Extension and

Technology kan tih te hmang hian tan kan la mek a. Oil palm te pawh hi chung hnuai atang chuan nasa takin chin a ni mek a. Tun Oct 28 mai khan Oil Palm Mill, India hmarchhaka hmasa ber atan kan Chief Minister zahawm takin Bukvanneiah, Kolasib district chhungah min zuk hawn sak nghe nghe a ni a. Darkar khatah oil palm hi ton 5 a her thei dawn nghe nghe a ni. Hemi bakah hian Serchhip leh Lunglei-ah te pawh hetiang mill hi din tum a ni nghe nghe a ni. Tichuan, oil palm heti taka kan han uar takah hi chuan kan member zahawm takten nichina an sawi ang khan tuna an china, an phurh chhuahna hi tunlai hi a hlawk lai ber a ni. Amaherawhchu, kawng a nal a, metal te a nih loh a vangin an phur chhuak thei lo a pawikan ti a . Hei hi kum lo kal leh tur atan hi chuan RKVY lam atangin emaw a theih ang angin agriculture link road hi metal hial kan thlen theih loh pawhin boldering tal tih kan tum a nih kha ka sawi duh a. NLUP leh RKVY scheme hnuai hian WRC area hi nasa taka develop tum mek a ni a. Tunah hian hlawk zawk leh mumal zawka thlai kan chin a, permanent agriculture kan tih zel hian nghawng a nei chho tha sawt hlein ka hria a.

Tichuan, farm mechanization nichina kan MLA ten in ngaih- pawimawh kha kan ngaihpawimawh tak a ni nghe nghe a. 2014-15 ah hian RKVY hmangin hmun 36 ah Custom Hiring Centre din tum a ni a. Tichuan power tiller hi 400 subsidise a sem tum a ni bawka; tin, mini power tiller hi 27 chuang sem tum a ni bawka ni. Tiang chuan agriculture hnuai farm machineries scheme thar sub- mission on agriculture mechanization an tih mai pawh hi tunah hian state level committee din a ni tawh nghe nghe a, 2014-15 ah hian hemi hnuai atang hian custom hiring centre hmun 5 ah kan siam belh dawn a. RKVY lam atanga kan siam turte nen phei chuan. Centre 41 kan nei dawn a ni. Hengah hian a tul dan a zirin an area a zirin, tractor pahnih te, pakhat te a tul chuan, kan tlin chuan 3 lai te pawh dah theih a ni ang a. Hetianga theihtawpa hna kan thawh chuan nasa takin hma kan sawn chho zel turah kan ngai a. Ei leh bar lamah, 2014-2015 chhung khan 2789 hectre a zauvah oil palm hi chin a ni a, tunah hi chuan 32200 hectre-ah chin a lo ni ta nghe nghe a ni. Oil palm rah hi avaiia tuna kan lei tawh chu 4368 metric ton lai a ni a, company hian oil palm rah hi kg-ah ₹ 5.50 in an lei a ni. Pulses lam hi MSSM hnuai hian chin uar tum a ni a, tunah buh seng an zo a, thenkhatah chuan a chi te pawh sem a ni leh tawh a. Sik leh sa a lo danglam avang hian kumin 2014 ah hian loneituten nasa takin kan tuar a, India ram pawhin nasa takin a tuar a ni tih kan hria a, Champhai District-ah an tuar nasa zual a, a chhan chu khaw kheng vang mai nilo hian an leilettu lawi kha nasa takin a pul a, hnathawhna tur an nei ta lova, chumi thawh sak tur chuan tractor te kan han hire sak a, chhungkaw 209 lai lo te nei theiin kuminah hian kan siam leh ta a, kan officer-te remhriatna a zarah hetiang hi kan han ti thei a, a lawmawm kan ti khawp mai a. Hetianga Department lama hnathawktute leh kan kut hnathawktuten theihtawp an

chhuah avang hian India rama chawimawina Kristi Carmen Award hi 2011-2012 leh 2012-2013 hian kan dawng a, hei hian pawisa fai ₹ 25,00,000 lai a keng tel a, kuminah pawh hian nominee zingah kan telin kan hria a, kan lawm rilru hle a ni.

Pi leh Pu atanga kan lo neih dan tlangram lo neih, sik leh sa lo danglam zel hian ecological balance te pawh a tidanglam tawh a, chuvangin hetiang ang lo neih hi tinep turin theih tawp kan chhuah a, kum 2012-2013 khan 24706 hectre a ni a, 2013-2014 ah chuan a lo tlahniam ta a, 26633 hectre a lo ni ta a. Chutiang a nih lai chuan kan member zahawm takten in han sawi fertilizer-te nena tlangram lo neih te department-ten nasa taka tan an lak avangin kan tlangram lo neih kha hectre zawngin tlahniam mahse buh thar erawh chu a pung thung a ni, a lawmawm khawpin kan hria a ni. Tlangram lo neih leh WRC-a kan buhthar zawng zawng belhkhawm hi 58994 metric ton lai a ni.

Kan member Pu Nihar-a phei chuan mechanization hi NLUP-ah pawh hian JCB lei zawk ila nasa takin hma kan sawn phah ang a rawn ti hial a, chutiangte chu kan hotuteah hian ngaihtuahna a awm zel a. Hmanniah pawh committee lian tak kan nei a, chhim lama kan lo neihna hmun la hai chhuah si loh te pawh saw nasa zawka hma kan lak theihna turin mechanization kan ti ang a, engkim kan tihsak vek ang a, chumi hnuah chuan a awmna vela khua neitute District Council remruatna hnuaiah plot te pawh kan kheng ang a, kan pawh tir ang a, an enkawl tura kan tih hi a tha dawn lawm ni tih ngaihtuahnate pawh kan nei a. A chhan chu sawlaiah sawn va ti ila tuna kan buh thar tamna ber chu Kolasib District khu a ni a, khulaia kan thar tam ber khu phaiah vai hovin an la thla deuh vek a, a zatve aia tam hi phairam a lut thla leh a ni a. Sawlamah saw chuan ti ila, Burma-ah te buh an ngah em avangin hralhchhuahna a awm dawn lo reng reng a, an hralh leh pawhin hnam dang pawh ruai ila, an hralh duh a nih pawhin Mizoram chhungah an harlh dawn a, hei hi thil tha takah ka'n ngai a ni tih kha tawh lo chungin kan duhtawh leh mai ang a. Thenkhat in mut a chhuak deuh tawhin ka hria a, a la awm nual bawh si a.

Rural Development Department hi han sawi a thain ka ring a. MGNREGS kan tih Mahatma Gandhi National Rural Employment Guarantee Scheme kan tih mai hi 2013-2014 khan central atangin pawisa vaibelchhe sawmhnih pali, nuai sawmli pasarh sing li sanghnih zaruk sawmruk paruk kan hmu a state sorkarah hian vaibelchhe khat nuai sawmpakua singli sangruk zakua sawmkua pakua kan hmu bawh a, chutatang chuan ni 79 vel average a chhut in kan inhlawh thei a ni. Kuminah hian tunchinah hi chuan nuai 9941

hi kan hmu tawh a, matching share hi tunah hian kan la hmu chiah lova, tun thlengin chawhrualin ni 10 chauh November ni 20 a ni tawh chung hian kan inhlawh a, thla ruk vel kan la nei a, engnge kan thlen ang kan hre lova. Chutiang chuan NREG hi Programme Officer-ten social audit an nei thin a, chuti chungin Director hovin, Director hmalaknain social audit hi independent-in, a hranin an nei ve thin a ni. Helaiah hian pawisa a tam avangin engemaw tia chheprelh a awm ang tih kan hlau em em a, chutiang chuan kan theih ang tawkin kan fimkhur ve hleah kan inngai a. 2014-2015 financial year-ah hian zawhnaah te pawh khan kan sawi tawh a, kan Ministry-in Labour Budget a lo approved tawh sa chu 46% vela a rawn cut avangin hei hi keimahni chauh a ni lova, India ram pumpui rawn cut a nih avangin keini pawh hi ni 100 inhlawhna kan tih hi a hming hran phuah hial tur em ni ang tih te pawh a lo awm ta a. Ni 40 emaw 45 emaw kan thlen theih chuan kan thleng sang viau turah kan ngai a ni. Tin, chutiang piahlamah chuan, central fund hi Ministry-in tunhma chuan R.D-ah direct-in a rawn pe mai thin a, tunah erawhchuan state finance -ah pek vek a ngaih tawh avangin hei hian nasa takin min tikhawtlai nghe nghe thin a. Tuna kan pawisa neih ang te pawh hi Krismas hma hian kan sorkarin min rawn pek theih chuan inhlawhna kan siam thei turah kan ngai a ni. Tichuan, kan han sawi zel chuan mahni sorkarah a lungawi ta lo emaw min ti ang tih a hlauhawm lek lek a, kan harsatna avang khan heng state finance kaltlanga tih te pawh hi tlema a ziaawm theih nan tam pui lo kaltlang dan te hi chu awm sela chuan kan duh khawp mai a.

Tin, nichinah khan grant engemaw han sem mai chi tur a tam khawp mai a, a lawmawm tih te kha in awmin ka hria a. R.D. ah hian khatiang kha kuminah hian kan nei miah lova, hetiang grant fund anga lo kal ta Budget-a in han hmuh thenkhatte hi chu NREG sum te, IAY sum te, IWMP tih te leh khatiang sum kha a ni tih min lo hriatsak ka duh a. Tichuan, IAY ah hian kan hotupa pawhin a lo sawi a, nichinah kan member-te pawhin in thahnemngaihna tak rangva semna tur hian cheng nuai 50 kan hmu a, kuminah hian cheng khat mah kan hmu ta lova, hei hi miretheite leh mirethei chiah lo vanduaina tawk te, in lo kang thut te, khatiang vanduaina tawkte kha kan sem thin a, kan MLA te, kan member-te tan waviinah chuan a hawihai thlak tawh mang eaw tihna te chu a awm a ni.

IAY hi 90% hi Central tum a ni a, 10% hi State tum a ni a; tichuan in pakhat sak nan hian ₹ 75,000/- a ni a, a siam that nan han thawmthat nan ₹ 15,000/- a ni a. Nichinah khan IAY latute hi loan an lak ve theihna kawng hi a awm reng si a, pakhatmahin an la la lo a ni tih kha kan member zahawm takte khan an rawn sawi chhuak a ni a, tunah hian Bank lam te pawh



helam kawngah hian hma lo la chak turin hrilh an ni tawh a. Chutiang a nih lai chuan ka rilrua lo awm mai mai chu IAY cheng nuai khat pawhin in sa thei lovin loan han la leh ta se, a pung kha, a pung awm miah lo pawha rul leh tur ni ta se, an tan kha chuan phurrit a ni mai awm mai mang e tih kha ka rilruah chuan a lo awm nghal deuh nghe nghe a ni.

Tichuan, kuminah hian I.A.Y hi Central sorkar atang hian min rawn pe chhe hle mai a, In 1296 sakna tur chauh min rawn pe a, nikum lamah khan in 3678 sakna tur min rawn pe a. Chuvangin Central lama tanpui nei deuh te leh BJP an tlina lo hlim ve te phei kha chuan zu nawr deuh kha chu a tha awm mang e aw tih kha chu rilruah hian a lo lang ve a ni. Hei hi keini state chauh a ni lova, State zawng zawngah hei hi tihhniam vek a ni nghe nghe a ni.

Tichuan, District Rural Developmet Agency (DRDA) tih te hi kan hre lar khawp mai a, 2013-14 ah khan DRDA hnuaiah hian Administration hnuaiah cheng nuai 57,367,000 kan hmu a, state tum ve hi min pe bawk a. Tichuan, 2014-2015 ah hian central-in cheng nuai 236.16 a rawn release tawh a, hei hi tunah hian kan hmang mek nghe nghe a.

SIRD hi ka'n sawi tho ang a, thenkhat tan chuan a lawmawm lo angem ka hre lova, SIRD hi kan hmang tangkai em em a, training petu ber an ni a. Research te pawh a tul dan azir zelin an ti thin a. Heng faculty te hi mithiam tak tak an ni a, chungho chu Agriculture & Allied-a AH & Vety ami te, Rural Development ami te, Economist mi tha tak tak te lak an ni hlawm a, an hlawh hi 100% central funding a ni nghe nghe a. SIRD Headquarter hi tunhma khan Kolasib kan hmang thin a, tunah hi chuan Durtlangah in ropui tak, India rama tha pawl tak ni tur te zing ami kan sa tawh a, chutih laiin Kolasib te hi kan hluihlawn dawn chuang reng reng lova. Kolasib leh Lunglei te, Thingsulthliah te hi Regional Extension atan hman tur a ni a, Kolasib hi a changtlung ber sa a ni nghe nghe a. Heng training na tur pawh hi 100 % central tum a ni nghe nghe a ni.

BADP hi nichinah khan Saiha bialtu zahawm tak khan a rawn sawi a, sawlaih BADP nuai riat man lai BDO pawh kal tlang lovin va thawk rawh ti a mipakhat chu a va kal mai niawm tak a ni a. A agency hi BDO te an nih rualin anni lo pawh hi Directorate Engineer te agency ah khan an awm a, chutiang chu an inthen dan a ni. BDO chan loh a ni mai thei a ni, thilsual a awm ka ring rih lo tunah hi chuan. Tichuan, BADP kan hmanna ber chu, border area a awm kan ni a, constituency zawng zawngah hian hman theih awm a ni tih te pawh hi thil awm thei tak a ni a. Amaherawhchu, tunah hian Bangladesh leh Myanmar ramriah chauh RD Block 16-ah chauh hman a ni tih kha kan sawi leh duh a. 2013-2014-ah hian BADP hna chi hrang hrang 566,

nuai 4017 in kan thawk a. Tichuan 2014-15-ah pawh hian hna chi hrang hrang 576, nuai 4017 bawk hian thawh tum a ni a. 1<sup>st</sup> installment te rawn release a ni tawh nghe nghe a ni. RD-ah hian chi hrang hrang a awm a, Integrated Wasteland Management Programme (IWMP) kan tih te hi 2009-2010 a tan tawh kha a ni a. Vawiih hian keini pawh khami kum khan kan tan ve nghal a, project 16 lai Mizoramah kan nei tawh nghe nghe a ni. Tichuan, 2014-15-ah hian project thar 11 kan din leh tawh a, a vaiin project 89 kan nei a. Ram 373915 hectares chhungah hian hna kan thawk mek nghe nghe a ni.

Tichuan kum 2013-14-ah hian IWMP hi Govt. of India atangin cheng nuai 7004 state matching share khin letna tur nen kan nei tawh a. 2014-15-ah hian Govt. of India in 1<sup>st</sup> installment atan nuai 7696 zet min rawn release tawh nghe nghe a ni. National Rural Livelihood Mission (NRLM) kan tih te hi eng eng emaw chi hrang hrang a tam mai a. Thil kal tawh IWMP atanga tuna kan han sawi tak IWDP atanga a thlakna IWMP a ni a. Chutiang bawkin NRLM kan tih te pawh hi SGSY thlakna kha a ni mai a, a awlsam zawng chuan. Tiang chuan kum 2012 khan kan kalpui ve nghal nghe nghe a. State pum tuam chhuak nghal lovin District pahnihah Serchhip leh Kolasib District-ah te hei hi tan phawt a ni nghe nghe a ni. BPL chhungkua hmeichhiate helaiah hian Self Help Groupah hian an awm a. Eizawna ngialnghet an lo neih theihna tur te, Bank an lo dawr thiam theihna tur tein Bank hotute pawh hi kan ko khawm reng a. Tichuan sorkar an lo dawr ve theihna tura an mamawh chi hrang hrangte ngaihtuah sak thin a ni a. Mahni kea ding thei tura buatsaih hi hei hian a tum ber a ni. Kuminah hian Approve Annual Action Plan chu cheng nuai 47,993,000 a ni a. Tun thleng hian Self Help Group hi 697 kan nei tawh a, kan din tawh a. Self help Group 446 hnenah hian cheng 15,000 theuh revolving fund atan kan pe tawh nghe nghe a ni, He scheme hi hmeichhiate chawikanna tak tak a ni.

Tichuan NLCPR tih vel te hi chu kan hre viau hlawm a. Hengah hian Hall 25 kan sa ve a. Tunah hian Vairengte Hall hi sak theih mai turin kan buatsaih a, PWD-ah pawisa kan pe a, nuai 3,87,65,000 lai a ni a. PWD lam hi a muang a, inthlan hma daih a tender tawh tura kan ngaih kha vawiiin thleng hian tender lohvin ala awm a ni. Heng bakah hian DPR te thehluh, retain tawh, construction of Mini sport comple at Khawbung ₹ 358 lakhs te , construction of mini sport complex at E. Lungdar ₹ 476 lakhs te, construction of multi shopping complex at Saitual ₹ 300 lakhs man te kan nei a, tunah hian sanction nghah mek a ni tih kha RD lam atanga kan sawi duh zualpui deuh a ni a. Nichinah khan kan member-te khan social education a pawimawh zia te kha in rawn sawi a, a lawmawm khawp mai a, helaiah hian community hall te, playground te, NGO ho

building te, link road te leh thil dangte kan thawhna thin a ni a. 2013-2014 ah khan 305 lakhs min pe a, chung chuan helaiah hian hna tam tak kan thawk a.

Amaherawhchu kumin 2014-15 ah hian sum indaihlohna avangin budgetary allocation-ah hian engmah dah a ni lova, kan MLA bialtu theuh ten RD kan lo nghan thinna te hi vawiinah chuan a theih rih loh dawn ni awm tak a ni. Rural Housing Scheme nichina kan han sawi mai pawh kha 2013-2014 ah 50 lakhs min pe a, amaherawhchu tunah hian budgetary allocation ah engmah dah a ni lo bawk a ni.

Housing for project staff kan tihachte, thildang ah pawh hian dah a ni hranpa lova, state plan fund atanga sum kan beisei, ₹520 lakhs ah hian Rs 240 lakhs chiah min rawn pe a, chuvangin kan officer 4 te leh kan staff 47 te hian October thla atang khan hlawh an la thei tawh lo nghe nghe a ni. Tuna kan indaihlohna tlangpui hi insawrtet theih ang bera sorkar hian RE lamah te min rawn ngaihtuah theih kan ring a, chungah chuan ₹172 vel min rawn pek leh hi chuan kan dam khawchhuak thei ve ang chu maw kan ti a ni. Kha kha ni ta sela.

A tawp ber atan chuan helaiah hian a te ber, Excise and Narcotics department hi kan sawi duh lawk a. Excise and Narcotic department hi dan kengkawhtu, 24 hours duty, law enforcement department an ni ve tih kan hria- in ka ring a, Commissioner hovin tunah hian Commissonerate in an awm a ni a. District-8 ah hian Superintendent of Excise and Narcotics hovin Lawngtlai tih lovah hi chuan an awm vek a ni. Tichuan, Vairengteah hian Check gate kan siam ve a, hei hi sawi a hlawh thin a, amaherawhchu, kan han kal hian thil thalo chu kan hotute hian an hmu lo a 24 hours helaiah hian an duty a, chutiang chuan theihtawpin hna an thawk ve thin a ni. Helaiah hian min duhsaknaah member-te hnenah lawmthu ka sawi duh a. Excise Act te kan han tihdanglam takah hi chuan tlemin a man power te pawh hi tam deuh se in rawn duhna hi thil awm tak niin a lang a. Tunah hian sanction post hi 626 kan nei a, tuna fill up chu 528 a ni a, vacant post hi 98 kan nei a ni.

Mizoram Liquor Total Prohibition Act, 1995 kha a hman hun tak kha chu February 27,1997 kum 17 zet kan hman hnu khan hei hi a hlawhtling nge hlawhtling lo, a tha em ? hman reng tur a ni em tih Pu H.Raltawna, IAS Rtd chairman na hnuaiyah study team-te siamin, study group te insiamin MLTP Act, 1995 hi kil tin atangin an zir Chiang a, Mizoram University atangte pawhin scholar te pawh research neih tir an ni nghe nghe a ni. Tichuan, heng study group- in an

hmuh danah hi chuan 1995 MLTP Act hi a hlawhtling lova ngaiin sorkarah report an pe a, chu chu sorkarin ngun takin a ngaihtuah a, hei aia dan tha zawk siama thlak hi tul tain a hria a.

Chuta tan chuan “The Mizoram Liquor Prohibition and Control Bill, 2014” kha a duang chhuak ta a nih kha. He Act hi House zahawm takah khan kan pass tawh a, tichuan Governor-in ni 11.7.2014 khan accent a pe a, Mizoram Gazette- ah 17.7.2014 ah tihchhuah a ni a, heng hi kan zu in duhten zu chhia ni lo, zu tha zawk an in theihna tura siam a ni tih kha ka sawi duh a, Card an siam anga, kum 21 chin chunglam chauhin an lei theih tur a ni a. Chuvangin a duh zawng zawngin lei a, kal huai huai a, in huai huai tur pawh a ni chuang lova, a duhlo in atan a ni lova, a duh tan chauh a ni tih kha kan zavaiin hre nawn leh ila a thain ka ring a.

Excise and Narcotics Department hi kum 10 kaltaah khan hetia total prohibition anih avang hian revenue earning Department atan chuan beisei a nih loh rualin target chu tuk an ni ve a, chutiang target khum chuan kum 10 chhung khan kum 9 an awm a, kum 2010-2011 ah khan an target an pha lo a ni. Hetianga control chung a zu zawrh a nih takah hi chuan a lo berah ₹ 1000 lakhs te hi chu strict taka kan zawrh pawh hian kan hmu thei ngei turah kan ngai a ni.

Nichina kan member tena an sawi tak ang khanin enforcement activity nei ve an ni a, Motor hi tlem a zawng kan nei ve a, kum 15 vek an ni tawh a, repair a ngai ngun viau a, Heng avang hian sumte pawh kan indaihlo hle a ni tih ka'n sawi tel duh zawk a. Tunah chuan motor thar 2 leina kan dil a, min phalsak a, bike 2 min phalsak bawh a. Amaerawhchu, sum indaihlohna avang bawkin tunah hian finance lamah kan la tlang thei lo a ni.

Kolasib bialtu MLA zahawm tak khan Bairabi velah te post min create sak se a ti a, hei hi kan hmabak a ni a. Bairabi-ah hian Excise check gate sorkar-in hawn min phalsak a. Chutahchuan, a strength tur phei chu mi 27 lai a ni a. Heng post create pawh hi min phalsak tawh a. Amaherawhchu, fill-up phalna kan la hmu lo a ni tih ka'n sawi duh a. Tin, hetianza zu in leh in lote enfiahna atan hian Breathanalyser hi lei tum a ni a, tender koh mek a ni tih kha kan sawi duh a ni. Chung chu a tlangpuiin, a tawi thei ang bera ka sawi theih ni sela.

Pu Speaker, ka Demand No.7, Excise & Narcotics department ₹ 2539.36 lakhs, Demand No.16 Home department ₹ 56329.29, Demand No.31, Agriculture department ₹ 19029.65, Demand No.38, Rural Development department ₹ 37070.23, a vaiin ₹ 115028.53 hi min pass pui turin ka dil e.

**SPEAKER** : Awle, kan minister zahawm tak Pu R.Lalzirliana'n a department chan demand hrang hrang 7-na, 16-na, 31-na, 38-na te hman atan a zavaia belhkhawmin ₹115028.53 hi he House hi pass arawn dil a. Pass remti ti zawngin 'remti' ti ang u le, remtilo kan awm em? Tuna kan rawn chhiarchhuah tak demand 7, 16, 31, 38 atana hman tur a zavaia belhkhawm ₹115028.53 lakhs chu lungrual taka pass a ni e.

**Pu R. LALZIRLIANA, MINISTER** : Pu Speaker, ka lawm e.

**SPEAKER** : Hei, inthiar te kan duh em? Kan kal zel dawn em? Anih aw, tunah hian a nih leh Pu H.Rohluna, minister zahawm tak kan sawm ang a. Ani hian demand hrang hrangte rawn move sela, pass rawn dil nghal mai sela.

**Pu H. ROHLUNA, MINISTER** : Pu Speaker, ka lawm e. Vawiinah ka Demand member zahawm tak takte a sawi apiangin a bik takin School Education phei chu min sawisak vek a, in thahnemngaihna ah lawmthu kan sawi hmasa duh a. Tin, Industry lam pawh member 5 laiin min sawipui a. Tiang chuan, Trade & Commerce hi member 9 in min sawipui bawk a. Tin, hetiang demand kan han sawinaah kan department enkawlte a lo zau tham a, a lo lian a, inzarparh tak kan lo ni a. Chuvang chuan, a kilkhawr laite han khawrh duh phei sela chu famkim lohna tam tak pawh kan nei ang tih ka ring a. Chung pawh chu member zahawm tak tak ten a mawilo lai emaw, tawngkam ngaihthlak hrehawm deuh emaw pawh awm miah lovin mawihnai takin min han sawisak te hi ka lawm em em a, an chungah lawmthu ka sawi a. Tin, Department a hminga ka enkawl vea thawktu kan officer-te leh thawktu zawng zawngte an thahnemngaihna te, an hmalaknaah leh theihtawp chhuaha min tawiawmnaah te tun hunah hian lawmthu an chungah ka sawi bawk a ni.

Pu Speaker, khua hi a tlailam deuh tawh a, nichina kan Home minister-in a sawi ang khan vawiin chu kan han chesual ta deuh hlek a, thingpui lam te kha kan han order lo ta deuh bawk si a, hun hmanrei pawh a inthlahrunawm viau in ka ring a. Chuvang chuan, a tawi thei ang chu kan tum ang a, mahse, ka tawng hi a muang deuh hlek a, mahse, ka hmangrei lutuk bik lo turah chuan inngai ila a thain ka ring a. Tin, a department hmalakna lam pawh thui tak luh ka tum lova, helaia kan member zahawm tak takten an ngaih pawimawh zual an sawilan ho kha tlem tlem han react kha a tha in kan ring a. Chung chu kan han tihdan ni mai se a thain ka ring a. Nakinah nin lamah te a kal lutuk ang tih ka hlau deuh a.

A hmasa in School Education Department lamah han kal ila. Pu Speaker, ka, n sawi hmasak duh chu member kha a mal mala han react khan hun a duh dawn a, chuang chuan, a khaikhawm theih ang ang kha karawn khaikhawm a ni tih kha min hriatsak ka duh a.

Tichuan, School Education Department-ah zirtirtu lak dan chungchang velah hian a bik takin hmun kilkhawr zawk thingtlang lama mite hi duhsak theih ni se tih hi sawifo thin a ni a, tunhma atang pawhin. Tunah pawh hian kan member thenkhat ten an han sawilang baw a. Hei hi nia, quality education te kan duh chuan Recruitment Rule-anga kan kal te, recruitment procedure anga kan kal te a lo ngai thin a, rin aiin a harsa khawp mai a. Keini pawh thingtlang bialtu kan ni a, kan bial problem kha chu kan hre ve tho mai a. Mahse, rin aiin heng hi siamthat mai hi a lo har a, tun ah phei chuan quality tha zawk kan neih theihna turin tiin recruitment pawh primary zirtirtu thlengin MPSC kutah hian dah a ni a. Tunah pawh hian Primary zirtirtu 67 direct leh dependant family te lak tur 42 recruitment hi MPSC in a process mek a. Hmanni lawkah khan Higher Secondary School lecturer 30 an tifel baw a, chu chu posting la tih tur a ni ang a. Tiang chuan kan duhthusam angin hmun kilkhawr zawk a mi te tun dinhmunah hi chuan kan han duhsak mai thei rih lo a ni. Tin, zirtirtu R.R a subject wise a siam ni sela tih hi Pu Speaker, tunah hian, chawhma lama zawhna kan chhan ang khan kan tum mek a, hei hi a Department lam pawhin kan en mek lai, kan hma lak mek lai a ni. Hei hian problem tam tak a create a, a chhan chu Science leh Mathematics te hi a bika Recruitment Rules-ah a lak zat tur emaw, a proportion emaw siam a nih loh hi chuan harsatna awma thin avangin indaihlohna a nasa si a tiin a subject wise deuh hleka Recruitment Rules pawh hi siam theih dan awm se tiin hma kan la mek a ni.

School Inspection chungchang hi member tam takin an ngai pawimawh a, tih lohna a rei tawh a ni tih a ni a. Term hmasa lam te pawhin sawi a ni fo thin a, tih tak tak hleih theh loh te hian a awm a awm deuh a. Tunah hian kan field officer te hian motor te an lo dawn tawh loh phei chuan, office expense atanga zin chhuak mai tur hian, kea han kal emaw, motor, Sumo ah emaw, Bus ah emaw han zuangthla nawlh a School han inspect tur chuan rin aiin alo harsa tawh te pawh a ni a nga, chuang chuan School Inspection hi tih hleihtheih pawh a ni mumal lo a, harsatna kan taw a ni. Charge kan lak hnuah pawh hian vawi engemaw zat chu kan sawi tawh a. Tin, inspection tih term hrim hrim pawh hi, tunlaih hi chuan a relevant tawh lo maw tih te pawh kan nei a ni. Monitoring & Supervision te pawh han ti ta zawk ila, school an va kalna tan pawh khan a tangkai zawk ang a; tin, alo dawn sawn pawh a nuam zawk anga, British hun laia inspection ti a, engemaw fault finding ang zia zanga ngaihte pawh hi tunlai hunah chuan a fuh tawh lo deuh lo maw.

Chuvang chuan monitoring & supervision ang zawngin ti ilar, mi pakhat mai ni lovin a team te pawhin, mi pahnih pathum te pawh inruat ta ilar, panel ang deuh te pawhin siam ta ilar, chutiang hawi zawng chuan school te hi en ta ilar, a theih dan ang angin kan ti a, rin aiin alo har khawp mai a. Officer-te in awmna khua Sub- Division emaw, District pawhin , in awmna khua school tal chu khaw danga in zin thei lo a nih pawhin tlawh chhuak teh u, kan in ti a. Chung ang te pawh chuan hmun dang te pawh a hriat theih ang a, tuna kan kaldan ngawt hi chu a fuh thei lo a ni te pawh kan inti a ni.

Tin, Pre-School chungchang hi a pawimawh khawp a, sorkar Primary School a bik takin, Aizawl khawpui chungte leh District Hqrs ah hian private English Medium School te a tam tawh avangin zirlaiah hian kan tlahniam telh telh a, a then zirlai nei tlem lutuk te pheih chu kan amalgamate ta a, school 14, school 7 ah kan chantir ta nghe nghe a. Tichuan, Pre- School atangte hian tan ta ilar, hemi ECC, Early Childhood Care and education hi tuna Anganwadi ang ngawt lo deuh hian, Primary School ah hian, a zawng zawng hi chu kan ti thei hauh lo ang a, a tirah hian school engemaw zat hi thlang chhuak ta ilar, zirtirtu indaih deuhna te, chutiang chuan a bul hi tan tha leh ta ilar, sorkar school zirtirtu, training pawh nei tha, qualified zirtirtu awmna si, nuapang zirtir tur neilo a an awm hi a fello a ni. Chuvangin Primary Teachers' Association te pawhin pre-school hi min hawn sak leh ula tichuan, miin kum 6 an tlin hmaa English Medium a an lo kal tawh te chuan a hnuah hian school thlak leh hi an harsat a, chuvangin KG-I, KG-II atang hian tan ve law law ta ilar, tichuan nuapang school an kal tirh theih atanga school an lo neih tawh kha chuan, chu chuan zirlai pawh kan ngah phah ang e, tih te a awm avangin, chutiang hawi zawng chuan tunah hian kumtharah a enchhin nan a bul tan chhoh kan tum.

Tin, Mid –Day meal, private school English medium te tan pawh hian a pek theih lawm ni tih hi, tuna Norms awm pangngaiyah hi chuan kan ti thei rih lo a ni. Tichuan, Mid- Day meal hi tluang takin a kal chho a, government school bikah chuan school nuapangten an tangkaipui em em a, nuapang pawhin an hriseh phahin kan hria a, an taksa leh an hmelmang thlang pawhin an that phahin kan hria a, a tangkai hle a, Kumin 2014-2015 atan hian cheng vaibelchhe 523 leh nuai 77 hi a pawisa pawh kan dawng tawh a. Tichuan, hman deuha tlema a financial procedure han inthlak ta deuh hleka kaihluh deuh hlek tih loh hi chu harsatna tun kum kal mekah hi chuan kan tawh chhoh loh kan beisei a ni.

Tin, zirtirtu leh nuapang ratio inbuk tawh lo lutuk hi siam that deuh theih dan a awm lawm ni tih pawh hi, a dik khawp a, a bik takin Primary School- ah hian ziritirtuah member

zahawm tak takte pawhin an sawi a, an bialah zirtirtu an indaih loh dante an sawi a, chu chu a bik takin thingtlang hmun kilkhawr zawkah hian zirtirtu kan la indaih hleithei lo a ni. Middle School chin chunglamah te hi chuan indaih lohna chin te hi chu lo awm mahsela, a tlangpuiin hemi chin chung lamah hi chuan kan indaih deuh a ni. A theih ang angin, tunah pawh recruitment kan tih mek, nichina ka sawi tak te. bakah hian engemaw zat VRS a chhuak ta ai tur hi lak leh tur a ni a. Tuna MPSC in an tih mek te pawh hi a theih ang ang hi chu indailoh zualna thingtlang lamah te pawh hian post kan tum dawn a ni.

Tin, Text book quality chungchangah khan Pu Speaker, hei hi a tha thei ang ber tih kan duh reng a, Pu Lalruatkima'n a sawi lan quality pawh kha 80 GSM paper a chhunglema hman tur khan tunah tender te pawh chhuah mek a ni. Tin, a cover atan pawh hian 220 GSM paper tha tawh hmang thei turin kan inbeisei a, amarawhchu heti lama problem kan neih ve leh thung chu a sum lampang harsatna hi a rawn nghawng lo thei lova, tunah hian free text book SSA atanga kan semah hian mipakhat tan hian ₹ 150 ang chauh Primary School tan a ni a. A text book quality kha a lo that viau a, a man a lo to viau a, indaih loh chuan harsatna nghawng dang a lo nei ve leh thin a. Chuvang chuan kan zawl tawh hi hriat thiam a ngai khawp mai, a tha ber ber kan duh lai hian. A text bu pawh hi an sawi tak ang khan class 1-4 hi kum 2015-16 session atangin NCERT text book chauh hman tur a ni a, chu chu SCERT lamin thahnemngai takin Mizoram zirlaite mil zawng turin an adopt a, a tul lai siam thain, chuti chuan Mizo mil ang tawkin hman mai tur a ni a. NCERT ruahman angin a text book (lekhhabu) Mizo medium leh English medium hi a in ang tawh dawn a ni. Tin, naupangin rit deuh deuha an ah thin pawh hi hei hian a chhawkin ka ring a ni.

Tichuan class 5- 8 hi 2016- 2017 a kum leha NCERT siam hi hman leh tur a ni a. Tin, High School din thar chungchang leh Kohhran sikul tihchak tih hi a sawi kawp theih mai in ka ring a Pu Speaker, Kohhran school tihchak hi a pawimawh khawp mai a, Higher Secondary din thar chungchangte nen pawh inkaihnhawihna chin a awm lo thei lova. Tunah hi chuan ram changkang kan tih apiang ah te privatization hi uar a ni chho zel a, a nih loh pawhin PP mode a kal chhoh te hi uar chhoh zel a ni ta. Kan ram education system-ah hian sorkar sikul kan lo siam hnem tawh avanga vawiih pawh hian sorkar tan phurrit nasa a awm a ni. Primary School atanga Middle School te sorkar school tam ta lutuk hian a thawktute hlawh chungchang a ni emaw, management a ni emaw, transfer vel thleng pawhin sorkar a tiluihai khawp a. Chuvangin sorkarin school din belh teuh teuh lo



hian private school emaw, kohhran school te nena tan tlan a sorkar school a va leh sak lam ni lovin a tanpui theih dan ang ang sorkarin sum a neih chuan tanpuia kal tlan dan turte awm se chuan vawiina kan problem tam tak hi a solve thei ang tih a beisei awm a. Chuvang chuan Pu Speaker, kan sorkar kal hmang hrim hrimah hian kan sum leh pai te pawhin a tlin loh bawk avangin sorkar school siam belh hi chu kan tum vak lo a, chu chu House zahawm tak ka'n hrilh duh a ni.

Tin, zirtirtu hlawh la lo chungchang hi sawi a tam a, amarawchu tu tu ten emaw an sawi nasat ber CSS hnuaia Hindi zirtirtu (1305) te kha chu an hlawh released vek tawh a ni a, a then pheih chuan kan sawi tawh ang khan an draw tawh hial ang tih ka ring a ni. Sorkar school zirtirtu pangngai non plan a late tan pheih chuan problem kan nei hran lova, a plan lamah hian tlemin kan phang deuh va, amarawhchu Finance lamin hma min lakpui a, Deficit School a ni emaw, Aided lam a ni emaw December leh a bak zel pawh min pe chho thei in ka ring a ni. Tuna kan budget pangngai angah erawh hi chuan Deficit leh Aided ho tan hian gran in aid atan cheng nuai sangthum vel hian kan indaih lova, Finance lam pawhin kan harsatna min hriat thiam chhohpui dawnin kan hria a ni.

Tin, RMSA a sum a rawn released hi kan duh thu sam angin kan la hmang mai thei lova, amarawhchu, hengte pawh hi tunah hian a kal chho thei turah kan ngai a, hlawh hi chu tunah RMSA-ah hian district thenkhatah chuan tlemin an hlawh lak hi August thla thleng te a ni a, a then ah hi chuan October a lo la chho te pawh an awmin ka hria a ni. SSA bikah hian July thla thleng kha an la tawh a, August atangin anla lo a ni tih kan hriat tawh kha. Hei hi chawhma lam khan Member zahawm tak zawhbelhna siamtu Pu Lalruatkima khan July thla-a sanction awm tawh ang khan a sawi a. Chu chu July thla-a sanction awm tawh engatinge tun thleng thlenga pek loh a nih ti khan a sawi a, a rawn zawhbelh kha a ni a. Kha kha July thla a ni lova, crore 29 chuang hret kha tun thla ni 7 ah khan Mizoram sorkar account-ah a lo lut chauh a ni. Chu chu a nih avangin vawiinah hian kan la pe mai thei rih lova. Amahrawhchu, Finance Minister nen pawh kan sawi dun a, Finance lamin reilote-ah min tihfel sak thei dawn a. Hei pawh hi hlawh an lak thuai theih mai pawh kan beisei bawk a ni.

Tichuan, Pu Speaker, Education-ah hi chuan member zahawm tak tak ten an rawn sawi tlangpui deuh kha chu tikhan ka react kim deuh maiin ka hria a. Thil dang pawh Education-ah hian han sawi tel chu a chakawm viau na-in hun a duh rei dawn a. Sawi kai tawh lo mai ang a.

Tichuan, Industries Department hi kan member zahawm tak tak panga ten an rawn hawl deuh a. A bik takin an han sawi uar deuh hi chu Industries hnuai tho a ni a. Geology and Mineral Resources Department lam, a nodal Department kan nihna-ah Gas exploration chungchang hi an sawi uar deuh lek a. Gas exploration hi a pawimawh khawp a. Tunah hian sorkar-in chak takin a theih ang angin Company-a thawktu-te nen tang tlangin hma kan la chho mek a. Tichuan, Mizoramah hian hmun thum-ah thawh ang a ni a, mahse, ONGC leh Oil India Ltd. tih loh hi chu (Reliance Company kha kan Finance Minister zahawm tak Budget Speech-ah khan chhim lamah Reliance la thawk zel ang khan tarlan palh a ni a. Hei hi tlemin communication gap a lo awm palh deuh a nih ka ring a). Reliance Company hi thla hnih khat kal ta-ah khan terminate an ni tawh a. Tichuan, tunah hian a thawktu tur dang zawng leh turin thil pawimawh chinfel chhoh leh mek a ni. Tin, ONGC hian a hmar lam ber hi an chang a.

Kolasib leh a chhehvel te, tichuan Meidum-ah khan Gas chu hmuh a ni tawh a. Tichuan, hei pawh hi engatinge tunah hian chawlhsan vang vang a nih a, an chhunzawm tak loh member zahawm tak, a bialtu MLA khan a ti a. Tikhan an dah tha rih phawt a ni. A chhan chu tun dinhmunah hian a location a tlem berah hmun thum, hmun li-ah emaw Gas hi an hmuh phawt loh chuan, a production hi tan theihah an lo ngai lo a ni a. Tichuan, tunah hian hmun dangah verh leh turin an inbuatsaih leh mek a. Zanlawn thlang lawk Tawitaw lai ni tain ka hria a, chutah chuan tunah hian ONGC te verh leh turin an inbuatsaih leh mek a ni. Tin, a hma-a location an lo thlan deuh chu Meidum leh Hortoki inkarah hian hmun hnih-ah verh tur an ti a. Amaherawhchu, kawngte siamthat a ngai a, leihlawn-te dawh that a lo ngai a. a hmanrua-te a seiin, a rit hlawm si a, a lak luhna tur, chumi atan chuan hun a la duh deuh dawn a. Tunah hian Zanlawn thlang Tawitaw-ah an inbun leh hmasa dawn a ni. Tin, chak taka hma la turin kan innawr nasa a. ONGC lam pawh an Headquarter Delhi-ah khuan kan Parliamentary Secretary zahawm tak Pu Joseph Lalhimpuia nen pawh kan zuk sawipui tawh a, an Office-ah te kan va kal tawh a. Tin, kan Chief Minister pawhin vawi tam tak min nawrpui tawh bawk a. Chutiang chuan kan nawrna vang nge ni ka hre lova, an exploration Director pawh Aizawl-ah a lo kal a. Chutiang chuan helaia an hma lak dan ah ONGC lam nawr chak turin, min rawn nawrpui turin kan ngen a. Chutiang chuan ani pawh ka Office-ah a lo kal a, heng harsatna chungchang pawh kan lo sawipui tawh a ni.

Tichuan, Oil India Ltd. lam hian Maubuang, Thenzawl leh a chhehvel leh Keifang-te hi an hma tur a ni a. Anni hi central zone deuh an ni. Tunah hian a verhna turin Oil India Ltd. hian Maubuang an peih tawh a, tunah verh mek a ni a 1559 mt. tunah hian leihnuai an verh tawh a, 4500 mt vel verh hi chuan Gas hi chu hmu ngei turah an in beisei a. Tin, chumi hma pawh chuan an

rilru tak chuan hmuh theih aninbeisei a ni. Amaherawhchu, thil chianglo a nih avangin 4500 mt ah hi chuan kan hmu ngei ang tih kha anmahni sawi dan a ni a. A lung a lo chang a, chuvang chuan an beisei aiin tunah hian ONGC in ka bula an sawidan phei chuan India rama kan verh tawh zawng zawngah a lung sakhatah hi chuan Maubuang hi a la chang ber a ni an ti a ni. Chuvang chuan, an beisei angin an verh chak lova, mahse, tunah hian km 1 leh a chanve chu an verh tawh a ni.

Tin, Thenzawl location hi peih vek tawh a ni a. Hei hi a verhtu tur an la tifel hleithei lova. Tin, Keifangah pawh hian Oil India Ltd. in, (a kal chuan kan hria ang a) Keifang thlen hma lawk kawngthlangah khian a groundwork peihfel vek thawkhat a ni tawh a. Hmabak tlem chauh an nei ang a. Keifang phei khi chu tunah hian investigation an tih chinah an beiseina a sang em em a, chuvangin verh thuai pawh hi an chak a ni. A bungrua laklunna turin Seling leh Keifang inkar hi a kawng zauh a siamthat a ngai a. Chumi tur chuan Oil India Ltd. in Border Roads ah ₹ 6 crore chuang hret hi nikum October thla-ah khan an deposit tawh a. Mahse, Border Roads Organization hotute leh Defence Ministry lamin Border Roads kut a nih miau avangin a kawng hi an clearance a ngai a. Chumi clearance chu an pe thei mai lova, vawi tam tak anmahni hnenah pawh kan thlen tawh a. Chutih rual chuan kan Chief Minister pawhin vawi tam tak min thlen sak tawh a. Hmanni lawkah pawh Defence Minister-ah te personal-in lehkha min ziah sak a, chutiang chuan clearance hi kan hmuh thuai kan beisei a. Tunah phei chuan BRTF lam pawhin thal a lo ni tawh a, thawh thuai thuai an chak a ni.

Tiang chuan tunah hian Oil zawn hnaah hian a chak thei ang berin keimahni phak tawhah hi chuan hma ka la a ni. Tichuan, company lam pawhin an theih tawp an chhuah vein kan hria a. Tin, a hnathawktu lak chungchangah pawh hian Pu Speaker, a theih ang anga local mi duhsaka chhawr turin kan inhrilh a. Tunah hian Oil India Limited hian a officer hna ti mai ila, Project Engineer-te, I.T. lama Engineer tih te, Chemical Engineer te leh Geology lam a mite tunah hian panga paruk lai an chhawr a. Tin, local mi, tuna a verhtu Company ngeite pawh hian tunah hian mi 20 chuang lai an chhawr a ni. Tiang chuan theih ang angin local mite pawh duhsak turin an hotute, Oil India Limited te pawh hmanni lawk khan thla hnih khat kalta lawk khan Director exploration thar an nei a, chungte pawh chu an lo kal a, chungte nen pawh chuan kan sawi tlang a, local mite ngei duh sak turin.

Tin, an CMD, Delhi, Noida a Parliamentary Secretary nena kan va hmuh pawhin hemi chungchang pawh hi kan sawi nasa a ni. "A local mi hi in tih chuan pawn lam a mi ten harsatna an neih thinte pawh hi an nei lovang a, tiang chuan hna te pawhin a chak

phah ang a, law & order problem pawh hei hian nasa takin a solve ang,” kan inti a. Tiang chuan local mite ngei chhawr turin an hnenah pawh kan thlen chamchi a ni.

Tin, Industry hmalakna dang dangte pawh sawilan neuh neuh a awm nain khang chu kan han react vek lo mai ang a. Industry Department hi NLUP-ah Nodal Department kan ni ve a, a trade pawh a tam viau va, a thlangtute pawh an tam a. Industry, a bik takin Carpentry te emaw, thingzai khawl leh Dawrte siam kan tih ang chite chi tam tak a ni a. Khangho pawh khan tunah hian hlawkna nasa takin an tel chho a ni. Tiang chuan thui tak sawilo mai ila thain ka ring a. Kha pawh kha tikhan duh tawk leh mai ila.

Tin, National Mission for Food Processing hi kan tan chhohna a la rei lutuk loh avangin Mizo mipui hian hria kan la tam lutuk lo mai thei a. Food Processing lama hma kan lakna tur atana Central Sorkar-in Mission mode a kalpui a ni a. Chuvangchuan, Food Processing-a industry neite tan chuan ngaihven leh a tui mite tan chuan helamah hian tanpui theihna tam tak a awm a ni tih hi hria ila. Hetah kan Mission Director te, Industry Officer te pawh hi a tul hun huna zawhfiah theih a ni a. Ei lam thil sawngbawltute hi chuan hma lak chhoh hi a tha khawpin ka ring a. Scheme tha pui pui mai, state sorkar share ngai tam lemlova haichhuah tur tam tak a awm a ni. Tikhan duh tawk leh mai ila thain ka ring a.

Tin, memberten an rawn sawi rik tura ka beisei deuh, mahse an rawn sawi tak chiah si loh chu, Handloom hi a ni a. Handloom-ah hian Pu Speaker, Mizorama kuthnathawka eizawngtu, a hminga industry an dinah chuan Handloom hi a hlawhtling ber pawl te pawh a nih ka ring a. Tunah hian chhungkaw tam tak, nu tam tak, pa tam tak ten eizawn- nan an hmang mek a ni a. Hengte pawh hi a theih ang anga tanpuinate central sorkar-ah kan Officer-ten an zawn sak thin a. Chutiang chuan tunah pawh hian central atangin North Eastern Textile Industrial Promotion Scheme hnuaih hian cheng vbc. 22 leh nuai 25 hi Ministry of Textiles in min approve sak tawh a. Hei hian weavers, puan tahtute 9430 a cover thei dawn a ni. Tangkai hle turah kan ngai a.

Tin, Mizorama puantahtute tana thil tangkai tak tur reiloteah chuan kan hawn tan theih kan beisei, kan hman tan theih kan beisei Weaving Service Centre hi tunah hian Ministry-in min tihsak dawn a. Hei hian technical guidance te leh thil dang dang pawimawhte kha puantahtute hnenah hian a pe thei dawn a ni. An hmun tur hi tunah infrastructure hi

sak mai theih ala nih rih loh avangin ZOHANCO ten an luah thin Chaltlang-a building pakhatan khian han bun phawt sela an ti a. Chumi hnuah chuan Luangmuala Industry ram khu sat thlain tahchuan a infrastructure, a building te anni pawhin ti mai se kan ti ta a ni.

Tichuan, CSS hnuaiah tho hian Revival Reform on Re-structuring (R.R. R) kan tih mai pawh hi society leh individual weavers-te tan nakinah loan lo la a rul hlei thei lote tanpuina leh an loan waive dan tur te, tun Financial Year chhung pawh hian tanpuina a la awm thei dawn a ni.

Tichuan Pu Speaker, Handloom tana thil lawmawm deuh pakhat chu Thenzawlah hian Industry Department-in handloom a lo inbunna thin hmun tha deuh mai kan nei a. Chutah chuan Mizoram Handloom Export Facilitation Hub tiin a hming kan han phuah chhin a, a detail project-te pawh kan siam chhin tawh a. Hei hi a hming chu heti hi ni zawk se kan tih chuan a la thlak theih a. Chu chu building changkang tak export promotion atan leh handloom marketing atan hian nakinah chuan la tangkai tak tur a ni ang a. Chu chu building changkang tak te, Quarter-te nen, Office te nen ASIDE fund atangin tunah hian buatsaiha hna pawh tan thuai kan tum a ni. Tiang chuan hma kan han la chho a ni a. Geology and Mineral Resources ah hian tawngkam hnih khat lek han belhchhah ka'n duh chu revnue earned-tu department pawimawh tak a ni a. Tunah hian minerals atang hian stone atang leh sand atang te in revenue hi kan lo earned ve nual tawh a. Kumin chhung pawh hian stone atang ringawt pawhin cheng nuai 23, cheng singthum sangkua zaruk sawmsarih leh pariat lai stone kan hmu tawh a. Tin, sand atang hian vaibelchhe khat leh 7,42,292 kan hmu tawh bawk a, Brick-ah hian cheng 9,714 kan hmu a. Tin, petroleum exploration licence bikah phei chuan cheng 2,349,2,000 hi hetah hian a revenue Government a kan thehluh kan hmu tawh a ni. A belhkhawm phei chuan cheng 3,14,83,684 lai kan lo earned tawh a ni. Tin, Geology and Minerals Resources Department hi leilung endiktu deuh a nih avang hian AMC te nen pawh in sak tharna tur te, sorkar a ni emaw , mimal a ni emaw, chung ang te chu leilung endik kawngah te pawh tan an lo la hle thin a. Earthquake risk zone te kan lo nih avangin hengah te hian a tangkai em em a.

Tin, tunah phei chuan saw, Ramhlun Sports Complex-a nikum lama leimin chhawmdawlinaah pawh khan hna thawktu ber a ni ta a. DM&R nen tangkawpin a hna execution hi Geology and Mineral Resources Department in a thawk a. A hna pawh tunah hian a progress a tha hle a, Central atangin NDMA atangin expert consultant nimin piah maiah a lo kal a, a hmunah te pawh a va endik a, Dr. Ravinder Singh a ni nghe nghe a, tha a ti khawp a. Work Project Report an

siam pawh India ramah pawh hian state hrang hrangah hei hi a role model atan hmang thei nghe nghe se la a tha ang, Delhi ka thlen thlakah tiang chuan state dang ka koh khawm hunah pawh kan lo sawi ang an ti a, tha an ti angreng hle a. Sum awm ang ang pawh tunah hian location dang, chhiatrupna kan lo tawh nasatna hmun dang pawh hi “DPR rang takin rawn siam ula, chungte pawh chu a sanction tunah hian kan neih ang ang (cheng vaibelchhe 500 bawr vel kan nei a ti ta maiin ka hria a) a theih ang ang in kan lo sanction belh leh ang che u, hmundang atan pawh an ti e, a ti a. Kan official te an lawm hle a ni. Kha kha Pu Speaker, Industries lamah chuan ni leh ta mai se la. Hun ka hmang rei ta deuh hlek a.

Trade & Commerce lamah hian Pu Speaker, member pakuain kan sawi tawh ang khan Trade & Commerce Department min sawipui a. An sawi tam ber hi chu border trade hi a ni a. Border trade hi Pu Speaker, kan hun hmalam atangin kan minister kal ta kaihhruainain chak takin hma an lo la tawh a. Kan sawi tawh angin Zokhawthara Land Custom Station hi chu la commission hleih theih a ni lova. Tichung chuan fund awm thei ang angin border trade hi kan Chief Minister kaihhruaina hnuaiyah kan sorkarin a ngaih- pawimawh avangin a theih ang angin Vaphai Saikumphai kan tih maiah te , Farkawnah te, Sangau lamah te hma lo lak a ni a. He House-ah pawh kan sawi tawh a, location dangte pawh a pawimawh thu bialtu MLA te pawhin an sawi a. Amaherawhchu, kan sawi tawh angin theih ang ang hma lak kan duh laiin sum hi Central atanga kan hmuh dan anga kan inher rem ve a ngaih avangin tun dinhmunah hi chuan GOI leh Myanmar sorkarin agreement an lo sign tawhna lamah hian kan hawi lo thei lova. Chutichung chuan tuna location dang kan member zahawm tak tak ten an rawn propose ah pawh khan a theih ang ang chuan central lamah pawh kan lo thlen ang a, kan lo nawr zui zel ang a. Tuna agreement an lo neih tawh bik hi chu tlemin an ngaipawimawh hmasa lo thei lovang tih min hriatpui ka'n duh a.

Tin, Zorinpui Land Custom Station-te pawh hi a hming chuan sanction pawh nikum lamah khan lo neih tawh a ni a, nimahsela, kawng kha tuna multi-modal road in a pawh mai loh avangin hma a lak theih lova. NBCC hnenah hian a hna te pawh pek vek a ni a, mahse sawng te pawh saw hma lak hleih theih lovin a awm a ni. Ministry-ah a chak thei ang bera hma la turin kan han nawr ngawt a, February thlaa kan kal khan a changtu ten kawngin a pawh miao loh chuan a kal theih loh avang khan kan tawp leh deuh va, tunah hi chuan a kawngin a hnaih ta hlein kan hria a, chak deuh turin hma kan han la ang a. Tin, Kawrpui chhuahah hian Bangladesh nen kan inrina hi central sorkar pawhin a ngaipawimawh a, kan Chief Minister pawhin a ngaipawimawh a, ICP Kawrpui chhuahah hian din turin 2<sup>nd</sup> Phase -ah min dah a, chungte pawh chu 1<sup>st</sup> phase a min dah chho turin kan ngen a. Manipur ah te

an thawk hlei thei si lova, chung ai chuan a theih ang angin central sorkar-ah lehkha mai ni lovin keimahni ngei kan zuk kal a; mahse tunah mai sanction kan la hmu thei lova, Kawrpuichhuahah hian Integrated check post Home Ministry hnuaiah Bangladesh nena kan inkalpawhna tur atan hian a tha ber ang tih ngaihtuahna neiin hun kal ta lamah chutiang chuan an lo rawt a, kan kalpui zel a.

Kan sawi tawh angin khulam Home Ministry lam atangin sanction kan la hmu thei rih lova. Amaherawhchu, a lei hi dawh phawt turin min kar deuh a, keimahni state pawisa hi chuan dawh mai thei kan ni lova, vanneithlak takin tunah hian World Bank lam atangin beiseina kan nei a, chungte chu kan tih theih pheih chuan a kal deuh sawt turah kan ngai a ni. Tin, location dangte pawh Bangladesh border ah khan Dampa bialtu MLA zahawm tak pawh khan a sawi a, Silsuri-te leh hmun dang a bial chhungah khan khang ang te pawh kha tun dinhmunah hi chuan Bangladesh border-ah hian kan duh angin kan la kal chak thei chiah rih lo deuh a ni. In kal pawhna te pawh duhthusam ala ni lova, Myanmar lam ai hian communication-ah harsatna a la awm zawk deuh a, churang chuan kan la kal chak thei chiah lo a ni. Tin, member zahawm tak tak ten in bial lamah te market changtlung deuh in a sak theih lawm ni an tih pawh hi fund in a daih ang ang hi chuan hengte pawh hi ngaihtuah tum a ni a. Tun kum kal mekah pawh RKVY lam atang te in kan hmu thei dawn emaw kan ti a, beiseina sang tak neiin ruahmanna te pawh kan han siam a, mahse central sorkar te a lo inthlak chho a, a kalphung te a danglam tak deuh avangin central sorkar lam atangin harsatna kan han tawk ta deuh hlek a, kan beisei ang khan kan kal chak thei ta lo deuh a, a theih ang ang erawh hi chuan kan en chho zel chu a ni.

Tin, member zahawm tak Pu Lalruatkima'n Vairengte market sak a tih kha Trade and Commerce kut a ni lova, NLCPR fund in Rural Development kal tlangin PWD lamah fund pawh nikum lamah transfer tawh a ni a. Hnate pawh an tan theih thuai kan beiseipui a ni, chung bak chu kan va hriatpui tehchiam lo a ni.

Le, Pu Speaker, Department chhung hmalakna hi sawi tur a tam ang reng a, Trade & Commerce ah te pawh Mission Veng Market te pawh building tha tak NEC fundingin kan sa dawn a. Lawngtlai-ah Trade Facilitation Centre sakna turin sanction te pawh kan hmu a, a location te pawh kan thlangfel thawkhat tawh a. Chutiang chuan Aizawl New Market-ah pawh hian sa zawrhna dawr saw a building a him loh avangin kan thiat a, chungte pawh chu sak tharna tur NEC lamah kan dil a, tunah hian beiseina sang tak nen kan thlir mek a, kan hmuh theih ngeite pawh kan beisei a. Tiangchuan New Market te, Market hrang hrang kan enkawlte a bik takin District

Headquarter ami te pawh a theih ang anga thawmthat zel pawh kan chak a, mahse sum indaih lohna avangin kan duthusam ang chuan kan che chak hlei thei lova, Member-te hriatthiamna erawh chu kan ngen a ni.

Pu Speaker, thui tak ka sawi tawh lo ang a, ti hian ka duh tawh mai dawn a. Pu Speaker ka Demand No. 20-na School Education ₹ 83866.40 lakh, Demand No. 40-na Industries ₹ 10113.70 lakh, Demand No. 44-na Trade & Commerce ₹ 960.72 lakh

A vaiin ₹ 94940.82 lakh hi House zahawm tak min pass pui turin ka han ngen a ni.

**SPEAKER** : Awle, kan Minister zahawm tak Pu H.Rohluna'n a department chan pathum School Education, Industries, Trade and Commerce a hman tur a vaia belkhawm ₹ 94940.82 lakh pass pui turin House a sawm a, pass remti zawngin "remti" ti ang u le. (Remti) Remtilo kan awm em? kan awmlo. Pu H.Rohluna chan Demand No. 20, 40 leh 44-na atana hman tur cheng vaibelchhe 94940.82 chu lungrual taka pass a ni e. ( Pu H. Rohluna : Pu Speaker ka lawm e ) A tlai tawh viau a, mahse attendance pawh a chhe love, ruling lamah 25, opposition phei chu an kim thap a lawmawm. Chuan kan Minister-te pawhin an department chante an hre chiang hle a ni tih a hriat theih a, a lawmawm hle a ni.

Kan bang rih ang a, naktuk Zirtawpni ni 21 zing dar 10:30 ah kan kal khawm leh dawn nia.

Sitting is adjourned.